

## Tuhun vaha naçahyí Mateo sahá ña naçaja Jesucristo

### *Chichi naquixi Jesucristo (Lc. 3:23-38)*

<sup>1</sup> Ña yóho cúu quivi na naçacuu tásáñnu jícó Jesucristo, mé a naquixi chichi David xihín chichi Abraham:

<sup>2</sup> Abraham naçacuu tátá Isaac ta Isaac naçacuu tátá Jacob ta Jacob naçacuu tátá Judá xihín java ga ñani da. <sup>3</sup> Judá naçacuu tátá Fares xihín Zara ta náná ndíví da yóho naçanani ña Tamar. Ta Fares naçacuu tátá Esrom ta Esrom naçacuu tátá Aram. <sup>4</sup> Ta Aram naçacuu tátá Aminadab ta Aminadab naçacuu tátá Naasón ta Naasón naçacuu tátá Salmón. <sup>5</sup> Ta Salmón naçacuu tátá Booz, da cúu jahyi ñá naní Rahab. Booz naçacuu tátá Obed ta Obed yóho naçacuu da jahyi ñá naní Rut cán. Ta mé Obed yóho naçacuu tátá Isaí. <sup>6</sup> Ta Isaí naçacuu tátá rey David ta rey David yóho naçacuu tátá Salomón, da cúu jahyi ñá naçacuu ñájíhí Urías nu cuítí cán.

<sup>7</sup> Ta Salomón naçacuu tátá Roboam ta Roboam naçacuu tátá Abías ta Abías yóho naçacuu tátá Asa. <sup>8</sup> Ta Asa naçacuu tátá Josafat ta Josafat naçacuu tátá Joram ta Joram naçacuu tátá Uzías. <sup>9</sup> Ta Uzías naçacuu tátá Jotam ta Jotam naçacuu tátá Acáz ta Acáz naçacuu tátá Ezequías. <sup>10</sup> Ta Ezequías naçacuu tátá Manasés ta Manasés naçacuu tátá Amón ta Amón naçacuu tátá Josías. <sup>11</sup> Ta Josías

naṣacu tátá Jeconías xih̄in java ga ñani da. Ta naṣacu da tiempo tá naṭiin soldado na Israel já naṣandaca ñahá da na cán ñuu Babilonia.

<sup>12</sup> Ta tá naṣanduu na Israel ñuu Babilonia cán já naṣacu Salatiel ta tátá Salatiel naṣacu Jeconías. Ta Salatiel naṣacu tátá Zorobabel. <sup>13</sup> Ta Zorobabel naṣacu tátá Abiud ta Abiud naṣacu tátá Eli-aquim ta Eliaquim naṣacu tátá Azor. <sup>14</sup> Ta Azor naṣacu tátá Sadoc ta Sadoc naṣacu tátá Aquim ta Aquim naṣacu tátá Eliud. <sup>15</sup> Ta Eliud naṣacu tátá Eleazar ta Eleazar naṣacu tátá Matán ta Matán naṣacu tátá Jacob. <sup>16</sup> Ta Jacob naṣacu tátá José, da naṣacu yí María. Ta María cúú ñá naṣacu náná Jesucristo, mé a naṣhindahá Ndióxi cacomí a cuéntá sahá ñayivi.

<sup>17</sup> Ña cán quea janda tá naṣasáhá cácu jahyi Abraham janda quiahva naṣinu coo a quiví naṣasáhá cácu jahyi David já naṣaha uxu comi generación. Ta tá quiahva naṣasáhá cácu jahyi David janda quiahva naṭiin na Babilonia na Israel já ñéhe ñahá na cuahan na naṣaha inga uxu comi generación. Ta naṣaha inga uxu comi generación nani naṣanduu na Israel ñuu Babilonia janda quiahva naṣinu coo quiví naṣacu Jesús, mé a naṣhindahá Ndióxi cacomí a cuéntá sahá ñayivi.

### *Tá naṣacu Jesús*

*(Lc. 2:1-7)*

<sup>18</sup> Joho naṣah̄in tá naṣacu Jesucristo: Mé María, ñá cacuu náná Jesús cán sa naṣahan ñá tuhun ñá ña tandaha ñá xih̄in José. Joo tá cámaní coo da xih̄in ñá já naṣandaa ini da ña ñúhu jahyi ñá. Ta ña yóho naṣacu a ña naṣaja ínima yí Ndióxi. <sup>19</sup> Ta

José, da cacuu yí María cán cúú dá da cája ndinuhu ña ndaa. Ta naçahán da ña naçahiin ñá xihín inga dataa joo coó naçeen da çahan núu da saha ñá nuú ñayivi. Saha ña cán quéa nasacu ini da jándacoo jehé da ña. <sup>20</sup> Ta nani cáhvi ini da saha ña caja da anda jáví naquixi in sani nu dá ta nandaca náha in tátō Ndióxi nu dá. Ta tañu mé sani cán naçahan xihín dá. Já naçachi a já:

—José, da naquixi chichi David, a cáyhvi tohún tandahún xihín María jan jáchi naçaja ínima yii Ndióxi ña ñúhu jahyi ñá. <sup>21</sup> Ta tá sa naçacu jahyi María já chicaan ndó quivi á ná cananí a Jesús jáchi jácaçu a ñayivi nuú cuachi tá ná candeé ini na mé á —naçachi a.

<sup>22</sup> Tóco ndihi ña yóho nayaha ña ná xinu coo nuú tuhun Ndióxi ña naçahí in profeta sanahá ndivaha cán ta já naçachi da cán já:

<sup>23</sup> Vaxi quivi cañuhu jahyi in ñá tacú, ñá a ñáha coo ta xihín.

Ta tá sa naçacu jahyi ñá cán já cacu na quivi á cananí a Emanuel.

Ta tuhun yóho cúni cachi a: ín Ndióxi xohō.

<sup>24</sup> Ta tá nandicaxí ini José já naçaja da tá ín naçachi tátō Ndióxi cán xihín dá. Ta já nañandaha dá xihín María. <sup>25</sup> Joo coó naçahiin da xihín ña tá quiahva ín in dataa xihín ñájíhí da janda quiahva cacu jahyi María. Ta tá naçacu a cán já nasacu José quivi á cananí a Jesús.

## 2

### *Tá naçito nihni na ndichí Jesús*

<sup>1</sup> Ta naçacu Jesús in ñuu naní Belén ña ndacaan estado Judea. Ta mé tiempo cán nasacomí rey

Herodes cuéntá sahá nación Israel. Ta mé tañu já naxinu coo java na ndichí ñuu Jerusalén. Mé na ndichí yóho cúu ná na jácuaha xihín quimi ta naquixi na chí nu cána candii. <sup>2</sup> Ta tá naxinu coo na ñuu Jerusalén já nandaca tuhún na ñayivi já nacachi na já:

—Ndájá ín da loho nacacu viti jan, da cacuu rey nuú na Israel. Jáchi naxini nde naqueta quimi nuú nde ta xihin rí yóho sa nacanda ini nde ña sa nacacu da. Ta viti vaxi nde yóho caja cáhnu nde da —nacachi na ndichí cán ndáca tuhún na.

<sup>3</sup> Ta tá naxini joho rey Herodes ña yóho já nacasáhá da ndíhi ndivaha ini da ta quiahva já nacasáhá ndíhi ini tóco ndihi ñayivi ñuu Jerusalén cán. <sup>4</sup> Sahá ña cán quea nacana rey Herodes cán tóco ndihi na sacuahá nuú jutu xihín na jánañá ley Moisés cán. Ta já nandaca tuhún da na saha ndá ñuu cúu nu cáchí tuhun Ndióxi cacu da nasahan Ndióxi tuhun a chindahá a cacomí a cuéntá sahá ñayivi. <sup>5</sup> Já nacachi na cán já xihin dá:

—Ñuu Belén, ña ndácaan estado Judea cán cúu nuú cáchí tuhun Ndióxi cacu da jáchi quiahva já nacahyí in profeta sanahá tá nacachi da já:

<sup>6</sup> Vati ñuu Belén, ña ndácaan estado Judea, cúu á in ñuu loho ndivaha tañu ñuu náhnu cán joo ín sahá a, jáchi tañu ñayivi ñuu cán ndindita in da cacomí cuéntá sahá na Israel, na cúu cuéntá Ndióxi, já nacahyí in profeta sanahá.

<sup>7</sup> Tá nandihí já nacana xóo rey Herodes na ndichí cán ta já nandaca tuhún da na cán saha ndá quivi nanaha quimi cán mé rí nu ná. <sup>8</sup> Anda já

naçindahá da na ñuu Belén. Já naçachi da já xihín ná:

—Cuáhán ndo ñuu Belén cán ta ndaça tuhún vaha ndó ndaja cáa sahá òa loho naçacu òan. Ta tá sa nandiñehe ndó a já quixi ndó çaxi tuhun ndó xihín i já ná çuhun ri yehe va caja cáhnu i ña — naçachi Herodes xihín na.

<sup>9</sup> Ta xihín ña yóho naçquee na ndichí cuahan tucu na. Ta quimi, rí naçini na nu cuití cán já ndáça tucu rí na cuahan na. Ta tá naçinu rí chí nuú ín mé a loho cán anda já naçandichi rí. <sup>10</sup> Ta cáji ndivaha ini na tá xini na mé quimi cán. <sup>11</sup> Tá nandihi já naçihvi na ini vehe já naçini na mé a loho cán xihín María, náná a. Ta já naçaxítí na nu á ta já naçaja cáhnu na ña. Ta tá nandihi já nasuná na yuhú saò ñéhe na ta já najoco na jihun cuáan nuú a xihín jusa vaha xihín in ña támi sahan naní mirra nu mé a loho cán. <sup>12</sup> Tá nandihi já naçixi in sani nu ná ta xihín mé sani cán naçachi Ndióxi xihín ná ña ná a ndícó çoo na chí nu ín rey Herodes. Sahá ña cán quea nandijama na íchi cuánuhu ná ñuu na.

### *Tá ñéhe na Jesús cuahan na Egipto*

<sup>13</sup> Ta tá sa naçquee na ndichí cán cuahan na já naçixi in sani nuú José ta nandaça náha in táto Ndióxi nu dá. Já cáchi a já xihín dá:

—Cuándacoún ndiquehe ña loho òan xihín María, náná a ta cunún çuhun xihín ná chí ñundáhyi nación Egipto. Ta cán coún xihín ná janda quiahva ná çaxi tuhun i xuhun. Jáchi caca nuu Herodes ndinducú da ña loho òan ña cahní ñahá da — naçachi táto Ndióxi cán xihín José.

14 Anda já nandacoo José já naquehe da Jesús xihín María, náná a já naqueta ñuu na cuahan na chí Egipto. 15 Ta cán nasanduu na janda quiahva naxihi Herodes. Tóco ndihi ña yóho nayaha já ná xinu coo nuú tuhun nacachi Ndióxi sanahá tá nacahyi in profeta já: “Nasahin jahyi i nación Egipto ta nacana i da ná ndicó coo da”, cáchi tuhun Ndióxi.

*Tá nasahnda Herodes chuun ña ná cahní na na valí*

16 Ta ndaja coo naxini Herodes cán ña najándahvi na ndichí cán da sahá ña coó naxinu ga na nu dá. Ña cán quéa a juú quiahva naxojo ini da. Ta chí nasahnda da chuun ña ná cahní ndihi na ta valí, na ivi cuia chí ninu, mé na ndúu ñuu Belén xihín ñuu valí catáhan xihin á. Jáchí sa nacaxi tuhun na ndichí cán xihin dá ña naxini na mé quimi anda tátuhun ivi cuia. 17 Ta tá nandihí naxihí na valí yóho já naxinu coo nuú tuhun nacahyi profeta Jeremías sanahá ndivaha tá nacahyi da já:

18 Ñuu Ramá jandá joho ndáhvi tácu

cáyuhú cóhó ñañáha sácu ñá.

Ta ñá sácu yóho cúu ñá Raquel. Sácu ñá sahá jahyi ñá.

Ta co cuni ñá ndico ini ñá jáchí naxihí jahyi ñá, cáchi tuhun Ndióxi.

19 Joo tá sa naxihí Herodes já naquixi tucu sani nuú José nu in da nación Egipto cán. Ta nandaca náha in tátó Ndióxi nu dá já cáchi a já xihin dá:

20 —Cuándacoun ta ndiquehe Jesús xihin María, náná a ta cuahán ndicó coo xihin ná chí ñundahyi Israel. Jáchí sa naxihí va na ndúcú cahní ña loho jan —cáchi tátó Ndióxi.

21 Anda já nandicoo José ta ñéhe da Jesús xihin María, náná a cuahan na ndicó coo na chí ñundáhyi Israel. 22 Joo tá ñañehe da tuhun ña nandicojo Arquelao chuun cacuu da rey nu Herodes, tátá da já nayihví José cuhun da chí estado Judea. Ta sahá ña sa naçaxi tuhun táto Ndióxi tañu sani nu dá sahá ña cán quéa nandijama da íchi ta cuahan da chí estado Galilea. 23 Ta naixinu coo na in ñuu naní Nazaret nuú nasanduu na. Ta xihín ña yóho naixinu coo nuú tuhun naçahyí na profeta sanahá ña cacuu Jesús da ñuu Nazaret.

### 3

*Tá naçasáhá Juan, da jácandúta ñayivi cáhan ndojó da yucú íchí cán*

*(Mr. 1:1-8; Lc. 3:1-9, 15-17; Jn. 1:19-28)*

1 Mé tiempo cán Juan, da jácandúta ñayivi naixinu da yucú íchí cuéntá estado Judea cán. Ta naçasáhá jánaħa da ñayivi. 2 Já cáchí da já xihín ná:

—Xíní ñúhú jándacoo ndó ña núu cája ndó ta ndicó coo ini ndó nu Ndióxi jáchi sa naçayati quivi cacomí Ndióxi cuéntá sahá ñayivi —cáchí da xihín ná.

3 Mé Juan yóho cúu dá da naçahan profeta Isaías saħa tá naçahyí da já:

Vaxi quivi tá çahan cóhó in da tañu yucú íchí ta cachi da já xihín ñayivi:

“Caja tiaħva ndó íchi nuú quixi xitoho í, ta cuná ndó in íchi ndacú nu mé á ña ná ndihvi a ínima ndo”, cáchí tuhun Ndióxi.

4 Ta jáhma nasandixi Juan yóho naçacuu a ña naçavaħa na xihín íji camello ta nasandico in ní jáhnda tóco da. Ta naixi da tica xihín ñuñu yucú.

<sup>5</sup> Ta ñaqueta ñayivi ndúu ñuu Jerusalén xihín na ndúu estado Judea xihín na ndúu ñundáhyi yati yuta Jordán cán ñasaá na nu Juan taa johó na nu cáhan da. <sup>6</sup> Ta tá ñañahma na cuachi na nu Ndióxi já najácandúta Juan na ini yuta Jordán.

<sup>7</sup> Joo tá ñaxini Juan ña janda johó xínu coo cuahá na fariseo xihín na saduceo nu dá ña ná jácandúta da na já ñacasáhá xójo ndivaha ini da ta já ñacachi da já xihín ná:

—Mé ndó cúu ndó tátuhun coo jáchi cúu ndó na quini. Cáhán ndo ña a jándoho ga Ndióxi ini ndó sahá cuachi ndó tá ná candúta ndo vatí cája tá cája ndó cuachi. <sup>8</sup> Xíni ñúhú caja ndó ña vaha já ná cuni ñayivi ña mé a ndaa táhyi najándicoo ndó ña núu ñasacaja ndó jihna. <sup>9</sup> Ta a cáhán ndo ña jácacu Ndióxi ndohó sahá ña cúu ndó na ñaquixi chichi Abraham. Jáchi coo saha toho ña jan nu Ndióxi tá co jándacoo ndó cuachi ndó. Jáchi mé a ndaa ná cáhan i xihín ndó ña janda yuu ndúu nu ñúhu jan cuu caja Ndióxi ña ná nduu a ñayivi quixi chichi Abraham. <sup>10</sup> Mé ndó cúu ndó tátuhun in yító, dó sa ñatiin na hacha cuahan na cahnda na. Ta tóco ndihí yító, dó co sahan cuihi vaha nu, tahnda do ta quee dó nu ñúhu cayi do. Quiahva já caja ri Ndióxi xihín ndó tá co cúni ndó ndicó coo ini ndó nu mé á. <sup>11</sup> Mé a ndaa cája ndúta i ndohó xihín ticuii ta xihín ña yóho náha ña ñandicó coo ini ndó nu Ndióxi. Joo vaxi inga da ta da cán cúu da jándicutú ínimá ndo xihín ínimá yii Ndióxi ta ña cán cacuu a tátuhun ñúhu cayi. Ta da cán ín cuaha chága ndée dá a juú ga yehe. Ta chí coo sahá i ndica xití i nu dá ña ndaxí i correa ndusa da. <sup>12</sup> Mé da vaxi cán caxi da ñayivi vaha tañu ñayivi quini. Cúu á tátuhun in dataa tá



jáxixi da trigo xih̄in pala já ná quee xehe á já cacu vaḥa da ña. Ta xehe naçana cân cuḥun a cayi a xih̄in ñúhu ita ña a ndáhva toho —cáchi Juan xih̄in na cân.

### *Tá naçandúta Jesús*

*(Mr. 1:9-11; Lc. 3:21-22)*

<sup>13</sup> Naçquee Jesús chí estado Galilea cuḥan yuta Jordán nu ndácaan Juan jácandúta dá ñayivi ña ná jácandúta da mé á. <sup>14</sup> Joo nu cuítí coo naçeen toho Juan jácandúta dá Jesús. Ña cân quéa naçachi da já xih̄in Jesús:

—Yóhó cúú da ndítahan jácandúta yehe. Ta cáa johó vaḥún yóho ña ná jácandúta i yohó —naçachi Juan cân xih̄in Jesús.

<sup>15</sup> Já nanducú nehe Jesús tuḥun nu dá já naçachi a já xih̄in dá:

—Candehé. Quiahva já ndítahan coo ña yóho viti jáchi ndítahan nu yo jáxinu coo i tóco ndihi ña ndaa ña nasacu ini Ndióxi coo —naçachi a.

Xih̄in ña yóho naçandúsa Juan ta chí najácandúta dá Jesús. <sup>16</sup> Ta tá nandihí naçandúta Jesús já naçqueta ini ticuij cân. Anda já nanuna indivi ta naçini Jesús nanuu ínimá yii Ndióxi jatá ta nasacaa tá quiahva cáa in ndijata. <sup>17</sup> Tá nandihí já naçini johó a cáhan in a indivi ta já cáchi a cân já:

—Yóhó cúún jahyi maní i ta cájii ndivaha ini i xuhun —naçachi a.

## 4

### *Xíto ndojó tiñáhá saçuaḥa Jesús*

*(Mr. 1:12-13; Lc. 4:1-13)*

<sup>1</sup> Tá nandihí já ndáca ínima yíi Ndióxi Jesús cuahān chí yucú íchí nuú cō ndúu ñayivi já ná coto ndojó tiñáhá sacuaḥa mé á.

<sup>2</sup> Ta cán naṣahīin a tixi ivi jícó quivi. Ñuú ta ndiví cōó naḡixi a ta tá nandihí já naḡinu joco nu á. <sup>3</sup> Já naḡayati tiñáhá sacuaḥa nuú Jesús ña coto ndojó ñahá ri já naḡachi rí já xihín á:

—Tá ta jivi ndusa jahyi Ndióxi cúun cahnda chuun ña ná nduu yuu yóho pan —naḡachi rí cán xihín Jesús.

<sup>4</sup> Anda já naḡachi Jesús já xihín rí:

—Já cáchí tuhun Ndióxi: “A juú pan cuití cuxu ñayivi já catacu na, vaḥa. Xíní ñúhú ri a caja na ña sáhdá tuhun Ndióxi nu ná já quea cuu catacu na nu Ndióxi” —naḡachi Jesús xihín rí.

<sup>5</sup> Tá nandihí já ndáca tiñáhá sacuaḥa cán Jesús cuahān xihín rí ñuu Jerusalén, ña yíi cán ta já najándaá rí a nu jícó jiní veñuhu cáhnu ndácaan cán. <sup>6</sup> Ta já naḡachi rí já xihín á:

—Tá ta jivi ndusa jahyi Ndióxi cúun jácana mún chí ninu jáchi já cáchí tuhun Ndióxi:  
Cahnda Ndióxi chuun nu tátó mé á ña ná candaa na yohó.

Ta ndinehe ndáha na yohó,  
já quea ná a ndicuehe saḥun tá ná cachihin saḥun  
xihín yuu, já cáchí tuhun Ndióxi —naḡachi  
rí xihín Jesús.

<sup>7</sup> Ta já nanducú nehe Jesús tuhun nu rí já naḡachi a já xihín rí:

—Cáchí tucu tuhun Ndióxi já: “A cóto ndojó tohún Ndióxi, xitohún” —naḡachi Jesús xihín rí.

<sup>8</sup> Ta tá nandihí já ndáca tucu tiñáhá sacuaḥa cán Jesús naṣaḥan xihín rí in jini yúcu jícó ndivaha. Ta já nanaḥa rí ndaja táhan ñuu ndúu ñuyíví nu á ta najánaḥa rí tóco ndihí ña náhnu ndúu cán nu á. <sup>9</sup> Ta já naçachi tucu rí já xihín Jesús:

—Tóco ndihí ña yóho quiahva i nuun tá ná caxítún nuú i caja cáhnún yeḥe —naçachi rí quini cán xihín Jesús.

<sup>10</sup> Anda já naçachi Jesús já xihín rí:

—Satanás, cuáhán caxoo jáchi já cáchi tuhun Ndióxi: “In túhún Ndióxi, xitohún ndítahan caja cáhnún ta in túhún mé á ndítahan caja ndívún nuun” —naçachi Jesús xihín rí cán.

<sup>11</sup> Tá nandihí já naçaxoo tiñáhá sacuaḥa cán cuaḥan ri. Ta já naxinu java táto Ndióxi chindeé na Jesús.

*Tá naçasáhá cáxi tuhun Jesús tuhun Ndióxi nuú na estado Galilea*

*(Mr. 1:14-15; Lc. 4:14-15)*

<sup>12</sup> Tá nanehé Jesús tuhun ña nachicaan na Juan, da jácandúta ñayivi vecaa já naquee a cán cuaḥan chí estado Galilea. <sup>13</sup> Joo coó naçandoo a ñuu Nazaret chí naquee a cuaḥan coo a chí ñuu Capernaum ña ndácaan yuhú tañuhú, dó ndácaan ñundáhyi cuéntá na naquixi chichi Zabulón xihín na naquixi chichi Neftalí. <sup>14</sup> Tóco ndihí ña yóho nayaḥa ña ná xinu coo nuú tuhun naçahyí profeta Isaías sanahá tá naçahyí da já:

<sup>15</sup> Ñayivi ndúu ñundáhyi Zabulón xihín na ndúu ñundáhyi Neftalí,  
ñá ñúhu inga xoo yuta Jordán yati yuhú tañuhú,

ta jári n̄a ndúu Galilea, mé estado n̄u ndúu ñayivi,  
n̄a c̄o cúu ch̄ichi Israel,

16 mé n̄a cán nasanduu na nuú naá ndivaha ta viti  
naxini na in ñaha yehe ndivaha.

Jándiyeh̄e á n̄u ná ña ná a quívi n̄a,  
joo catacu na anda ama cáa quívi n̄u ín Ndióxi,  
naçahyí Isaías sanahá.

17 Ta chí mé tiempo já naçasahá Jesús cáhan  
ndojó a nuú ñayivi ta já cáchí a já xih̄in ná:

—Xíní ñúhú jándacoo ndó cuachi cája ndó ta  
ndicó c̄o ini ndó n̄u Ndióxi jách̄i sa naçayati quívi  
cacomí a cuéntá sahá ñayivi —naçachi Jesús.

*Tá cána Jesús comí da tává tiyacá ña ná caca tuun  
da xih̄in á*

*(Mr. 1:16-20; Lc. 5:1-11)*

18 Tá xíca Jesús cuahan yuhú tañuhú Galilea,  
nandinehé a ivi taa, da cúu ñani. In da naní Simón  
ta cáhan n̄a Pedro xih̄in dá. Ta da inga cán naní  
da Andrés. Ndívi da yóho cúu dá da tává tiyacá  
ta ñúhu na jácana na ñunu ná ini tañuhú cán. 19 Já  
naçachi a já xih̄in ndívi da:

—Naha quíi ndó candico ndó yehe caca tuun  
ndó xih̄in i. Tává ndó tiyacá viti joo caja i ña ná cuu  
tavá ndo ñayivi tañu cuachi —cáchí a.

20 Ta chí ivi laá najándacoo da ñunu da ta nandico  
da Jesús.

21 Ta nani xíca Jesús cuahan chága chí nuu já  
naxini a inga ivi tucu taa, da cúu ñani. In da naní  
Jacobo ta inga da naní Juan, da cúu jahyi Zebedeo.  
Ta ndívi mé da yóho ñúhu da ini barco da xih̄in tátá  
da ndája vaha da ñunu dá. Ta naçana Jesús ndívi da

yóho. <sup>22</sup> Ta chí ivi laá najándacoo da barco da xihín tátá da ta naçasáhá xíca tuun da xihín Jesús.

*Jánaḥa Jesús nuú cuahá ndivaha ñayivi*  
(Lc. 6:17-19)

<sup>23</sup> Níí cúú estado Galilea naḥica nuu Jesús cáhan tuhun vaḥa nuú ñayivi ini veñuhu in in ñuu cán. Cáxi tuhun a nu ná ña sa nandindaa quiví cacomí Ndióxi cuéntá saḥá ñayivi ñuyiví. Ta nandaja vaḥa Jesús na quíhvi tá nuú cueḥe ndóho na. <sup>24</sup> Ta níí cúú ñundáhyi cuéntá Siria nandicuḥta nuu tuhun saḥá ña cája Jesús. Saḥá ña cán queá néhe na na quíhvi, na ndóho tá nuú cueḥe vaxi na nu á ña ná ndaja vaḥa mé á na ta néhe na na ñúhu ínima quini ini xínu na nu á ta ndijáá na xíhi yihí xihín na quíhvi saḥa néhe na vaxi na nuú Jesús. Ta nandaja vaḥa mé á na.

<sup>25</sup> Ta cuahá ndivaha ñayivi ndíco na Jesús. Cúú ná na naquixi estado Galilea xihín na ndúu uxu ñuu cuéntá Decápolis xihín na ñuu Jerusalén xihín na estado Judea xihín na naquixi ñundáhyi chí xoo oriente nu ndácaan yuta Jordán cán.

## 5

*Tá cáhan ndojó Jesús jiní yúcu*  
(Lc. 6:20-23)

<sup>1</sup> Tá naḥini Jesús ña ndíco cuahá ndivaha ñayivi mé á já nandaa jiní yúcu ta já naḥacoo a cán. Ta naḥayati na xíca tuun xihín á nu á. <sup>2</sup> Ta já naçasáhá jánaḥa nu tóco ndihi na ndúu cán já naḥachi a já xihín ná:

3—Tahví n̄acuu ñ̄ayivi tá ndícuni na xíní ñ̄úhú n̄a ñ̄a chindeé Ndióxi n̄a jáchi n̄a cán cúu n̄a cacomí Ndióxi cuéntá saha.

4'Tahví n̄acuu n̄a ndúu cuéha jáchi n̄a cán cúu n̄a quiahva Ndióxi tuhun ndéé ini.

5'Tahví n̄acuu n̄a cō ndíñehe jícó mé jáchi n̄a cán cúu n̄a ñ̄ehe táhvi ndiquehe na ñ̄a nasahan Ndióxi tuhun a quiahva n̄u ná.

6'Tahví n̄acuu n̄a xíca ini caja ñ̄a cúní Ndióxi. Na cán cúu n̄a caja Ndióxi ñ̄a ná x̄in̄u nuú ñ̄a cúu ini na.

7'Tahví n̄acuu n̄a cándáhví ini sahá ñ̄ayivi jáchi n̄a cán cacuu na cándáhví ri ini Ndióxi saha.

8'Tahví n̄acuu n̄a cō ndácaan quini ínima jáchi n̄a cán cúu n̄a cuni Ndióxi.

9'Tahví n̄acuu n̄a ndíhi ini ñ̄a ná coo vaha na xihín ñ̄ayivi jáchi n̄a cán cúu n̄a cáchí Ndióxi cúu ná jahyi mé á.

10'Tahví n̄acuu n̄a ndóho ini sahá ñ̄a cája na ñ̄a sáhdá Ndióxi n̄u ná caja na jáchi n̄a cán cúu n̄a cacomí Ndióxi cuéntá saha.

11'Tahví n̄acuu ndó tá cánahá ñ̄ayivi xihín ndó ta cája xíxi na xihín ndó sahá ñ̄a cándeé ini ndó yehe. Ta tahví n̄acuu ndó tá jácojo na cuachi jíquí jata ndó sahá ñ̄a cándeé ini ndó yehe.

12'Xíní ñ̄úhú cajji ndivaha ini ndó ta coo vaha ini ndó jáchi ndiquehe ndó in ñ̄a vaha ndivaha caja Ndióxi indiví. Xíní ñ̄úhú ndicuhun ini ndó ñ̄a quiahva já nacaja xíxi na xihín n̄a profeta, n̄a nasanduu sanahá.

*Cúu yó tátuhun ñ̄úhu jándiyehē nuú ñ̄ayivi ñ̄uyíví  
(Mr. 9:50; Lc. 14:34-35)*

13 'Mé ndó cúú ndó tátuhun ñijí yívi na. Sa xíní ndó ña cája ñijí ña ná ndihají ñaha xíxi ndó. Ta quiahva já cája ndó xihín ñayivi ñuyíví. Joo tá ná ndihi ña ohva ñijí cán a cúu ga ndicó coo a cahohva tucu a sahá ña cán quea jandá cuíta va íchi cuanì nihni ñayivi ña jáchi coó chuun toho a.

14 'Jári mé ndó cúú ndó tátuhun ñúhu jándiyehé nuú ñayivi ndúu ñuyíví. Ta mé ñúhu cán cúú á tátuhun in ñuu cánúu jata in yucú jícó ta a cúu toho ndacaan jehé a. 15 Jáchi co chíñúhu ná in lámpara ta tá nu ndíhí já chíjehé na ña tixi in sato. Ña cája na xihín á quea chinúu jícó na ña já ná jándiyehé a nu tóco ndihi na ndúu vehe. 16 Quiahva já xíní ñúhú ndihi ini ndó caja vaha ndó ña ná cacuu ndó tátuhun in ñúhu cáyi nuú ñayivi. Jáchi tá ná cuni na ña vaha cája ndó já quea cuu caja cáhnu na Ndióxi, tátá yo, ña ín indiví.

### *Jánaħa Jesús saħa ley Moisés*

17 'A juú cahán ndó ña naquixi i ñuyíví yóho ña cacu xóo i ña nasahnda ley Moisés xihín ña najánaħa na profeta, vaha. Co váxi toho i cacu xóo i ña. Vaxi i nu ndó jáxinu coo i tóco ndihi ña cáchí mé ley já ná naħa i nu ndó ndía cúú ndusa ña. 18 Mé a ndaa ná caħan i xihín ndó ña a ndíhi saħa mé ley nani ín indiví xihín ñuyíví yóho. Ni in túhún toho tuhun, a ndíhi saħa janda quiahva ná vaha tóco ndihi ña ndítahan vaha. 19 Sahá ña cán quea ndá na co cúnì caja ña sáhnda ley Moisés vatì cúú á ña loho ndivaha ta ni co cúnì na jánaħa na ñayivi ña ná caja na ña cáchí a já quea cacuu na in na coo cuaha saħa tañu na cacomí Ndióxi cuéntá saħa. Joo na cája ña cáchí mé ley ta jánaħa na ñayivi ña ná

caja na ña, mé na cán cacuu na na cáhnu ndivaha tañu na cacomí Ndióxi cuénta saha. <sup>20</sup> Mé a ndaa ná cahan i xihin ndo ña tá ná caja cuití va ndó tá quiahva cája na jánaha ley Moisés xihin na fariseo já quea a cuú ndihvi ndó nuú cacomí Ndióxi cuénta sahá ñayivi.

*Jánaha Jesús ña co ndítahan cojo ini ñayivi  
(Lc. 12:57-59)*

<sup>21</sup> 'Mé ndó sa xini ndo ña nacachi Moisés xihin tásahnu jícó ndo sanahá tá nacachi da já: "A cáhni ndó ndii jáchi ndá na ná cahni ndii tandaa quivi caja vii jutixia saha ná." <sup>22</sup> Joo yehe cáchi i xihin ndó viti ña ndá na ná caja cuehe xihin ñani táhan na tandaa quivi caja vii jutixia saha ná. Ta jári na cánahá xihin ñani táhan na, á cáchi na cuú ná ñayivi tachi já vaxi quivi tá candichi na nu juéxe cáhnu ta cuu cuhun na indayá sahá.

<sup>23</sup> 'Sahá ña cán quea tá ta ñéhe ndó in ñaha cuahan ndó joco ndó nu náa Ndióxi ta nani cuahan ndo cán ndicuhun ini ndó ña íin in ñani táhan ndó ta co cúní táhan vaha na xihin ndo <sup>24</sup> já quea mé jan yati nu náa ndítahan jándacoo too ndó ña ñéhe ndó joco ndó jan. Ta ndítahan quee ndó cuhun ndó ndique táhan máni ndó xihin ñani táhan ndó cán. Ta tá ná ndihi já cuu ndicó coo tucu ndó nu náa Ndióxi joco ndó ña najándacoo ndó jan.

<sup>25</sup> 'Tá sácú in na saha ndó cuhun ndó vecaa ta cúní na candaca na ndohó cuhun ndó nu juéxe, xini ñúhú nducú ndó ndá quiahva ndique táhan máni ndó xihin ná nani núná nu ndó caja ndó ña. Já quea ná a ndiquiahva na cán ndohó ndáha juéxe jáchi cuu ndiquiahva juéxe cán ndohó ndáha na



policia ta chicao na ndohó vecaa. <sup>26</sup> Mé a ndaa cáchí i xihín ndó ña cañuhu ndó cán janda quiahva ná chahvi ndó tóco ndihi jiuñun yíca ndo.

*Jánaħa Jesús saħa cuachi cája in dataa tá cúní da coo da xihín in ñá co cúú ñájíhí da*

<sup>27</sup> 'Mé ndó sa xíní ndó ña nasahnda ley Moisés chuun sanahá ta já nacachi a já: "Coto a cóo ndó xihín ñájíhí á yí ñani táhan ndó." <sup>28</sup> Joo yehe cáchí i xihín ndó viti ña ndá da sándehe in ñáñaha ta cáhvi núu ini da xihín ña já quea cómí tá cómí da cuachi nu Ndióxi jáchí cúú á tátuhun sa ín da xihín ñá.

<sup>29</sup> 'Ña cán quea cáchí i xihín ndó ña tá nduchú núu cuáha ndó quea jándacava ndohó nuú cuachi, tavá ndó ña jácana xíca ndó ña ná cuñun a jáchí vaha chága ña ná ndihi saħa in nduchú núu ndó a juú ga ña ná cuñun in ní yiquí cuñu ndó ini indayá. <sup>30</sup> Ta tá ndahá cuáha ndó quea caja ña ná ndacava ndó nuú cuachi, chituhun ndó ña ta jácana xíca ndó ña ná cuñun a jáchí vaha chága ná ndihi saħa ndáħa ndo a juú ga ña ná cuñun ní yiquí cuñu ndó ini indayá.

*Jánaħa Jesús ña co ndítahan nuú dataa jándacoo da ñájíhí da*

*(Mt. 19:9; Mr. 10:11-12; Lc. 16:18)*

<sup>31</sup> 'Ta mé ndó sa xíní ndó ña nasahnda ley Moisés chuun sanahá já cáchí a já: "Ndá da cúní jándacoo ñájíhí da ndítahan cavaha da in tutu quiahva da nu ña ta sa ín vaha va cuu jándacoo da ña." <sup>32</sup> Joo yehe cáchí i xihín ndó viti ña ni in túhún toho taa co ndítahan jándacoo da ñájíhí da. Jáchí ndá da jándacoo ñájíhí da cája da ña ná caja ña cuachi tá ná tandaha tucu ñá. Jári da tandaha xihín ña cómí

ri da cuachi nu Ndióxi. Joo tá ná candaa ini da ña íin ñájíhí da xihín inga dataa já quéa cuu ndusa jándacoo da ña.

*Jánaḡa Jesús ña ndítahan caja na tá sáhan na tuhun na nuú ñayivi*

<sup>33</sup> Mé ndó sa xíni ndó ña nasahnda ley Moisés chuun sanahá já cáchí a já: “Xíní ñúhú jáxinu coo ndó tóco ndihi ña nasahan ndó tuhun ndó caja ndó tá tává ndo quivi Ndióxi.” <sup>34</sup> Joo yehe cáchí i xihín ndó viti ña ná quiahva ndó tuhun ndó nuú ñayivi joo a tává ndó quivi ni in ñaha. A tává ndó quivi indivi jáchi indivi cúu nu íin coo Ndióxi. <sup>35</sup> Ta ni a tává ndo quivi ñundáhyi jáchi ñundáhyi cúu nu sáni mé á ta ni a tává ndo quivi ñuu Jerusalén jáchi cúu á ñuu naçaxi Ndióxi, mé á cúu á rey cáhnu ndivaha. <sup>36</sup> Ta ni a tává ndó quivi yiquí jíní ndó tá sáhan ndó tuhun ndó nuú ñayivi jáchi co ndéé ndó ndaja yaa ndó á ndaja tuún ndó ni in túhún ijí jini ndo. <sup>37</sup> Tá sáhan ndó tuhun ndó nuú ñayivi xíní ñúhú cachi ndó: “Ajan, caja i ña.” Á tá coo xíní ñúhú cachi ndó: “Uhun, a cuú caja i ña.” Jáchi tá cachi ndó inga tuhun já caja ndó ña cúni ña quini.

*Jánaḡa Jesús ña ndítahan caja cáhnu ini saḡa táhan ñayivi*

*(Lc. 6:29-30)*

<sup>38</sup> Mé ndó sa xíni ndó ña nasahnda ley Moisés chuun sanahá já cáchí a já: “Tá quiahva cája ñayivi xuhun quiahva já caja ri yóhó va xihín ná. Ta tá ná cani in da nduchú núún já quéa ndítahan cani mún nduchú núú da. Tá ná tavá da nuhún já ndítahan nuun tavá ri yóhó va nuhú da”, cáchí ley Moisés. <sup>39</sup> Joo yehe cáchí i xihín ndo viti: A cája ihvi ndó

xihín ñayivi, na cája núu xihín ndo. Ta ndá na ná cani in xoo sajóho ndó, cata ñee ndó inga xoo sajóho ndó nu ná ña ná cani na a. <sup>40</sup> Ta tá cúní in na candaca na ndohó cuhun ndó nu juéxe sahá ña cúní na candaa na cotó ndo já quea quiahva ndó ña nu ná ta janda cotó ndéé ndo quiahva ndó nu ná. <sup>41</sup> Ta tá vaxi in soldado nu ndó ta tá cahnda da chuun ña ná cojo ndó ñaha da in kilometro, xíní ñúhú cojo ndó ña anda ivi kilometro cuhun ndo. <sup>42</sup> Ta ndá na ná caça in ñaha nu ndó quiahva ndó ña nu ná. Ta ndá na xíca too ñaha nu ndó, quiahva too ndó ña nu ná.

*Xíní ñúhú quihvi ini na co cúní mí  
(Lc. 6:27-28, 32-36)*

<sup>43</sup> Mé ndó sa xíní ndo ña nasahnda ley Moisés chuun sanahá já cáchí a já: “Quihvi ini ndó na xíní táhan vaha xihín ndó ta candají ndó na co cúní táhan xihín ndo”, cáchí ley Moisés. <sup>44</sup> Joo yehe cáchí i xihín ndo viti: Ndítahan quihvi ini ndó na co cúní táhan xihín ndó. Ta cahan vaha ndó xihín na canahá xihín ndó. Ta caja vaha ndó xihín na candají ndohó. Ta caça tahví ndó nu Ndióxi sahá na cája xíxi xihín ndo. <sup>45</sup> Jáchi xihín ña yóho náha ña cúu ndó jahyi Ndióxi, tátá yo, mé á in indiví. Ta mé á cája ña ná cana candii jatá ñayivi quini xihín jatá ñayivi vaha. Ta mé á jácuun javi jatá ñayivi ndaa xihín jatá na co cája vaha. <sup>46</sup> A cáhán ndo ña caja Ndióxi cuahá ñamaní xihín ndo tá quihvi ini cuití ndó na quihvi ini ndohó va jáchi janda ñayivi quini, na jataca jjuhún cuéntá impuesto cája na já. <sup>47</sup> Ta a cáhán ndo ña naja ndó cuahá ña vaha tá ná cahan Ndióxi cuití ndó xihín ñani táhan ndó jáchi

jaṇḁa ñayivi co xíní Ndióxi cája na já. <sup>48</sup> Xíní ñúhú caja ndaa ndó xihín tóco ndihi ñayivi tá quiahva cája ndaa Ndióxi, tátá yo, mé a ín indiví —ñacachi Jesús.

## 6

### *Jánaḁa Jesús ña ndítahan chindeé yo na ndahví*

<sup>1</sup> Já ñacachi tucu Jesús já:

—A ndúcú ndó caja vaḁa ndó nuú ñayivi saḁá ña ná cuni táhyí na ña cája ndó já candoo vaḁa ndó nu ná. Jáchi tá ná caja ndó já coó toho ñaha ñehé táhvi ndó nu Ndióxi, tátá ndo ín indiví. <sup>2</sup> Saḁá ña cán quéa tá chindeé ndó ñayivi, na ndímaní ñaha nuu, a cáca nuu ndó caḁan lánda ndó ña nuú ñayivi tá quiahva cája na co cúú ná tá quiahva ndaa na. Jáchi na cán saḁan na ñaha nuú na ndahví ini veñuhu xihín nu táca ñayivi íchi já ná cuu cuni táhyí tóco ndihi ñayivi ña vaḁa cája na. Jáchi na cán cúní na ña ná caja cáhnu ñayivi na. Mé a ndaa cáchí i xihín ndó ña sa yahvi na cúú mé ña cája cáhnu ñayivi na. <sup>3</sup> Ña ndítahan caja ndó tá chindeé ndó na ndímaní ñaha nuu quéa caja ndó ña ná a cándaḁa ini ni in ñayivi ña cája ndó <sup>4</sup> ta xíní ñúhú caja jehé ndó ña. Ta Ndióxi, tátá ndo sándeḁé a ña vaḁa cája ndó xihín ñayivi ta mé á quéa chaḁvi a saḁá ña cája ndó jan.

### *Jánaḁa Jesús ñayivi ndaja caḁa tahví na nu Ndióxi (Lc. 11:2-4)*

<sup>5</sup> Tá xíca tahví ndo nu Ndióxi a cája ndó tá quiahva cája na co cúú ná tá quiahva ndaa na jáchi cátoó na candita na veñuhu xihín cáyé ña caḁa tahví na nu Ndióxi ña ná cuni táhyí ñayivi na. Mé

a ndaa ná cahan̄ i xih̄in ndo sa yahvi na cúu mé ña xíní ñayivi na. <sup>6</sup> Joo ndóhó, tá xícā tahví ndó nu Ndióxi, tátá ndō ín̄ indiví ndítahan̄ quih̄vi ndó ini vehe ndó ta chicaji tuun ndó yéhé a ta jan̄ cuu cacā tahví jehé ndō nu Ndióxi. Jáchī jan̄ ín̄ Ndióxi, tátá ndō xih̄in ndō taa joho a nu cáhan̄ ndō ta caja mé á ñaman̄i xih̄in ndó.

<sup>7</sup> Ta tá xícā tahví ndó nu Ndióxi, a cáhan̄ tucu tucu ndó mé tuhun̄ ña coō sahā jáchī ñayivi, na co xíní Ndióxi cán cája na já. Ta cáhan̄ na táa joho Ndióxi na sahá ña cuahā cáhan̄ na joo a juú ña ndaa. <sup>8</sup> Joo a cája ndó tá quiahva cája na cán jáchī Ndióxi, tátá ndō sa xíní va mé á ndá queā xíní ñúhú ndō jandā tá caman̄i cacā ndó ña nu á. <sup>9</sup> Ña yóho queā ndítahan̄ cachi ndó tá xícā tahví ndó nu Ndióxi:

Tátá Ndióxi, ña ín̄ indiví,  
cáhn̄u ná cacuū quiv̄i ndó.

<sup>10</sup> Ná tandaa quíī quiv̄i cacomí ndó cuéntá sahá nde.

Ta ná coo tá ín̄ cúní mé ndó coo ñuyiví yóho tá quiahva ín̄ indiví cája ndó.

<sup>11</sup> Quiahva ndó nuú nde ña ndímaní nuú nde cuxu nde in in quiv̄i.

<sup>12</sup> Caja cáhn̄u ini ndó sahá cuachi nde tá quiahva cája cáhn̄u ini mé nde sahá ña núu cája ñayivi xih̄ín nde.

<sup>13</sup> Ta a quiahva ndó ñaman̄i ña ná coto ndojó tiñáhá sacuaahā ndehē já ná a cája nde cuachi nu ndó.

Jáchī cómí ndó cuéntá sahā tócō ndihi ñayivi,  
ta cúu cája ndó tócō ndihi ñaha,  
ta cáhn̄u cúu mé ndó andā ama cáa quiv̄i.

Já ná coo, quiahva já cachi ndó tá xíca tahví ndó nu Ndióxi.

14 Jáchí tá cája cáhnu ini ndó sahá ña núu cája inga na xihín ndo já queá caja cáhnu ri ini Ndióxi, tátá ndo, mé a íin indiví sahá ndo. 15 Ta tá co cúni ndo caja cáhnu ini ndó sahá ña núu nacaja inga na xihín ndo já queá a cája cáhnu ini Ndióxi sahá cuachi cája ndó.

*Jánaḡa Jesús ndaja ndítahan caja na tá cajuhun na*

16 Tá cajuhun ndó a cája ndó tá quiahva cája na co cúu ná tá quiahva ndáa na. Na cán cúni na ña ná cuni táhyí tóco ndihi ñayivi ña xijuhun na sahá ña cán queá cája cueḡa nuu na já ná ndiñehe jíco ñahá na. Mé a ndaa cáchí i xihín ndo ña sa yahvi na cúu ña xíní ñayivi na. 17 Joo ndóhó, tá ná cajuhun ndó ndítahan cuchú nuú ndo ta ndaja vií ndó mé ndó. 18 Já queá ná a cúni ñayivi ña xijuhun ndó ta in túhún Ndióxi, tátá ndo, mé a íin tuun xihín ndó cándaḡa ini ña mé a ndaa xijuhun ndó ta mé á queá chahvi a sahá ña cája ndó jan.

*Indiví cúu nu ndítahan ndaja tútú ñayivi ña vaḡa (Lc. 12:33-34)*

19 'A ndúcú ndó játaca cuḡhá ndivaha ndó ña cuícá canduu nu ndo ñuyíví yóho jáchí yóho cúu nu quíhvi tíquijí ñaha ndó jándihi rí sahá ta já tíví ndihi ñaha ndó. Ta jári cuu quíhvi ta cuíhná caja cuíhná da ña. 20 Vaḡa cháḡa ná játaca ndó ña vaḡa indiví jáchí cán coo quíhvi toho tíquijí jándihi rí sahá ñaha ndó. Ta mé cán ni in ñaha co tíví ta ni ta cuíhná a cúu ndíhvi caja cuíhná. 21 Jáchí nuú nandaja tútú ndo ña ndáyahvi nu ndó, cán coo ri ínima ndo.

*Nduchú núú yọ cúú á tátuhun lámpara ña jándiyehẹ nu xíca í*  
(Lc. 11:34-36)

<sup>22</sup> 'Nduchú núú yọ cúú á tátuhun in lámpara jándiyehẹ nu yó já xíní yọ nu xíca í. Ta tá tívi vaha nduchú núú yọ já cuu candehé vaha í nu xíca í.  
<sup>23</sup> Joo tá cọ tívi nduchú núú yó já quéa xíca yó nu naá ndivaha. Ta tá cáhán yọ ña cúú yó na xíca nu yéhe ndivaha ta cáa ví yó cája í cuachi já quéa cúú yó tátuhun na xíca nu naá ndivaha.

*In ñaha cúú Ndióxi ta inga ñaha cúú jiuhún*  
(Lc. 16:13)

<sup>24</sup> 'Ni in túhún ñayivi a cúu caja chúun nuú ivi xitoho na jáchi candají na in xitoho na ta inga xitoho na quihvi ini chága na. Á tá cọó ta caja ndívi vaha na chuun nuú in xitoho na ta inga na cán a cája chúun vaha na nuu. Ta quiahva já íin ri xihin ndóhó va jáchi a cúu caja cáhnu ndó Ndióxi tá chínúu ndó ínimá ndó jatá jiuhún ndo.

*Ndáa Ndióxi na cúú cuéntá mé á*  
(Lc. 12:22-31)

<sup>25</sup> 'Candehé ndo ña cáhan i xihin ndó yóho: A ndícani ini ndó sahá ña cuxu ndó ta ni sahá ña coho ndó ña catacu ndó in in quivi. Ta ni a ndícani ini ndó sahá jáhma candixi ndó. Jáchi tá tácu ndo, ña jan cúú ña cáhnu chága a juú ga ña cuxu ndó. Ta íin chága sahá yiquí cuñu ndó a juú ga jáhma ndíxi ndó jan. <sup>26</sup> Candehé ndó laa ndáchí nu táchi jan: rí jan ni cọ xútu rí ta ni a vája sáhan rí jáquee rí ta ni cọ yáca rí nu táán vaha rí nuní rí. Ta Ndióxi, tátá ndo, mé a íin indiví sáhan ña xíxi rí jan nu rí. Á cọ xíní ndó ña íin chága sahá mé ndó a juú ga laa cán.

Sahá ña cán quēa quiahva mé á ña xíní ñúhú ndó catacu ndó. <sup>27</sup> Ta coó saha toho ña ndícani nahá ini ndó jáchi a cuú ndaja jícó ndó mé ndó java metro chága sahá ña ndicani ini ndó.

<sup>28</sup> Ta ni co ndítahan ndicani ini ndó saha jáhma candixi ndó. Candehé ndo ndá quiahva ndató sáhnú itá yúcu. Mé ita jan ni co cája chúun a ta ni co cávaha jáhma á. <sup>29</sup> Joo mé a ndaa ná cahan i xihín ndo ña ñúchí chága ita yóho nacaja Ndióxi a juú ga jáhma vaha ndivaha nasandixi rey Salomón sanahá, da nasahiin cuahá ñaha cuíca. <sup>30</sup> Candehé ndó ndaja ndaa vaha Ndióxi yucu ita vatí ín tóo a viti ta itaan cáyi a jándihi sahá. Ndaja ga ví caja Ndióxi xihín ndóhó ña quiahva mé á tóco ndihi ña xíní ñúhú ndó catacu ndó. Joo mé ndó co cándúsa ndó ña candaa mé á ndohó. <sup>31</sup> Ña cán quēa a ndícani ini ndó saha ndá ña cuxu ndó á sahá ña coho ndó á sahá ña candixi ndó. <sup>32</sup> Jáchi na co xíní íchi cuéntá Ndióxi, na cán cúu na ndícani cuahá ini saha tóco ndihi ña yóho. Joo cúu ndó cuéntá Ndióxi, tátá ndo ín indiví ta xíní vaha mé á ña ndímaní nu ndó catacu ndó. <sup>33</sup> Joo ndítahan nu ndó ndiquiahva ndó mé ndó ndáha Ndióxi ña ná cacomí mé á cuéntá saha ndó ta já quiahva mé á ña ndímaní nu ndo catacu ndó. <sup>34</sup> A ndícani ini ndó sahá ña quixi nu ndó inga quiví itaan jáchi Ndióxi cuití va xíní a ndía vaxi nu ndó quiví itaan ta coó sahá ndicani ini ndó sahá ña ndoho ndó itaan.

## 7

*Co ndítahan candehé ndaa yó ñayivi  
(Lc. 6:37-38, 41-42)*



<sup>1</sup> 'A cándehé ndaa ndó ñayivi já ná a cándehé ndaa Ndióxi ndohó. <sup>2</sup> Jáchi tá quiahva cája ndó xihín inga ñayivi quiahva já caja ri Ndióxi xihín ndohó va. Sahá ña cán quéa tá quiahva sándehe ndaa ndó ñayivi quiahva já caja ri Ndióxi xihín mé ndó. <sup>3</sup> Jáchi ndá cuénta quéa sándehe ndó ña núu cája ñani táhan ndó ta cō sándehe ndo ndá quiahva náhnu chága ña núu cája mé ndó. Cúu á tátuhun ndácaan in xehe loho nduchú núu ñani táhan ndó nani ndácaan in yító ndúhu cáhnu ini nduchú núu ndo. <sup>4</sup> Ta tá a cuú cuni ndó yitó cáhnu ndácaan ini nduchú núu mé ndó ndaja caja ndó cachi ndó xihín ñani táhan ndó: “Ñani i, ná tavá loho i xehe ndácaan nduchú núu jan.” <sup>5</sup> Jándahvi ndó mé ndó xihín ña cája ndó. Xíní ñúhú tavá ndó yító cáhnu ndácaan nduchú núu mé ndó jan já ná nuna nu ndó cuni vaha ndó já ná cuu tavá ndó xehe loho ndácaan nduchú núu ñani táhan ndó.

<sup>6</sup> 'A quiahva ndó ña yii cuénta Ndióxi nuú ñayivi quini. Jáchi tá cája ndó já cúu á tátuhun tá ná quiahva ndó ñaha yii nuú tina ta tiahva náá ndicó cōo rí tiin rí ndohó. Ta jári cúu á tátuhun tá ná quiahva ndó ñaha yahvi ndivaha tátuhun perla nu cóchí jáchi cuu cuani nihni rí ña.

*Ndaja caja í cacā í ñamaní nu Ndióxi  
(Lc. 11:9-13; 6:31)*

<sup>7</sup> 'Ndá ñaha ndímani nu ndó xíní ñúhú cacā ndó ña nu Ndióxi ta já quiahva mé á ña nu ndo. Ndin-ducú ndó ña cúní ndo ta ñehe ndó ña caja Ndióxi. Cúu á tátuhun catí ndáha ndo yéhe ta já nuna yéhe nu ndo. <sup>8</sup> Jáchi na xíca in ñaha, na cán cúu na ñehe va. Ta na ndúcú ñaha, na cán cúu na ndíñehe ña.

Ta n̄a cáti ndáha yéhé, n̄a cán cúu n̄a ndínuna yéhé nuu.

<sup>9</sup> Ta ndá ndó, n̄a ndúu jahyi ta tá xíca jahyi ndó pan cuxu a nu ndó, ama cuéhé ri ndó quiahva ndó yuu nu á ña ná caxí a. <sup>10</sup> Ta ama ná quiahva ri ndó in coo nu á caxi tá xíca tiyacá nu ndó cuxu a. Co cája ndó já. <sup>11</sup> Candehé ndó. Vatí mé ndó cúu ndó ñayivi cája cuachi joo xíni vaha ndó quiahva ndó ña vaha nuú jahyi ndó. Ndaja ga ví cája Ndióxi, tátá ndó, mé a ín indivi xihin ndó. Quiahva mé á ña vaha nu ndó tá ná cacá ndó ña nu mé á.

<sup>12</sup> Candehé ndó. Tá quiahva cúni ndó caja ñayivi xihin ndó quiahva já ndítahan caja ri ndóhó va xihin ná jáchi ña yóho quéa sáhdá ley Moisés xihin ña nacyhyí n̄a profeta caja ndó.

*Yéhé táhán cúu nuú quihvi n̄a cuhun indivi  
(Lc. 13:24)*

<sup>13</sup> Cúu á tátuhun ín ivi yéhé. In yéhé cúu á ña táhán ndivaha ta xíni ñuhú ndinducú ndó ndihvi ndó cán. Jáchi inga yéhé cúu á ña ndíca ndivaha nuú ndihvi na cuhun indayá. Ta cuahá ndivaha ñayivi cúu n̄a xíca íchi ndíca cuahan n̄a indayá nuú ndihi saha ná. <sup>14</sup> Joo ña cúu íchi ña ndáca ñayivi yéhé táhán nu ndihvi na indivi cúu á ichi táhán ndivaha ta yáncá ndivaha caca nuu í nu á. Ta chá ndivaha cúu n̄a ndihvi cán.

*Xihín cuhi cúun nuú in yító cuu ndicuní ndá yító  
cúu dó  
(Lc. 6:43-44)*

<sup>15</sup> Cuéntá coo ndó xihin n̄a tuhún, n̄a cáchi cáhan n̄a cuéntá Ndióxi jan. Jáchi uun ndivaha cásaá n̄a nu ndó. Joo cúu ná tátuhun ndivahyí

quini ndivaha vatí náha na tátuhun ndicachi loho. <sup>16</sup> Cúú ndicuni ndó na xihín ña cája na. Jáchí ñayivi quini cō cája vaha toho na. Cúú á tátuhun tá a cuú cuun uva nuú tohíñú ta ni a cuú jáquee ndó titó ñuhú nuú tohíñú. <sup>17</sup> Ña cán quea tóco ndihi yitó vaha ndinuhu cuihi vaha cuití cúun nu do. Joo yitó quini ndinuhu cuihi quini cuití cúun nu do. <sup>18</sup> Dó cúú yitó vaha cán a cúu toho cana cuihi quini nu do ta ni yitó quini cán a cúu cuun cuihi vaha nu do. <sup>19</sup> Ta tóco ndihi yító, dó cō cána cuihi vaha nuu, tahnda do ta quee dó nu cándaha ñúhu ña cayi do. <sup>20</sup> Sahá ña cán quea xihín ña cája ñayivi já cuu ndicuni ndó á cúú ná ñayivi vaha á cúú ná na quini.

*A juú ndihi toho ñayivi ndihvi na nuú cacomí Ndióxi cuéntá saha ná (Lc. 13:25-27)*

<sup>21</sup> 'A juú ndihi toho na cáchi cúú yehe xitoho na cuhun na nuú cacomí Ndióxi cuéntá saha ná. Na cája ña sáhdá Ndióxi, tátá i, mé a iin indivi na cán cuití cúú na cacomí mé á cuéntá saha. <sup>22</sup> Jáchí tá ná xinu cōo quivi caja vii Ndióxi sahá ñayivi já quea casahá cahan cuahá ndivaha ñayivi xihín i ta já cachi na já: “Jesús, mé ndó cúú xitoho nde ta xihín quivi mé ndó naxica nuu nde cahan nde tuhun Ndióxi xihín ñayivi ta xihín quivi mé ndó natavá nde rí quini nasañuhu ínima ñayivi ta xihín quivi mé ndó nacaja cuahá ndivaha nde ña xitúhún”, cachi na xihín i. <sup>23</sup> Ta anda já nducú ñehe e tuhun nu ná já cachi i já xihin ná: “Cō xini toho i yo cúú ndóhó. Caxoo ndó nuú i jáchi ndinuhu ña quini cája ndó”, cachi i xihin ná.

*Sácú Jesús quiahva sahá ivi da nacavaḥa vehe  
(Mr. 1:22; Lc. 6:47-49)*

<sup>24</sup> Ndá na xíní joho ña cáhan i ta cája na ña, na cán cúú ná tátuhun in dataa, da íin xíní túni ta nacavaḥa da vehe da jaṭa in tóto. <sup>25</sup> Ta tá naxinu javi já nasahnu yuta ta naxinu tachí quíni jatá vehe cán joo coó nandicava vehe da jáchi tóyíí cándichi vehe da jaṭa tóto cán. <sup>26</sup> Joo na xíní joho nu cáhan i ta co cája na ña, na cán cúú ná tátuhun in dataa, da co xíní túni ta nacavaḥa da vehe da nuú ñutí. <sup>27</sup> Tá nandihí já naxinu javi já nasahnu yuta ta naxinu tachí quíni jatá vehe cán. Anda já nandicava vehe da ta chí nandihí saḥa chí uun — nacachi Jesús jánaḥa ñayivi.

<sup>28</sup> Ta tá nandihí nacahan Jesús ña yóho já tóco ndihí ñayivi nacatóntó na xíní joho na ndá quiahva jánaḥa mé á <sup>29</sup> jáchi tá jánaḥa mé á nu ná cáhan tá quiahva cáhan in da íin saḥa cahnda chuun ta co cáhan toho a tá quiahva cája na jánaḥa ley Moisés.

## 8

*Tá nandaja vaha Jesús in da ndóho cueḥe táhyi  
(Mr. 1:40-45; Lc. 5:12-16)*

<sup>1</sup> Tá nanuu Jesús jaṭa yúcu nuú nasanúu a cán já ndíco cuahá ndivaha ñayivi jatá cuahan. <sup>2</sup> Ta ndaja coo já nacayati in dataa, da ndóho cueḥe táhyi nu á. Ta já nacaxítí da nu á já nacachi da já xihín á:

—Cuu ndaja vaha ndó yeḥe, xitoho i tá cúni ndó —nacachi da xihín Jesús.

<sup>3</sup> Tá nandihí já nacani ndaa ndáḥa Jesús da já nacachi a já xihín dá:

—Cúni ña ná ndivahún ña cán quéa nandivahún viti —cáchi a xihín dá.

Tá ñacachi Jesús já chí ivi laá nandindaa cuehe táhyi nandoho da cán. <sup>4</sup> Anda já ñacachi Jesús já xihín dá:

—Candehé. A cáxi tuhun tohún ña yóho xihín ni in túhún ñayivi. Cuáhán ndacún nahun mún nuú jutú. Ta ndítahan jocún ñaha nu Ndióxi tátuhun sáhdá ley Moisés sanahá caja na sa nandivaha. Já ná candaá ini tóco ndihi ñayivi ña sa nandindaa va cuehe nasandohún —ñacachi Jesús xihín da cán.

*Tá nandaja vaha Jesús in da caja chuun nuú in jefe soldado*

*(Lc. 7:1-10)*

<sup>5</sup> Tá nandihvi Jesús ñuu Capernaum já ñacayati in da sáhdá chuun nuú soldado naquixi ñuu Roma nu Jesús jáchi cúni da caça da in ñamaní nu á.

<sup>6</sup> Já ñacachi da já xihín á:

—Á co cúni ndó caja ndó ñamaní ndaja vaha ndó mozo i, datacú jáchi cándúhu da vehe quíhvi da naxihí tuchu yiquí cuñu da ta a juú quiahva cáhíhvi yiquí cuñu da —ñacachi da cán xihín Jesús.

<sup>7</sup> Já ñacachi Jesús já xihín dá:

—Vaha va, cuhun i ndaja vaha i da —ñacachi Jesús.

<sup>8</sup> Anda já ñacachi tucu da sáhdá chuun nuú soldado cán já xihín Jesús:

—Candehé ndó. Coó saha toho yehe ña ná ndihvi ndó vehe e. Joo cahnda cuití ndó chuun janda nu íin ndó yóho ta já ndivaha va mozo i.

<sup>9</sup> Jáchi ndúu java na náhnu chága sáhdá chuun nuú

i. Ta ndúu ri soldado sáhndá ri yehe va chuun nuu. Ta tá chíndahá i in da ña ná cuhūn da nu cūni mí i cuhūn da ta cuahān da. Ta tá sáhndá i chuun nuú inga da ña ná quixi da nuú i ta vaxi da nuú i. Ta tá sáhndá i chuun nu mozo i ña ná caja da ña sáhndá i ta cája da ña —ñacachi da cán.

<sup>10</sup> Tá naxini johō Jesús ña yóho já ñacatóntó a já ñacachi a já xihín na ndíco cuahān cán:

—Mé a ndaa ná cahan i xihín ndo ña a ñaha cuni i tañu na Israel in da cādeé cáhnu nahá ini Ndióxi tá quiahva cādeé cáhnu ini da yóho Ndióxi.

<sup>11</sup> Candehé ndo ná cahan i xihín ndo ña quixi ñayivi ndijáá ní cúu saha ñuyívi ta cacōo na cuxu na xihín Abraham ta xihín Isaac ta xihín Jacob indivi nu in Ndióxi cómi a cuéntá sahá ñayivi.

<sup>12</sup> Joo cuahá na Israel, na nanditahan nuu coo cán a cóo toho na cán. Ña caja Ndióxi xihín na cán quēa cuīta na jata véhe cuhūn na nuú naá ndivaha. Ta cán cuacu ndivaha na jandā quiahva chicáhñá mé nuhu ná —cáchi Jesús.

<sup>13</sup> Tá nandihī já ñacahan tucu Jesús xihín da sáhndá chuun nuú soldado cán já ñacachi a já xihín dá:

—Cuanúhu vehún. Nandivaha mosún tá quiahva cūnūn jáchi ñacandúsún yehe —ñacachi Jesús xihín dá.

Chí mé hora já nandivaha mozo da cán.

*Tá nandaja vaha Jesús ña cúu xojo Pedro  
(Mr. 1:29-31; Lc. 4:38-39)*

<sup>14</sup> Naśahan Jesús vehe Pedro ta tá naxinu a cán cándúhu ña cúu xojo Pedro quíhvi ña jáchi chícaan cáhni ndeé ña. <sup>15</sup> Anda já ñatiin Jesús ndáha

ñá quíhvi cán ta chí nandindaa cáhni ña. Ta já nandacoo ñá cán cája ndívi ñá nu ná.

*Tá nandaja vaha Jesús cuahá ndivaha na quíhvi  
(Mr. 1:32-34; Lc. 4:40-41)*

<sup>16</sup> Ta tá nacuaá já ñéhe cuahá ndivaha na na quíhvi xihín na ñúhu ínimá quini ini nuú Jesús. Ta xihín in túhún tuhun nacahan mé á natavá ínimá quini ñúhu ínimá ñayivi ta jári nandaja vaha mé á tóco ndihi na quíhvi. <sup>17</sup> Ta tóco ndihi ña yóho nayaha já ná xinu coo nuú tuhun ña nacahí profeta Isaías tá nacachi da já: “Mé á nandiquehe ndihi a ña cávitá iní ta naxojo ndihi a cuehe yo”, cáhí tuhun Ndióxi.

*Ná cúni candico Jesús  
(Lc. 9:57-62)*

<sup>18</sup> Tá naxini Jesús ña a juú quiahva cándíhi táhan ñayivi ndúu na xihín á já nasahnda chuun ña ná cojo cava na inga xoo tañuhú cán. <sup>19</sup> Joo nacayati in da jánahe ley Moisés nu á já nacachi da já xihín á:

—Maestro, cúni candico i ndohó ndá nacuu nuú cuhun ndo —nacachi da xihín á.

<sup>20</sup> Já nanducú ñehe Jesús tuhun nu dá já nacachi a já xihín dá:

—Ndicuii cúu rí ta vatí íin cáva ñúhu rí. Ta laa cúu rí ta vatí íin táca ñúhu rí. Joo yehe, da nachindahá Ndióxi nduu ñayivi, chí ni nuú cuju mí i coo va —nacachi Jesús xihín dá.

<sup>21</sup> Ta inga da sa xíca xihín á nacachi da já xihín á:

—Maestro, quiahva jihna ndó ñamaní nuú i ña ná cuhun i jánduxu tátá i já quixi i candico i ndohó —ñacachi da xihin á.

<sup>22</sup> Já ñacachi Jesús já xihin dá:

—Xíni ñuhú candicún yehe viti jáchi ná cuhun mé ñayivi, na a ñáha cacu ndaa ínima jánduxu na ndii jan —ñacachi Jesús xihin dá.

*Tá najacátáji Jesús tachí xihín tañuhú tá ndícojo do*

*(Mr. 4:35-41; Lc. 8:22-25)*

<sup>23</sup> Ta ndaja coo ñaquihvi Jesús ini in barco ta cátahan na xíca tuun xihin á cán cuahan na. <sup>24</sup> Ta nani xíca na nuú tañuhú cán cuahan na ta in náá cuití ñaxinu in tachí quíni ndivaha nuú tañuhú cán. Ta a juú quiahva ndeé ñacasáhá ndícojo ticuúí cán janda quiahva nandichutú ticuúí ini barco cán. Joo cándúhu Jesús ini barco quíji va. <sup>25</sup> Anda já ndáva na xíca tuun xihin á cán ñasahan na ndíñehe na ña. Já ñacayuhú na já cáchí na xihin á:

—Chindeé ndó ndehe, xitoho nde. Jáchi cácoo barco cahá tañuhú cuahan do —ñacachi na xihin á.

<sup>26</sup> Anda já nanducú ñehe Jesús tuhun nu ná já ñacachi a já xihin ná:

—Ndá cuéntá quéa yíhvi nahá ndo. Ndá cuéntá quéa co cándeé ini ndó yehe —ñacachi a.

Já nandacoo a ta jánani a tachí quíni cán xihín tañuhú cán ta já ñacátáji uun tóco ndihi a cán. <sup>27</sup> Tá ñaxini na xíca tuun xihin á cán ña yóho já ñacatóntó na ta ñacasáhá ndáca tuhún táhan na já cáchí xihin táhan na já:



—Ta ndá da cúu dataa yóho ña janda tachi xihín tañuhú cándúsa nu cáhan da —cáchi xihín táhan na cán.

*Tá naqueta ivi da ñúhu ínimá quini ini nuú Jesús  
(Mr. 5:1-20; Lc. 8:26-39)*

<sup>28</sup> Tá naxinu coo Jesús inga xoo tañuhú cán nu íin ñundáhyi cuéntá Gadara já naqueta ivi da ñúhu ínimá quini ini tañu nu ndúxu ndii. Ta nacayati da nuú Jesús. Ndívi mé da ñúhu ínimá quini ini yóho cúu dá tátuhun quítj, rí cuehe ndivaha. Sahá ña cán quea ni in túhún ñayivi a cuú yaha chí íchi cán. <sup>29</sup> Tá naxini da Jesús já nacasáhá da cáyuhú da nu já cáchi da já xihín á:

—Ndá cuéntá quea vasún quihvi nuún xihín nde, Jesús, da cúu in túhún jini já jahyi Ndióxi. Á vasún jándoho yachún ini nde tá cámaní yíi ndindaa tiempo ndoho ini nde —nacachi rí quini cán xihín Jesús.

<sup>30</sup> Ta ndaja coo yati cán nasanduu cuahá ndivaha cóchi xixáhan rí. <sup>31</sup> Ta mé rí quini ñúhu ini ndívi dataa cán naxica tahví ri nu Jesús já cáchi ri já xihín á:

—Tá ta ná tavún ndehe ini da yóho, quiahva ñamaní nuú nde ña ná cuhun nde ndihvi nde ini cóchi nduu cáa —nacachi rí xihín Jesús.

<sup>32</sup> Anda já nacachi Jesús já xihín rí:

—Cuáhán ndó, dá já.

Chí naqueta rí quini cán ini ndívi dataa cán já nasahan rí nandihvi rí ini cóchi cán. Ta chí ivi laá xínu tóco ndihi cóchi cán cuahan rí núu rí nu ndáyí yuhú tañuhú cán. Ta najáqueta nuu rí mé rí ini tañuhú chí nacandaa rí ticuí já naxihí ri.

<sup>33</sup> Ta chí a juú quiahva nayihví da ndáá cóchí chí naxinu ndivaha da cuahan da. Ta tá naxinu da ñuu já ñacasáhá da ndícani da ndaja cáa ña nayaha xihin ndíví da ñasañuhu ínima quini ini cán. <sup>34</sup> Andá já ñaqueta tóco ndihi ñayivi ñuu cán cuahan na candehé na Jesús. Ta tá naxini na mé á já naxica tahví na nu á ña ná quee a cuhun a.

## 9

### *Tá nandaja vaha Jesús in da naxihi tuchu saha (Mr. 2:1-12; Lc. 5:17-26)*

<sup>1</sup> Tá sa nayaha tóco ndihi ña yóho já nandaa Jesús jatá in barco ta já naxojo cava inga xoo tañuhú cán janda quiahva naxinu coo a ñuu mé á. <sup>2</sup> Ta cán ñéhe na in da quíhvi, da naxihi tuchu saha ta cándúhu da nu yívi loho ñéhe na ñacasaá na nu á. Ta tá naxini Jesús ndá quiahva cándeé ini da cán mé á já ñacachi a já xihin da quíhvi cán:

—Candehé, jahyi a. A ndícani toho inún jáchi cája cáhnu ini i sahá cuachún viti —ñacachi Jesús xihin dá.

<sup>3</sup> Java táhan da jánaha ley Moisés ñacasáhá da cáhán da já: “Mé da yóho ndája núu da Ndióxi xihin tuhun cáhan da jáchi ni in túhún toho ñayivi a cuú caja cáhnu ini sahá cuachi.” <sup>4</sup> Joo sa ñacandaa ini Jesús ña cáhvi ini da cán sahá ña cán quea nandaca tuhún a da já ñacachi a já xihin dá:

—Ndá cuéntá quea cáhvi núu ini ndó sahá yehe.

<sup>5</sup> Á cáhán ndo ña ihvi chága cachi i xihin da yóho: “Ñacaja cáhnu ini i sahá cuachún viti.” Á tá coo ta cachi i xihin dá: “Cuándacoo ta cuáhán.” <sup>6</sup> Candehé vaha ndo ná nahá i nu ndo ña ín sahá i, da

nachindahá Ndióxi nduu ñayivi caja cáhnu ini i sahá cuachi cája ñayivi ñuyíví yóho —nacachi Jesús xihín dá.

Tá nandihí já nandicañan tucu a xihín da naxihí tuchu saha cán:

—Ta viti cáhan i xuhun cuándacoo ndiquehe xito lohún ta cuanúhu vehún —nacachi Jesús xihín dá.

<sup>7</sup> Chí ivi laá nandacoo da quíhvi cán ta já naquee da cuanúhu dá. <sup>8</sup> Tá naxini ñayivi ndúu cán ña nacaja Jesús yóho já nayihví na ta nacasáhá cája cáhnu na Ndióxi sahá ña nasahan ndée mé á nuú ñayivi ña ná cuu caja na ña xitúhún.

*Tá nacana Jesús Mateo ña caca tuun da xihín á  
(Mr. 2:13-17; Lc. 5:27-32)*

<sup>9</sup> Tá nandihí já naquee Jesús cuahan ta nani xíca cuahan já naxini a in dataa naní Mateo, da ín coo nu sácoo da játaca jiuhún cuéntá impuesto. Ta nacana Jesús da já nacachi a já xihín dá:

—Naha quí candicún yehe.

Anda já nandaca ndichi Mateo ta nacasáhá ndíco da Jesús.

<sup>10</sup> Tá nandihí já ín coo Jesús xíxi a vehe da cán ta cán naxinu coo cuahá táhan na játaca jiuhún cuéntá impuesto xihín java ga ñayivi cája cuachi. Nasacoo na xíxi na xihín Jesús ta cán ndúu coo ri na xíca tuun xihín a cán. <sup>11</sup> Ta tá naxini na fariseo ña ndúu na cán xíxi na xihín Jesús já nacasáhá na ndáca tuhún na na xíca tuun xihín Jesús cán já:

—Ndá cuéntá quéa xíxi xitoho ndó xihín na játaca jiuhún cuéntá impuesto ta xihín java ga na cája cuachi —nacachi na fariseo cán.

12 Joo tá naxini joho Jesús ña yóho já ñacachi a já xihín na fariseo cán:

—Ñayivi íin vaha co xíní ñúhú toho na da cája tátá ñahá joo na quíhvi, na cán cúu na xíní ñúhú da cája tátá ñahá. 13 Ta yehe coo vaxi toho i cana i na sa íin vaha. Vaxi i cana i ñayivi, na cája cuachi ña ná jándacoo na cuachi cája na. Xíní ñúhú cuhun ndo jácuaha vaha ndó ña cúní cachi tuhun Ndióxi tá cáchí a já: “Ña cúní quéa ná candáhví ini ndó ñayivi jáchí vaha chága ña yóho a juú ga ña ná joco ndó quití nuú i”, cáchí tuhun Ndióxi —cáchí Jesús xihín ná.

*Cáhan Jesús ndá saha quéa cajuhun na  
(Mr. 2:18-22; Lc. 5:33-39)*

14 Tá nandihí na xíca xihín Juan, da jácandúta ñayivi cán naxinu coo na nu Jesús. Já ñacasáhá ndáca tuhún na mé á já ñacachi na já xihín á:

—Ndávaha co xíjuhun toho na xíca xihín yóhó nani cuhá ndivaha xíjuhun mé nde xihín na fariseo —ñacachi na cán xihín Jesús.

15 Anda já nanducú ñehe Jesús tuhun nu ná já ñacachi a já xihín ná:

—Á cáhán ndo canduu cuéha na ndúu in vicó tándaha nani íin mé da tándaha cán xihín ná. Uhun. Jáchí cájii ini na. Joo xinú coo quívi candaa na da tándaha cán anda jáví casáhá cajuhun na. Ta cáchí i xihín ndo ña vaxi quívi candaa na yehe nuú na yóho ta anda jáví casáhá na xíca tuun xihín i cajuhun na —ñacachi Jesús.

16 Ta nasacu Jesús inga quiahva nu ná já cáchí a já:

—Ama ná jándaha ñayivi jahmá yatá xihín in túhun jáhma saá jáchi tá nandihí ndíndíí a, sáhndá chága ví a jahmá yatá cán ta jándacáhnu chága ví a yávi ña nandicahmá na cán. <sup>17</sup> Ta ni co táán na vino saá ini voso níi yatá jáchi jácahndi mé vino cán níi ta cuita mé vino cán ta tívi voso níi cája dó. Sahá ña cán quéa ndítahan taán yo vino saá ini voso níi saá ná a ndíhi saha vino xihín voso —cáchi Jesús.

*Tá nandaja vaha Jesús jahyi jíhí Jairo xihín in ña nacani ndaa ndáha jáhma á*  
(Mr. 5:21-43; Lc. 8:40-56)

<sup>18</sup> Ta nani cáhan Jesús cándichi a naxinu coo in da sáhndá chuun nuú na Israel. Já nacaxítí da nu á ta já nacachi da já xihín á:

—Jaca naxihí uun ña loho cúu jahyi jíhí i joo tá ná caja ndó ñamaní quixi ndó vehe e ta chinúu ndó ndáha ndó jata ña já nditacu tucu ña —nacachi da cán xihín Jesús.

<sup>19</sup> Anda já naquee Jesús cuahan xihín da cán ta ndáca na xíca tuun xihín á cán cuahan na. <sup>20</sup> Ta ndaja coo cán ín in ñañáha, ña ndítahví níi ña tíxi uxu ivi cuja. Ta nacayati ña chí jata Jesús já nacani ndaa ndáha ña yuhú jáhma á. <sup>21</sup> Jáchi nacaán ña: “Tá ná cani ndaa cuití ndáha í jáhma Jesús já ndivaha í”, nacaán ña. <sup>22</sup> Joo nandicoto nihni jata Jesús nu ña ta tá naxini a ña já nacachi a já xihín ña:

—A cáyhíví tohún, jahyi a. Nandivahún jáchi nacandúsún yehe —nacachi Jesús xihín ña.

Ta chí mé hora já ndivaha ña.

<sup>23</sup> Ta tá naxinu coo Jesús vehe da sáhndá chuun nuú na Israel cán já naxini a ña sa ndúu música cán

ñá ná cūhūn nā jánduxu nā jahyi dā cán. Ta naxini a jándá johó sácu cóhó ñayivi ndúu na. <sup>24</sup> Ta chí já nācachi a já xihín tóco ndihi nā cán:

—Cuáhán queta ndó jata véhe. Jáchi coó naxihí toho ñá loho yóho. Quiji cuití va ñá —nācachi Jesús xihín ñayivi ndúu cán.

Joo nācasáhá nā cán sácu ndaa ñahá nā. <sup>25</sup> Ta chí natavá Jesús nā jata véhe. Ta tá nācayati a nu ñá cán já natiin a ndáha ñá chí ivi láá nandacoo ñá. <sup>26</sup> Ta ní cúu ñundáhyi cán nandicuita nuu tūhun sahá ñá nācaja Jesús cán.

### *Tá nandaja vaha Jesús ivi dā cuaá*

<sup>27</sup> Tá naquee Jesús cuahān já ndíco ivi dā cuaá jatá cuahān dā já nācasáhá cáyuhú cóhó dā já cáchí dā já xihín á:

—Jesús, dā naquixi chichi David caja ndó ñamani candáhví loho ini ndó ndehe —cáchí dā cáyuhú dā jatá Jesús.

<sup>28</sup> Tá ndaja coo naquihvi Jesús ini in vehe ta já nācayati ndíví dā cuaá cán nu á. Já nācasáhá ndáca tūhún a dā cán já nācachi a já xihín dá:

—Á cáhán ndo ñá cuu caja i jándiyehē nuu ndo —nācachi Jesús xihín dā cán.

—Ajan, xitoho nde. Cándúsa nde ñá cuu caja ndó ñá —nācachi ndíví dā cuaá cán xihín Jesús.

<sup>29</sup> Tá nandihí já nācani ndaa ndáha Jesús nduchú núu dā cán ta já nācachi a já xihín ndíví dā cán:

—Ná coo tá quiahva cúni ndo jáchi cándeé ini ndó yehē —cáchí a.

<sup>30</sup> Tá nandihí já nācasáhá sándeheé ndíví dā cuaá cán. Ta nāhnda Jesús chuun nu dá ñá ná a cáxi tūhun da nuú ñayivi sahá ñá nācaja mé á xihín dá.

<sup>31</sup> Joo tá jacá naqueta uun da cán já nacasáhá da ndícani da nuú ndijáá ñayivi ndúu ñundáhyi cán sahá ña naja Jesús xihín dá.

*Tá nandaja vaha Jesús in da níhi*

<sup>32</sup> Nani naquee da cuaá cán cuahan da já nasaa java ñayivi nu Jesús ñéhe na in da níhi, da ndacaan ínimá quini ini. <sup>33</sup> Ta tá natavá Jesús ínimá quini ini da cán chí ivi laá nacasáhá cáhan da. Ta a juú quiahva nacatóntó ñayivi ta já cáchi na já:

—Ni in túhún tañu coó naxini nde in ñaha tátuhun ña yóho ñundáhyi Israel —nacachi na cán.

<sup>34</sup> Joo na fariseo cán nacasáhá cáchi na já:

—Rí cúu tiñáhá sacuahá nu rí quini sáhan rí ndée rí nuú Jesús yóho ña ná tavá a ínimá quini ini ñayivi —nacachi na fariseo cán.

*Táhnda ini Jesús sahá ñayivi*

<sup>35</sup> Ndijáá ñuu náhnu xihín ñuu válí naxica nuu Jesús jánaḥa tuhun Ndióxi ini veñuhu na cán. Ta nacaxi tuhun a tuhun vaha xihín ñayivi ña sa nacayati quivi cacomí Ndióxi cuéntá saḥa ná. Ta nandaja vaha mé á tá nuú cueḥe ndóho ñayivi.

<sup>36</sup> Ta tá naxini Jesús ñayivi cuahá cán já natahvi ini a saḥa ná jáchi ndóho ini na ta cávitá ini na tátuhun ndicachi, rí coó da candaa ñahá. <sup>37</sup> Anda já nacachi Jesús já xihín na xica tuun xihín a cán:

—Mé á ndaa ndúu cuahá ndivaha ñayivi, na cúni cuni johó tuhun Ndióxi joo chá cuití na cúni cuhun na cahan na ña xihín ñayivi. Cúu á tátuhun ín cuahá ndivaha ní ña xíní ñúhú jáquee joo ndímaní ñayivi jáquee na ña. <sup>38</sup> Sahá ña cán quea xíní ñúhú caça tahví ndó nu Ndióxi ña ná chindahá mé á

chága nā cája chúun cuéntá mé á —cáchi Jesús xih̄in ná.

## 10

*Chíndahá Jesús nā xíca tuun xih̄in á ña ná cūhun nā cahan nā tuhun Ndióxi xih̄in ñayivi*

*(Mr. 3:13-19; Lc. 6:12-16)*

<sup>1</sup> Tá nandih̄i já nacana Jesús ndíhuxu ivi nā xíca tuun xih̄in á cán. Ta já nasahan ndée nu ná ña ná cuu tavá nā ínima quini ini ñayivi. Ta nasahan ndée nu ná ña ná ndaja vaha na tá nuú cuehe ndóho ñayivi. <sup>2</sup> Ña yóho cúu quivi ndíhuxu ivi nā cúu apóstol xíca tuun xih̄in á cán: Da nu cuítí cán naní da Simón ta cahan ri na Pedro xih̄in dá. Ta inga da cán cúu Andrés ñani da. Ta inga da cúu Jacobo xih̄in ñani da, Juan. Ndívi da yóho cúu dá jahyi Zebedeo. <sup>3</sup> Tañu nā cán ndácaan ri Felipe xih̄in Bartolomé xih̄in Tomás xih̄in Mateo, da najátaca jjuhún cuéntá impuesto. Ta cán ndácaan ri Jacobo, da cúu jahyi Alfeo xih̄in Lebeo, da cahan ri na Tadeo xih̄in. <sup>4</sup> Ta cán ndácaan ri Simón, da naxica cuéntá nā cananista xih̄in Judas Iscariote, mé da najicó túhún Jesús tá nu ndíhí cán.

<sup>5</sup> Tá nachindahá Jesús ndíhuxu ivi nā cán já nacachi a já xih̄in ná:

—Coto a cūhun ndó chí ñuu ñayivi tóho, nā cō cúu nā Israel. Ta ni a quíhvi ndó ñuu ñúhu chí estado Samaria. <sup>6</sup> Vaha chága ná cūhun ndó cahan ndó tuhun Ndióxi xih̄in nā Israel jáchi cúu ná tátuhun ndicachi, rí nandiñúhú. <sup>7</sup> Cuáhán ndó caxi tuhun ndó xih̄in ná ña sa nacayati quivi cacomí Ndióxi cuéntá sahá ñayivi. <sup>8</sup> Ta ndaja vaha ndó nā quíhvi ta jánditacu ndó ndii ta ndaja vaha ndó nā ndóho



cuehe táhyi. Ta tava ndó rí quini ñúhu ínima ñayivi. Ta a quehe ndó yahvi sahá ña caja ndó jáchi cóo naxeen ndó ndée ñéhe ndó jan. <sup>9</sup> A cáñehe toho ndó ni jiuhun cuáan ni jiuhun cúxú ni jiuhún caa cuáhá caca nuu ndó. <sup>10</sup> Ta ni a cáñehe ndó yátí cūhun ndó íchi. Ta ni a cáñehe ndó inga naha jáhma ndó cūhun xihín ndó. Ta ni a cáñehe ndó inga ndusa ndó cūhun ndó. Ta ni garróté a cáñehe ndó cūhun ndó. Jáchi nditahan nuú ñayivi quiahva na ña nu ndó.

<sup>11</sup> Tá ná xinu cóo ndó in ñuu cáhnu á ñuu loho, xini ñúhú ndinducú ndó in ñayivi, na cuu candeé ini ndó ta vehe na jan canduu ndó janda quiahva ná xinu quivi quee ndó cūhun ndó. <sup>12</sup> Ta tá ná xinu cóo ndó vehe jan cahan Ndióxi ndó xihín ná. <sup>13</sup> Ta tá ná ndiquehe vaha ñayivi vehe jan ndohó já quea cachi ndó xihín ná ña ná coo vaha ini na. Joo tá co cuni na ndiquehe vaha na ndohó já quea a cahan ndó xihín ná ña ná coo vaha ini na. <sup>14</sup> Ta tá co cuni na ndiquehe vaha na ndohó ta ni co cuni na cuni johó na nu cahan ndó já quea cuahán queta ndó vehe jan á ñuu jan ta catí ndó ña yacá saha ndó já ná nahá ña cuahan cuachí na cán jata mé va na. <sup>15</sup> Jáchi mé a ndaa ná cahan i xihín ndó ña tá ná xinu cóo quivi caja vii Ndióxi sahá ñayivi ndúu ñuyívi já quea jándoho chága Ndióxi ini ñayivi ñuu jan a juú ga tá quiahva najándoho a ini na ñuu Sodoma xihín ñuu Gomorra sanahá sahá ña cóo nandiquehe na ndohó.

*Vaxi quivi caja xixi ñayivi xihín na xica cahan tuhun Ndióxi*

16 'Candehé ndo. Yehe chindahá i ndohó cūhun ndó tañu ñayivi quini. Cúu ndó tátuhun ndicachi válí tañu ndivahyí ña cán quéa xíní ñúhú cuéntá vaha coo ndó tá quiahva cája coo. Ta xíní ñúhú coo mánsó ndo tá quiahva cája ndijata. 17 Cuéntá coo ndó jáchi tiin na ndohó ta ndiquiahva na ndohó ndahá na jutixia. Ta caní na ndohó ini veñuhu. 18 Ta saha mí i cañehe na ndohó cūhun ndó nuú na cúu gobernador á nuú na cómí cuéntá sahá in nación. Ta já ná cuu ndicani ndó sahá i nuú na cán ta xihín nuú na tóho, na coo cúu na Israel. 19 Joo a ndicani ini ndó saha ndá tuhun cahan ndó tá ná ndiquiahva ñayivi ndohó ndahá na cán. Jáchi tá ná ndindaa hora cahan ndó xihín ná já quéa quiahva mé va Ndióxi tuhun nu ndó ña ná cuu cahan ndó sahá i nuú na cán. 20 Jáchi a juú jini mé ndó quixi ña cahan ndo. Ínima yii Ndióxi cacuu ña quiahva tóco ndihi ña cahan ndo.

21 'Ta java ta jicó túhún da ñani da ta java da jicó túhún da jahyi da ña ná cahní ñahá na. Ta java na ndicuíta na caní táhan na xihín tátá na ña ná cahní ñahá na. 22 Ta ndaja táhan ñayivi ndúu ñuyíví yóho candají na ndohó sahá yehe. Joo ndá na ná candico tuun íchi mí i janda ná xinu quivi quivi na, na cán cacuu na cacu ndaa ínima. 23 Tá ná ndicuíta na caja xíxi na xihín ndó in ñuu já cunu ndó cūhun ndó inga ñuu. Jáchi mé a ndaa ná cahan i xihín ndo ña tá sa xinu coo tucu yehe, da nachindahá Ndióxi nduu ñayivi já a ñaha caca nuu ndó ndijáa ñuu ndácaan ñundáhyi Israel.

24 'Candehé ndo. Ni in túhún toho da xíca jácuaha tiyahva chága da nu mé dá janaña ñahá cán. Ta ni in túhún mozo coo cúu dá da cáhnu chága nuú

xitoho da. <sup>25</sup> In da jácuaha ndítahan cajii íní da tá sa xíni ndihi da ña xíni maestro da. Ta da cúu mozo ndítahan cajii ini da tá ná xinu da cacuu da cáhnu tátuhun xitoho da. Candehé ndo. Tá ná cachi ñayivi xihín da cúu xitoho ndó ña cúu da Beelzebú, rí cúu tiñáhá sacuahá ndaja ga ví cachi na xihín ndóhó.

*Yo já ndítahan cayihví yo  
(Lc. 12:2-7)*

<sup>26</sup> 'Candehé ndo. A cáyhví toho ndó ñayivi jáchi ni in túhún toho ñaha cája ñayivi a cúu coo jehé nahá jáchi vaxi quivi tá ndáca náha nu á. Ta vatí cáhan jehé ñayivi tuhun joo vaxi quivi tá candaa ini ñayivi sahá. <sup>27</sup> Ña cáhan yehe xihín ndó nuú naá xíni ñúhú cáhan ndó ña ndiví táhyí nani yehe candii. Ta ña cáhan jehé e xihín ndo xíni ñúhú ndaa ndó jini véhe cayuhú ndó ña. <sup>28</sup> A cáyhví toho ndó ñayivi, na cuu caja cahní yiquí cuñu ndó jáchi ni in ñaha a cúu caja na xihín ínimá ndo. Ndióxi queá xíni ñúhú cayihví ndo jáchi mé a cuu jándihi a saha yiquí cuñu ndó ta cuu jácana mé a ínimá ndo ini indayá anda ama cáa quivi.

<sup>29</sup> 'Candehé ndo. Laa válí ndáchí ri nu táchi ta núu ndivaha jícó na ri. Joo ni in rí cán co cýu nu ñúhu ña quivi rí tá co sahan Ndióxi, tátá ndó ñamaní. <sup>30</sup> Ta viti caja ndó cuéntá xihín mé ndó. Janda ijí jini ndó jan ndáhvi tá in tá in a nu Ndióxi. <sup>31</sup> Ña cán queá a cáyhví toho ndó jáchi ndiyahvi chága ndo nu Ndióxi a juú ga cuahá ndivaha laa válí.

*Tá cáhan cáxi ñayivi ña cúu ná cuéntá Jesús  
(Lc. 12:8-9)*

<sup>32</sup> 'Ndá na cáxi tuhun nuú ñayivi ña cuahan na cuéntá mí i já queá cachi mí i sahá na nu Ndióxi, tátá i, mé a lin indiví, ña mé a ndaa cúu ndusa na cán cuéntá mí i. <sup>33</sup> Joo ndá na ná cachi xihín ñayivi ña co xini toho na yehe já queá ni yehe a ndícuni toho i na ña cúu ná cuéntá mí i nu Ndióxi, tátá i, mé a lin indiví.

*Cája Jesús ña sáhdá java táhan ñayivi  
(Lc. 12:51-53; 14:26-27)*

<sup>34</sup> A cáhan toho ndó ña naxinu i ñuyivi yóho caja i ña ná coo vaha ini ñayivi. Co căja i já. Jáchi ña vaxi yehe caja i queá ná cahnda java táhan na. <sup>35</sup> Vaxi i jácani táhan i dataa xihín tátá da sahá yehe. Ta vaxi i jácani táhan i in ñañáha xihín náná ña sahá yehe. Ta vaxi i jácani táhan i ñá cúu sanu xihín xojo ña sahá yehe. <sup>36</sup> Ta ndaja vehe mé ñayivi ndicuíta na cani táhan na sahá yehe.

<sup>37</sup> 'Ta ndá na cúni chága tátá na á náná na a juú ga yehe já queá coo saha toho na cacuu na cuéntá mí i. Ta ndá na quíhvi ini chága jahyi yií na á jahyi jíhí na a juú ga yehe já queá coo saha toho na cacuu na cuéntá mí i. <sup>38</sup> Ndá na co cúni ndoho ini sahá ña candico na yehe ta co lin tiahva na quivi na sahá i já queá coo saha toho na cacuu na cuéntá mí i. <sup>39</sup> Jáchi ndá na cátóo coo chága na ñuyivi yóho, na cán cúu na ndihi saha. Joo na sahan ndeé ini quivi sahá i, na cán cúu na ñehe táhvi na catacu na anda ama cáa quivi.

*Ña quiahva Ndióxi nuú ñayivi  
(Mr. 9:41)*

<sup>40</sup> 'Ndá na ndíquehe vaha ndohó, ndíquehe vaha ri na yehe va. Ta ndá na ndíquehe vaha yehe,

ndíquehe vaha ri na Ndióxi, mé a nāchindahá yehe vaxi i ñuyívi yóho. <sup>41</sup> Ndá nā ndíquehe vaha in profeta vaxi cuéntá Ndióxi já quéa tá quiahva coo yahvi ndiquehe profeta cán quiahva já coo ri yahvi ndiquehe nā cán. Ta ndá nā ndíquehe in taa vaha sahá ña cúu dá ñayivi vaha já quéa ndiquehe nā cán yahvi na tá quiahva cáa yahvi ndiquehe taa vaha cán. <sup>42</sup> Ta ndá nā ná quiahva ñaha vatí in yáxi ticuí nuú in nā cúu jahyi i yóho sahá ña ndíco nā íchi cuéntá mí i, mé a ndaa ná cahan i xihin ndó ña chahvi Ndióxi sahá ñamaní cája na xihin ná — cáchí Jesús.

## 11

*Juan, da jácandúta ñayivi nāchindahá da java da xica xihin dá nuú Jesús*

*(Lc. 7:18-35)*

<sup>1</sup> Tá nāndihi nānaha Jesús nuú nā xica tuun xihin á cán ña ndítahan caja na já naquee a cuahan jánaha nuú ñayivi ta cáxi tuhun a tuhun Ndióxi nuú ñayivi ndúu ñundáhyi cán.

<sup>2</sup> Mé tiempo já nasandacaan Juan vecaa, mé dá cúu dá da jácandúta ñayivi. Ta cán nañehe dá tuhun sahá ña náhnu cája Jesús. Anda já nāchindahá da java nā xica xihin dá nu á <sup>3</sup> ña ná ndaca tuhún nā Jesús á jivi ndusa cúu á Cristo, mé a chindahá Ndióxi cacomí a cuéntá sahá ñayivi, á ndítahan candati na inga ga quixi. <sup>4</sup> Tá nāndihi nāndaca tuhún da cán Jesús sahá ña yóho já nācachi Jesús já xihin ná:

—Cuáhán ndó ndicani ndó nu Juan tóco ndihi ña naxini ndó cája i xihin tóco ndihi ña naxini joho

ndó cáhan i. <sup>5</sup> Ta ndicani ndó nu dá ña ndínuna nuú na cuaá ta ndícaca na rénco cája i. Ta ndaja vaha i na ndóho cuehe táhyi. Ta jándinuna i johó na jóho já ná cuni johó na. Ta jánditacu u ndji. Ta cáxi tuhun i tuhun Ndióxi nuú na ndahví já ná cuu çacu ndaa ínimá ná. <sup>6</sup> Tahví naçuu na ço jándacoo ña cándéé ini na yehe —nacachi Jesús.

<sup>7</sup> Tá naçuee na naçindahá Juan cán cuañan na já naçasáhá Jesús cáhan xihín ñayivi já cáché a já xihin ná:

—Ndía naçahán ndo cuni ndó tá naçqueta ndó naçahan ndó sándehé ndo Juan yucú íchí cán. A juú da cán cúu ãa láhá já quíji nuu da tátuhun quíji nuu in tóyoó cája tachi. <sup>8</sup> Ndía naçqueta ndó candehé ndó. A juú da cán cúu ãa ndíxi jahmá lándá ndivaha. Sa xini vaha ndó ña ço ndúu toho da ndíxi jahmá lándá yucú íchí. Ndá da ndíxi jahmá lándá cúu da ndúu vehe rey cuití va. <sup>9</sup> Ndía naçahan ndó candehé ndó cán. Á çoó naçahan ndó cuni johó ndó nu cáhan in da cúu profeta nu ndo. Mé a ndaa da cán cúu dá in profeta ta íin chága saha dá a juú ga inga profeta naçanduu sanahá. <sup>10</sup> Jáchi mé Juan cúu dá da cáhan tuhun Ndióxi saha tá cáché a já:

Chindahá i in da cánúu cuhun nu mún, já ná caha tiahva da íchí nuú quisún, já naçahyi a sanahá.

<sup>11</sup> Candehé ndo ná cañan i xihin ndo. Tañu tóco ndihi ñayivi çoó ga inga profeta cáhnu chága a juú ga Juan, mé da jácandúta ñayivi. Joo ndá na sa nandiquiahva mé ndáha Ndióxi ña ná cacomí a cuéntá saha ná, vatí cúu ná na çoó saha, na cán cúu na cáhnu chága a juú ga Juan.

12 'Janda quiví naxinu Juan, da jácandúta ñayivi ta janda viti ñuhú ndíhi ndivaha ini ñayivi ndiquiahva na mé ná ndáha Ndióxi. Ta na sahan tuhun ndeé ini, na cán cúu na ñehe táhvi cacomí Ndióxi cuéntá saha. 13 Janda tá cámani xinu Juan tóco ndihi ña nacahyí na profeta xihín ña nacahyí Moisés cáhan ña vaxi quiví cacomí Ndióxi cuéntá sahá ñayivi. 14 Ta tá cuni ndo candúsa ndó ña nacahyí na cán sanahá já cuu candaá ini ndó ña Juan cúu dá da nacahan na cán saha tá nacachi na ña ndítahan quixi tucu profeta Elías ñuyíví yóho. 15 Na ín johó, ná cuni johó na.

16 'Ná cahan i xihin ndó ndaja ín ñayivi ndúu tiempo viti. Cúu ná tátuhun na valí sácoo sájiquí na nuú yahvi ta cáyuhú na nuú java ga na valí ndúu cán ta já cáhí na já: 17 "Nativí nde tótíví nu ndo joo coó naxeen ndó cata sahá ndo. Ta naxita cuéha ndivaha nde nu ndo ta ni coó nasacu ndó." 18 Quiahva já ín ñayivi ndúu tiempo viti jáchi tá naquixi Juan, da jácandúta ñayivi ta naxijuhun da ta ni coó naxihi da vino joo nacachi ndó saha dá ña ndácaan ínima quini ini da. 19 Ta tá naxinu yehe, da nachindahá Ndióxi nduu ñayivi ta xíxi i pan ta xíhi i vino já nacasahá cáhí ndó sahá i ña cúu u in taa ndehé ndivaha ta xíhi ndivaha i. Ta cáhí ndó ña cátóo ndivaha i cacuu amigo na cája cuachi xihín na játaca jjuhún cuéntá impuesto. Joo na cuni candaá ini ña ndaa, na cán cúu na candaá ini ña cája Juan ta cája ri yehe ña ndaa —nacachi Jesús xihin ná.

*Ñayivi sáa ini co cuni na caja na ña cuni Ndióxi  
(Lc. 10:13-15)*

20 Tá nandihí já nacasáhá Jesús jáñani a ñayivi ndúu ndíjái ñuu nuú nacaaja cuaha chága mé á ña xitúhún. Jáchi vatí nacaaja cuaha mé á ña xitúhún nu ná coó nandicó coo ini na nu Ndióxi. Ña cán quea nacachi Jesús já xihin ná:

21 —Ndáhví nahá nacuú ndó, na ñuu Corazín. Ta ndáhví nahá nacuú ndó, na ñuu Betsaida. Cuahá ndivaha ña náhnu nacaaja i nu ndo joo coó naxeen ndó ndicó coo ini ndó jándacoo ndó cuachi ndó. Sanahá najándihí Ndióxi sahá ñuu Tiro xihín sahá ñuu Sidón sahá cuachi na. Tá ná sahan i caja i ña náhnu nuú na cán tá quiahva nacaaja i nu mé ndó, sa najándacoo va na cán cuachi na, nduu. Ta chí ivi laá ndaca ndixi na jahmá ndii ta jácuuyu na yaa yiquí jíní na, nduu. Jáchi xihín ña yóho jáñaha na ña nandicó coo ini na sahá cuachi na. 22 Mé a ndaa ná cahan i xihin ndo tá ná xinu quiví caja vii Ndióxi sahá ñayivi já ndoho chága ini mé ndó, na ñuu jan a juú ga tá quiahva ndoho ini ñayivi nasanduu ñuu Tiro xihín ñuu Sidón sanahá. 23 Ta viti cahan i xihin ndó, na ndúu ñuu Capernaum. Janda indiví cúní ndó cuhun ndó joo sahá ña sáa ini ndó cuhun ndó janda indayá, caja Ndióxi. Jáchi tá ná caja i ña xitúhún nuú ñayivi ñuu Sodoma tá quiahva nacaaja i nu ndóhó ta ni a ndíhi sahá ñuu cán, nduu. 24 Mé a ndaa ná cahan i xihin ndo ña tá ná xinu quiví caja vii Ndióxi sahá ñayivi já ndoho chága ini mé ndó, na ñuu jan a juú ga tá quiahva ndoho ini ñayivi nasanduu ñuu Sodoma sanahá —nacachi Jesús.

*Tá nacajii ndivaha ini Jesús  
(Lc. 10:21-22)*

25 Mé tiempo cán nacahan Jesús já nacachi a já:



—Cája cáhnu i ndohó, tátá Ndióxi, ña cúu xitoho tóco ndihi ñaha ndúu indivi xihín ñuyivi. Jáchi najánaña ndó ña ndichí ndivaña nuú ñayivi, na coó cuahá saha nuú java ga na. Ta nacaja ndó ña ná a cuú candaá ini na ndichí xihín na tácu ini ñaha mé ndó. <sup>26</sup> Já nacaja ndó jáchi já nasacu ini ndó caja ndó —nacachi Jesús.

<sup>27</sup> Anda já nacachi a já xihín na ndúu cán:

—Nandiquiahva tátá i tóco ndihi ñaha ndahá i ña ná cacomi i cuénta sahá. Ta ni in túhún toho ñayivi co xini vaña na yehe, da cúu in túhún jini já jahyi Ndióxi. Mé Ndióxi, tátá i cuití va xini vaña yehe. Ta ni in túhún toho na co xini vaña na yo cúu tátá i. In túhún yehe, da cúu jahyi a xini vaña i yo cúu mé á. Ta yehe cúu da caxi ndá ñayivi jánaña i nuu sahá Ndióxi, tátá i já ná candaá vaña ini na yo cúu mé á. <sup>28</sup> Naha ndihi ndó nuú i, na sa nacanaá cája chúun. Taxi ndó ña ndójo ndó jan nuú i ta já yehe caja i ña ná ndiquehe ndée ndó. <sup>29</sup> Yehe cúni ña ná ndiquiahva ndó mé ndó ndahá i. Ta ña yóho cúu á tátuhun in yúcu chínúu na sahá jiqui tndiqui. Ta xini ñuhú catiahva ndó caja ndó tá quiahva cája yehe. Jáchi coó cama jini i xihín ñayivi ta cúu u ta manso ndivaña. Quiahva já caja ndó já ñehe íni ndó ndiquehe ndée ndó. <sup>30</sup> Jáchi yúcu chínúu i jata ndó xihín ñaha jácojo i jata ndó cúu á ña cama ñuhú laá —nacachi Jesús.

## 12

*Ña nacaja na xica tuun xihín Jesús in quivi ndiquehe ndée ñayivi  
(Mr. 2:23-28; Lc. 6:1-5)*

<sup>1</sup> Ta ndaja coo in quiv̄i ndíquehe ndée ñayivi xica Jesús cuah̄an tañu nuú naxutu na trigo. Ta sahá ña cuico na xica tuun xih̄in Jesús sahá ña cán quéa ñacasáhá na túhún na java yucu jin̄i trigo cán ta tává na trigo sáxí na. <sup>2</sup> Tá naxini na fariseo ña yóho já ñacasáhá na cáh̄an cuachí na nuú Jesús. Já cáchí na já:

—Candehé. Na xica tuun xuhun jan cája na chuun ña co ndítahan caja ñayivi quiv̄i ndíquehe ndée yó —ñacachi na xih̄in Jesús.

<sup>3</sup> Já nanducú ñehe Jesús tuhun nu ná já ñacachi a já xih̄in ná:

—Á a ñáha toho cahvi ndó nuú tuhun Ndióxi nu cáh̄an sahá ña ñacaja David sanahá tá ñacuico da xih̄in na xica xih̄in dá. <sup>4</sup> Ña ñacaja da quéa ñaquih̄vi da ini veñuhu Ndióxi ta naxixi da pan ña yii. Ta ni nu mé dá ta ni nuú na xica xih̄in dá cán co cáni a nuu cuxu na pan cán. In túhún jut̄u cuití va cáni a nuu cuxu na pan cán. <sup>5</sup> Ta á a ñáha toho cahvi ndó ña ñacah̄yí Moisés nu ley tá ñacah̄yí da ña co cája toho jut̄u cuachi nu Ndióxi vatí cája chúun da veñuhu quiv̄i ndíquehe ndée ñayivi. <sup>6</sup> Mé a ndaa ná cah̄an i xih̄in ndo ña ín chága sahá i, da cándichi yóho a juú ga sahá veñuhu nu cája cáhnu na Ndióxi jan. <sup>7</sup> Mé ndó co cándaa toho ini ndó ña cúni cach̄i tuhun Ndióxi tá cáchí a já: “Yehe cúni ña ná candáhvi ini ndó ñayivi jách̄i vaha chága ña yóho a juú ga ña ná joco ndó quít̄i nuú i”, cáchí tuhun Ndióxi. Jách̄i tá ná cándaa ini ndó tuhun yóho, nduu ta a chícaan toho ndó cuachi jatá ñayivi, na cóo cuachi. <sup>8</sup> Candehé ndó. Yehe, da ñachindahá

Ndióxi nduu ñayivi, íin sahá i cahnda i chuun sahá quivi ndiquehe ndée ñayivi —ñacachi Jesús.

*Tá nandaja vaha Jesús in da nahichi ndáha*  
(Mr. 3:1-6; Lc. 6:6-11)

<sup>9</sup> Tá nandihí já ñaquee Jesús cuahan já nandihvi a veñuhu mé ñuu cán. <sup>10</sup> Ta cán ñasandacaan in dataa, da nahichi ndáha. Ta sahá ña ndúcú ña fariseo nduu cán ndá quiahva caja na já ná cuu chicaan ña cuachi jatá Jesús sahá ña cán quea nandaca tuhún ña mé á já ñacachi na já:

—Á sahan Ndióxi ñamaní ndaja vahún ña quihvi quivi ndiquehe ndée yo —ñacachi ña cán xihin á.

<sup>11</sup> Anda já ñacachi Jesús já xihin ná:

—Candehé ndó. Tá íin in ndicachi loho jana ndo ta tá ná ndicava rí ini in táhvi quivi ndiquehe ndée yo, ama ná a cühun ndó tavá ndó rí. <sup>12</sup> Ta ndiyahvi chága ñayivi a juú ga ndicachi. Ña cán quea sahan Ndióxi ñamaní cája í ña vaha quivi ndiquehe ndée yo —ñacachi Jesús xihin ná.

<sup>13</sup> Tá nandihí ñacachi a já xihin dataa, da nahichi ndáha cán já:

—Jándacaa ndáhun —ñacachi a xihin dá.

Tá najándacaa da ndáha dá já nandivaha ndáha dá. Ta cáa tá quiahva cáa inga ndáha da cán. <sup>14</sup> Joo tá ñaqueta ña fariseo cán já ñacasahá ña jándique táhan na tuhun na ña cahní ña Jesús.

*Ña cahan Isaías sahá Jesús*

<sup>15</sup> Tá ñañehé Jesús tuhun ña ndúcú ña cán cahní ñahá ña já ñaquee a cuahan va ta cuahá ndivaha ñayivi ndíco jatá cuahan. Ta ndaja táhan ña quihvi nandaja vaha Jesús. <sup>16</sup> Ta ñasahnda Jesús chuun

nuú na sa nandivaha cán ña ná a cáxi tuhun na nuú ñayivi yo cúú mé á. <sup>17</sup> Tóco ndihi ña yóho nayaha já ná xinu coo nuú tuhun nacahyí profeta Isaías tá nacahyí da já:

<sup>18</sup> Yóho íin da cája chúun cuénta mí i, mé dá nacaxi i.

Quíhvi ndivaha ini i da ta cájii íní i xihín ña cája da. Ta jáchutu ndaa i ínimá dá xihín ínimá yii mí i, ña ná jánahá da nuú ñayivi ndúu ñuyiví ndá quiahva cája vii i saha ná.

<sup>19</sup> Ta ni a cáhan cuachi toho da ta ni a cáyuhú cóhó da,

já quea a cúni johó ñayivi xíca cállé nu cáhan da.

<sup>20</sup> Tá quiahva a jácuachi toho da ndoo, dó sa natahnu,

quiahva já a jácuachi toho da ñayivi, na cávitá ini.

Ta quiahva já ni a ndáhvá toho da tití ñúhu loho, ña sa cúni ndahva janda quiahva ná quee vaha ña ndaa xihín ña ihvi.

<sup>21</sup> Ta ndaja táhan ñayivi ndúu ní cúú ñuyiví tandaa candeé ini na mé dá, nacahyí Isaías sanahá.

*Jácojo na cuachi jatá Jesús ña cája chúun a xihín ndé tiñáhá sacuahá*

*(Mr. 3:20-30; Lc. 11:14-23; 12:10)*

<sup>22</sup> Java ñayivi ñéhe na in da cuaá ta cúú dá da níhi jáchi ndacaan rí quini ini da. Ta tá nandaja vaha Jesús da já nasandehé da ta nandicahan da.

<sup>23</sup> Tá naxini ñayivi ndúu cán ña yóho já nacatontó ndivaha na já nacasáhá ndaca tuhún táhan na já cáhí na já:

—Á a juú da yóho cúú da naquixi chichi rey David —cáchi xihín táhan na.

24 Tá naxini joho ña fariseo ña cáhan ñayivi cán já ñacasáhá cáchi mé ña fariseo cán já:

—Taa yóho cúú tává ña rí quini ñúhu ini ñayivi jáchi mé Beelzebú, rí cúú tiñáhá sacuaḥa nu rí quini cán sahan rí ndée rí nu dá cája da ña — ñacachi na.

25 Ta sa xini va Jesús ña cáhvi ini ña cán sahá ña cán quéa ñacachi a já xihin ná:

—Tá sáhná java táhan ñayivi ndúu in nación ta ndúu na cuḥa táhná já cásáhá cáni táhan ndaja táhan mé va na já cama chá ndihi sahá nu ndúu ña cán. Ta quiaḥva já yaḥa rí xihin in ñuu á in vehe tá sáhná java táhan ndaja táhan mé ná já quéa jándihi na saḥa ná. 26 Ta quiaḥva já yáha xihin Satanás, rí cúú tiñáhá sacuaḥa. Ta tá ná tavá rí inga rí quini ini ñayivi á tá ná cani táhan ndaja táhan mé rí já quéa ndihi saḥa ndée ña cómi rí. 27 Mé ndó cáchi ndo ña tává i rí quini ini ñayivi xihin ndée Beelzebú, rí cúú tiñáhá sacuaḥa. Joo tá mé a ndaa cúú ndusa ña cáchi ndo sahá i ñan, ndáchí quéhe ña cúú cuéntá mé ndó ñan ndée tavá ña rí quini ini ñayivi. Ama ná cachi ndó ña tává ndo rí quini xihin ndée tiñáhá sacuaḥa. Ña yóho náha ña co cáhvi ndaa ini ndó. 28 Candehé ndo. Yehe tává i ínimá quini ini ñayivi xihin ndée ínimá yíi Ndióxi. Ta xihin ña yóho náha cáxi a ña sa naxinu coo quivi cacomí Ndióxi cuéntá saḥa ndó.

29 Candehé ndo. Sácú u in quiaḥva nu ndo. Ni in ñataa a cúu ndihvi da caja cuíhná ña ñaha vehe in ña ndacú joo tá ná cató ña ña ndacú cán já cuu quehe da ñaha ña cán.

<sup>30</sup> 'Ndá nā cōó cuahān xoo i, cúú ná nā cō cúní yehe. Jáchi ndā nā cō chindeé yehe xihín ña cāja i, cúú ná nā sájí nuu nuú i.

<sup>31</sup> Ña cán quéa cáhí i xihín ndo ña cāja cáhnu ini Ndióxi saha tá nuú cuachi cāja ñayivi xihín saha tá nuú tuhun quini cáhan nā. Joo tá ná cahan núu na saha ínimā yíi Ndióxi já quéa a cāja cáhnu toho ini Ndióxi sahá ña nacaja na. <sup>32</sup> Caja cáhnu ini Ndióxi jandā saha ndá nā ná canahá xihín yehe, da nachindahá Ndióxi nduu ñayivi joo tá ná canahá nā xihín ínimā yíi Ndióxi já quéa a cāja cáhnu toho ini Ndióxi saha ná ni nani tácu nā ndúu na ñuyíví yóho ta ni tá cūhun nā cavií saha ná nu Ndióxi.

*Xihín cuihi cúun nuú in yító cuu ndicuní ndá yító cúú dó*

*(Lc. 6:43-45)*

<sup>33</sup> 'Xíní ñúhú jándee ndó yító vaha ña ná cuun cuihi vaha nu do. Jáchi tá ná jándee ndó yító núu já quéa cuihi núu cuun nu do. Jáchi xihín cuihi cúun nuú in yító cuu ndicuní ndá yító cúú dó. <sup>34</sup> Mé ndó cúú ndó tátuhun cōo jáchi cúú ndó nā quini sahá ña cán quéa cáhan ndó tuhun quini ta a cúú cana tuhun vaha yúhu ndo. Jáchi yúhu ñayivi cána tóco ndihi ña nandicutú ñúhu ínimā ná. <sup>35</sup> In taa vaha cáhan da ndinuhu ña vaha jáchi ndinuhu ña vaha ñúhu ínimā dá. Ta in taa quini cáhan da ndinuhu ña núu jáchi ña núu quéa ndácaan ínimā dá. <sup>36</sup> Mé a ndaa ná cahan i xihín ndo ña tá ná ndindaa quívi cāja víi Ndióxi sahá ñayivi ndúu ñuyíví anda jávi ndiquiahva ñayivi cuénta nu Ndióxi sahá ndaja táhan tuhun núu nacahan nā ñuyíví yóho. <sup>37</sup> Jáchi saha mé tuhun nacahan ndó jan cāja víi Ndióxi

saha ndo. Ta xihín ña jan cachi Ndióxi ña á íin cuachi ndó á coó cuachi ndó —cáchi Jesús.

*Xíca ñayivi quini ña ná caja Jesús ña xitúhún nu ná (Mr. 8:12; Lc. 11:29-32)*

<sup>38</sup> Java na fariseo xihín na jánaha ley Moisés nacahan na xihín Jesús já nacachi na já xihín á:

—Maestro, cuni nde ña ná caja ndó in ñaha xitúhún nuú nde já ná cuni nde —nacachi na xihín Jesús.

<sup>39</sup> Já nanducú ñehe Jesús tuhun nuú na cán já nacachi a já xihin ná:

—Ñayivi quini, na co cuni cándúsa Ndióxi, na yóho cúu na cuni cuni ña xitúhún. Joo a cuni toho na ña. Ña cuni ndusa na quéa ña ndoho i tá quiahva nandoho Jonás, da nasacuu profeta sanahá. <sup>40</sup> Jáchi tá quiahva nasandacaan Jonás uni quivi xihín uni ñuú tixi tiyacá cáhnu tá nacocó rí da quiahva já ndacaan ri yehe, da nachindahá Ndióxi nduu ñayivi tixi ñundáhyi uni quivi xihín uni ñuú.

<sup>41</sup> Ta ñayivi nasanduu Nínive sanahá cán ndacuíta na chicaan na cuachi jata ndó tá ná xinu quivi caja ví Ndióxi sahá cuachi ñayivi ndúu viti. Jáchi mé na nasanduu ñuu Nínive cán najándacoo na cuachi cája na tá nacahan Jonás xihin ná ña nacachi Ndióxi coo. Ta yehe íin chága sahá i a juú ga Jonás joo co cándúsa ndó yehe. <sup>42</sup> Jári tá ná xinu quivi caja ví Ndióxi sahá cuachi ñayivi ndúu tiempo viti anda já ndacuíta in ña nasacomí cuénta sahá ñayivi ndúu chí xoo sur sanahá ta chicaan ña cuachi jata ñayivi ndúu tiempo viti. Jáchi mé ña cán vatí nasahiin xíca ndivaha ña nu rey Salomón sanahá nasahan ña cuni johó ña tuhun ndíchi cáhan da. Ta yehe íin

chága sahá i a juú ga Salomón joo co cándúsa ndó yehe.

*Jánaḡa Jesús ña cuaḡá tañu ndícó coo tucu ínima quini ini ñayivi vatí sa naquee rí*  
(Lc. 11:24-26)

<sup>43</sup> Tá quéta in ínima quini ini in dataa já quée rí cuaḡan rí xíca nuu rí ndijáá yucú íchí ndínducú rí nuú candoo rí. Ta tá co ndíñehē rí ña já cásahá cáhvi ini rí já: <sup>44</sup> “Coho ndicó coo tucú ini da nuú naṣandacaan í cán jáchi cúú á tátuhun vehé”, cáhán rí. Ta tá xínu coo rí ini da cán já sándeḡé rí ña ín víi va ini da cán tá quiaḡva víi ini vehe tá naṡihvi á ta naṡaca ndójó vaḡa tóco ndihi ñaha ini a. <sup>45</sup> Anda já quée tucu mé rí quini cán cuaḡan rí quehe rí usa ga rí quini chága a juú ga mé rí já xínu ndihi rí ndihvi rí ini dataa cán. Ta mé da cán ndiquini chága da a juú ga tá naṣandacaan in tálaá rí ini da. Quiaḡva já ndoho rí ñayivi quini ndúu tiempo viti —cáchi Jesús.

*Nána Jesús xihín ñani a cúní na cuni na a*  
(Mr. 3:31-35; Lc. 8:19-21)

<sup>46</sup> Nani cáhan yíi va Jesús xihín ñayivi já naxínu coo nána Jesús xihín ñani a ña ná caḡan na xihín á cúní na. Joo naṡandoo na ndíta na jaṡa véhe. <sup>47</sup> Já naṣaḡan in na cáxi tuḡhun na nuú Jesús já cáchi na já xihín á:

—Jaṡa véhe cáa ín nánún xihín ñanún ta caḡan na xuḡhun cúní na —naṡachi na xihín Jesús.

<sup>48</sup> Joo naṡducú ñehē Jesús tuḡhun nuú na cán já naṡachi a já xihín ná:

—Cáḡan i xihín ndó ndá na cúú ndusa nána i xihín ñani i —naṡachi Jesús xihín ná.



49 Anda ja nanaha ndaha me a na xica tuun xihin  
a can ja nacachi a ja:

—Na yoho cuu na tatuhun nana i xihin ñani i.  
 50 Jachi nda na caja ña cuni Ndióxi, tata i, me a in  
indivi, na can cuu na tatuhun ñani i xihin quiahva  
i xihin nana i —nacachi Jesús xihin na can.

## 13

### *Sácú Jesús quiahva sahá in da sátá tata* *(Mr. 4:1-9; Lc. 8:4-8)*

1 Sa me quivi ja naqueta Jesús vehe can ja  
nasahan nasaco a yati yuhú tañuhú can. 2 Ta sahá  
ña nataca cuahá ndivaha ñayivi nu a sahá ña can  
queá nanda me a jata in barco loho ta nasaco  
a jata do can nani nduu ñayivi ñuti yuhú tañuhú  
can. 3 Anda ja nacasahá janaha cuahá ñaha nu na  
ta nasacu a quiahva nu na ja nacachi a ja xihin na:

—In da sátá tata naquee da cuahan da cata da  
ña. 4 Ta tá sátá da ña cuahan da ja nacuyu java  
ña ichi ta can naxinu laa ta nasaxi ri ña. 5 Ta java  
ña nacuyu a tañu yuu nuú coó cuaha ñuhu. Ta  
cama chá nanduta me tata jachi co cuna ñuhu nuú  
nacuyu a. 6 Joo tá naqueta candii ja najahichi ñahá  
sahá ña coó cuaha yoho a chi nandihi sahá. 7 Ta  
java tata nacuyu tañu tohiñú ta tá nasahnu tohiñú  
can ja nanditáha ndihi a nacaja tohiñú. 8 Ta java  
tata nacuyu a nu ñuhú vaha ta ja nasahan cuahá  
ñaha ña jaquee na nu a. Java ña nasahan in ciento  
a nuú in in tata ta java ña nasahan uni jicó uxu a ta  
java ña nasahan oco uxu a nuú in in tata. 9 Na in  
joho, na cuni joho na —nacachi Jesús.

*Ndícani Jesús ndá saha quéa nasacu a quiahva nu ná*

*(Mr. 4:10-12; Lc. 8:9-10)*

<sup>10</sup> Na xíca tuun xihín Jesús cán nacayati na nu á já nacasáhá ndáca tuhún na mé á ndá cuéntá quéa jánaḥa mé á xihín quiahva cuití va nuú ñayivi.

<sup>11</sup> Anda já nacachi Jesús já xihín ná:

—Ña coo nacandaḥa ini ndó jihna ña cán candaḥa ini ndó viti jáchi nasuná Ndióxi xíní túní ndo candaḥa ini ndó ndá quiahva cacomí mé á cuéntá sahá ñayivi. Joo na a ñaha cacomí Ndióxi cuéntá saha, na cán cúú na sácú u quiahva nuu. <sup>12</sup> Jáchi ndá na sa ín ñaha nuu, ñeḥe táhvi na coo chága ñaha nu ná. Joo na co á ñaha nuu, janda ña chá ín nu ná ndindaa. <sup>13</sup> Sahá ña cán quéa cáhan i xihín ndinuhu quiahva xihín mé ndó jáchi vatí sándeḥé na joo cúú ná tátuhun na co tívi nuu. Ta vatí xíní johó na joo cúú ná tátuhun na johó jáchi co candaḥa ini na ña cáhan i xihín ná. <sup>14</sup> Ta xihín ña yóho xínu coo nuú tuhun nacachi profeta Isaías sanahá ndivaḥa tá nacachi da já:

Vatí xíní johó na joo cúú ná tátuhun na johó jáchi co candaḥa ini na ña cáhan i xihín ná.

Ta vatí sándeḥé na joo cúú ná tátuhun na co tívi nuu.

<sup>15</sup> Jáchi nandaji xíní túní tóco ndihi ñayivi ñuu yóho. Ta ndájí tuun johó na ta ndájí tuun nduchú núú na.

Ña cán quéa a cúú cuni johó na,

ta ni a cúú candeḥé na,

ta ni a cúú candaḥa ini na ña xíní johó na.

Ta xihín ña yóho co ndícó coo na nuú i ña ná ndaja vaḥa i na, nacahyí Isaías sanahá.

16 'Joo tahví nacuu ndó jáchi cándaā ini ndó ña sándehe ndó xihín ña xini joho ndó. 17 Mé a ndaa ná cahan i xihín ndo ña cuahá ndivaha na profeta xihín cuahá ndivaha ñayivi vaha naxica ini na cuni na ña xini ndó yóho viti joo coó naxini na ña ta naxica ini na cuni joho na ña xini joho ndó yóho joo coó naxini joho na ña.

*Ndicani Jesús ña cuni cachi quiahva nasacu a nu ná*

*(Mr. 4:13-20; Lc. 8:11-15)*

18 'Cuni joho ndó ña cuni cachi quiahva nasacu u sahá da sátá tata cán. 19 Ñayivi, na xini joho tuhun vaha sahá ña sa nacayati quivi cacomí Ndióxi cuénta sahá ñayivi joo co cándaā ini na ña, na cán cúu ná tátuhun tata ña nacuyu íchi cán. Jáchi xinu tiñahá sacuahā ta tává ri tuhun Ndióxi cán ínimā ná. 20 Ta tata ña nacuyu tañu yuu cán náha ndá quiahva ín ñayivi, na cájji ndivaha ini ndiquehe tuhun Ndióxi. 21 Joo sahá ña co ñehe íni yóho a cuhun cúná a sahá ña cán quea chá tiempo cuití va cándusa na tuhun Ndióxi. Jáchi tá casáhá ndóho ini na sahá tuhun Ndióxi chí jándacoo va na ña. 22 Ta tata ña nacuyu tañu tohíñú cán náha ndá quiahva ín ñayivi, na xini joho tuhun Ndióxi joo co jándacoo na íchi naxica na jihna. Ta casáhá ndicani ini na sahá ñaha ñuyiví yóho ta casáhá na cátoó na canduu cuahá ñaha cuicá nu ná ta casáhá ndicají ini na caja na ña núu. Sahá ña cán quea cúu á tátuhun tata ña co cána ñaha jáquee na nuu jáchi coó nasahnu na xihín tuhun Ndióxi. 23 Joo tata ña nacuyu nuú ñuhú vaha cán náha ndá quiahva ín ñayivi, na xini joho tuhun Ndióxi ta cándaā ini na

ñã ta cája na ñã cájji ini Ndióxi xih̄in. Java na cúú ná tátuhun yucu trigo ñã nasahan in ciento a nuú in in tata. Ta java na cúú ná tátuhun tata ñã nasahan un̄i jico uxu a nuú in in tata. Ta java na cúú ná tátuhun tata ñã nasahan oco uxu a nuú in in a — nacachi Jesús xih̄in ná.

*Sácú Jesús quiahva sahá yucu quini nána tañu trigo*

<sup>24</sup> Anda já nasacu Jesús inga quiahva nuú ñayivi ndúu cán já nacachi a já xih̄in ná:

—Tá ná casahá cacomí Ndióxi cuéntá sahá ñayivi já cacuu a tátuhun tá naxutu in dataa trigo ñã vaha nu ñúhu dá. <sup>25</sup> Joo tá sa ndúu ndihi na quíji na já naxinu coo in da coo cúní táhan xih̄in dá ta nachihin da tata yucu quini tañu trigo cán já naquee da cuahan da. <sup>26</sup> Ta tá nasahnu trigo cán ta nacasahá cána yoco a já nanduta ri yucu quini cán. <sup>27</sup> Anda já nasahan na cája chúun cán cahan na xih̄in xitoho na já nacachi na já: “Candehé ndo. Tata vaha queá nachihin ndó nu ñúhu ndo joo coo cándaã ini nde ndáchí naquixi yucu quini nanana xih̄in á yóho”, nacachi na cán xih̄in xitoho na. <sup>28</sup> Anda já nanducú ñehe da cán tuhun nu ná já nacachi da já xih̄in ná: “Ndá da coo cúní yehe, da cán cúú da nacaja ñã yóho”, nacachi da. Anda já nacachi na cája chúun nu dá cán já xih̄in dá: “Á coo cúní ndó ñã ná quihvi nde tuhun ndihi nde yucu quini cáa tañu trigo”, nacachi na xih̄in dá. <sup>29</sup> Anda já nacachi da já xih̄in ná: “Ná coo mé á jáchi tiahva náá nani tuhun ndó yucu quini jan cuu tuhun ndó yucu trigo xih̄in á. <sup>30</sup> Vaha chá ná quiahva í ñamaní cuahnu a xih̄in trigo janda

quiahva ná ndindaa tiempo jáqueé trigo. Ta tá sa jáqueé já cahnda i chuun nuú na jáqueé ña ná tavá xóo na yucu quini jihna ñúhú ta ná cató na ña tá nuhni tá nuhni ña ná chicaan ñúhu ná ña. Ta anda jáví ná játaca na trigo taán vaha na ini yáca ñaha i”, nacachi da —cáchi Jesús sácú a quiahva nu ná.

*Sácú Jesús inga quiahva saha ndíqui mostaza  
(Mr. 4:30-32; Lc. 13:18-19)*

<sup>31</sup> Ta nasacu Jesús inga quiahva nu ná já nacachi a já xihin ná:

—Tá ná xinu coo quivi cacomí Ndióxi cuéntá sahá ñayivi já cúú á tátuhun in ndíqui mostaza ña chíhin in dataa nu ñúhu da. <sup>32</sup> Cúú á ndíqui loho chága nu tóco ndihi ndíqui válí ín ñuyívi. Joo sáhnú a janda quiahva ndúu a in yíto, dó cáhnu nu ndíhi yíto nu xinu coo laa cávaha rí choho ri nu ndáha do —cáchi Jesús.

*Sácú Jesús quiahva sahá yusá naxaa  
(Lc. 13:20-21)*

<sup>33</sup> Ta nasacu Jesús inga quiahva nu ná já nacachi a já xihin ná:

—Tá ná cacomí Ndióxi cuéntá sahá ñayivi já cacuu a tátuhun tá cává táhan in ñáñáha uní táhndá náhnú harina xihin loho yusá naxaa ña ná jánañu a tóco ndihi mé yúsa cán —nacachi Jesús.

*Sácú Jesús quiahva cuití va nuú ñayivi  
(Mr. 4:33-34)*

<sup>34</sup> Xihin ndinuhu quiahva cuití najánañá Jesús tóco ndihi ña yóho nuú ñayivi. <sup>35</sup> Já nacaja Jesús ña ná xinu coo nuú ña nacachi in da profeta sanahá tá nacachi da já:

Xihín ndinuhu quiahva cuití va caħan i xihín ñayivi,  
 ta caħan i saħá ñaha naśahin jehé nu ná janda mé  
 saħa tá cámaní cava saħá saħá ñuyiví —cáchi  
 tuhun Ndióxi.

*Ndicani Jesús ña cuni cachi quiahva nasacu a  
 saħa yucu quini nanana tañu trigo cán*

<sup>36</sup> Tá nandihí nandindayí Jesús ñayivi cuaha  
 ndúu cán já naquihvi a ini vehe. Anda já nacativi  
 na xica tuun xihín a cán nu á já nacachi na já xihin  
 á:

—Ná ndicani ndó nuú nde ndía cuni cachi  
 quiahva nasacu ndó saħá yucu quini nanana tañu  
 trigo cán —nacachi na.

<sup>37</sup> Anda já nacachi Jesús já xihin ná:

—Da xútu tata vaha cúu yehe, da nachindahá  
 Ndióxi nduu ñayivi. <sup>38</sup> Ta ñúhu nu xútu u tata cúu  
 á ñayivi ñuyiví. Ta tata vaha cán cúu á yuhú nuú  
 na cómi Ndióxi cuénta saħa. Ta yucu quini cán cúu  
 á yuhú nuú ñayivi quini, na cúu cuénta rí quini.

<sup>39</sup> Ta da co cuni táhan xihín i naśahan da naxutu da  
 yucu quini nu ñúhu cán ta cúu dá yuhú nuú tiñhá  
 sacuaha. Ta tiempo jáquee na cán cúu á tá ná xinu  
 coo quiví caja víi Ndióxi saħá ñayivi ndúu ñuyiví.  
 Ta na xica jáquee cán cúu ná tátō Ndióxi. <sup>40</sup> Ta tá  
 quiahva nacaja na cán xihín yucu quini tá najátaca  
 na ña ta nachicaan ñúhu na ña quiahva já yaha ri  
 xihín ñayivi ñuyiví yóho tá ná tandaa quiví ndihí  
 saħá ñuyiví. <sup>41</sup> Ta yehe, da nachindahá Ndióxi  
 nduu ñayivi chindahá i tátō mí i ña ná cahnda java  
 táhan na na cómi i cuénta saħa xihín na co cúu  
 cuénta mí i. Jáchi na cán jácaħan na inga na caja

na cuachi xihín java ga na cája ña núu. <sup>42</sup> Ta jáqueta nuu i na ini indayá ta cán cuacu na anda quiahva chicáhñá nuhu na jáchi ndóho ndivaha ini na. <sup>43</sup> Ta anda já na cája ña cúní Ndióxi ndiyihvi ndaa na tá quiahva yéhe candii nuú cacomí Ndióxi cuéntá saha ná, mé á cúú á tátá na. Ndá na in johó, ná cuní johó na.

*Sácú Jesús quiahva sahá sató jjuhún ndácaan jehé*

<sup>44</sup> Tá ná cacomí Ndióxi cuéntá sahá ñayivi cacuu a tátuhun ña yáha xihín in dataa tá ndíñehe dá in sató jjuhún ña ndácaan jehé in ñundáhyi. Ta tá nandihí já chíjahvi tucu da ña xihín ñúhu. Ta já cávatá ndivaha da cuhun da jicó da tóco ndihí ña cómí da ña ná cueen da ñundáhyi nuú nanduxu mé sató jjuhún cán.

*Sácú Jesús quiahva sahá in jíqui sándacu na ña yahvi ndivaha*

<sup>45</sup> Tá ná cacomí Ndióxi cuéntá sahá ñayivi cacuu a tátuhun tá xíca nuu in da cája ndahvi ndúcú da jíqui sándacu na ña yahvi ndivaha. <sup>46</sup> Ta tá ndítahan da in jíqui yahvi ndivaha já cuahan da jicó da ndihí ñaha cómí da ña ná cueen da jíqui yahvi ndivaha cán.

*Sácú Jesús quiahva sahá in ñúnu tává tiyacá*

<sup>47</sup> Ta tá ná cacomí Ndióxi cuéntá sahá ñayivi cacuu a tátuhun in ñúnu jácana na nuú tañuhú ta já tiin na tá nuú tiyacá. <sup>48</sup> Ta tá sa nachutú ñúnu cán já tává na tiyacá cán yuhú tañuhú ta cán sácoo na ndacahnda java na ri. Ta rí vaha cán táan vaha na ini toyicá na joo rí núu cán xíta ri cája

na. <sup>49</sup> Quiahva já yaha ri xihín ñayivi tá ná ndihi sahá ñuyíví. Jáchí queta tátō Ndióxi ndacahnda java nā vaha tañu nā quini. <sup>50</sup> Ta ñayivi quini cán chicaoan nā ini indayá ta cán cuacu na janda quiahva chicáhñá nuhu nā jáchi ndóho ndivaha ini na —cáchi Jesús.

*Tá jánaha Jesús sahá ña saá xihín ña yatá*

<sup>51</sup> Tá nandihí já nandaca tuhún Jesús nā já ñacachi a já:

—Á cándaā ini ndó tóco ndihi ña cáhan i yóho —cáchi a.

—Ajan, cándaā ini nde ña —ñacachi nā cán xihín á.

<sup>52</sup> Anda já ñacachi Jesús já xihín ná:

—Tá jácuaha in da jánaha ley Moisés sahá ndaja ndiquiahva da mé dá ndáha Ndióxi cacomí a cuéntá saha dá já cúú dá tátuhun in dataa, da ín ñaha ini vehe. Ta xini vaha da tavá da ñaha da á cúú á ña saá á ña yatá —cáchi a.

*Tá cuahan Jesús ñuu Nazaret*

*(Mr. 6:1-6; Lc. 4:16-30)*

<sup>53</sup> Tá nandihí najánaha Jesús xihín quiahva yóho já ñaquee a cuanúhu a. <sup>54</sup> Tá ñaxinu a ñuu mé á já ñacasáhá jánaha ini veñuhu cán. Ta jandá joho cátóntó ñayivi ñuu cán já cáchi nā já:

—Ta ndájá ñacatiāhva nahá ri da yóho ña xini da. Ta ndaja cája da ñaha xituhún yóho. <sup>55</sup> Á a juú da yóho cúú jahyi da cája chúun xihín yito. Á a juú náná da yóho cúú María. Ta ñani da cúú Jacobo xihín José xihín Simón xihín Judas viti. <sup>56</sup> Ta sa mé ñuu yóho ndúu ri quiahva da jan. Ndájá



naçatiahva nahá da ña jánaḥa da nu yo, dá já —  
naçachi xihìn táhan na cán.

<sup>57</sup> Ta chí coó naḥeen na candúsa ñahá na. Sahá  
ña cán quéa naçachi a já xihìn ná:

—Vatí tóco ndihi ñayivi cája cáhnu na in profeta  
joo na vehe da xihín na ñuu da co candúsa na da —  
cáchi Jesús.

<sup>58</sup> Ta coó naçaja cuaḥá Jesús ña xitúhún ñuu cán  
jáchi coó naçandúsa toho ñayivi cán mé á.

## 14

*Tá naḥihi Juan, da naçaja ndúta ñayivi*  
(Mr. 6:14-29; Lc. 9:7-9)

<sup>1</sup> Mé tiempo cán naḥini joho Herodes, da cúu  
governador cán ña ndítúhún na saḥá Jesús. <sup>2</sup> Anda  
já naçachi da já xihìn mozo da:

—Á a juú Jesús cúu á Juan, da najácandúta ñayivi  
ta viti naḥitacu tucu da. Sahá ña cán quéa ín  
ndée da cája da tóco ndihi ña cája da yóho —cáchi  
Herodes.

<sup>3</sup> Jáchi janda mé saḥa naḥiin Herodes Juan  
naçató ñahá da ta naçicaaḥa da da vecaa. Ta  
naçaja da ña yóho saḥá Herodías, ña naçacuu  
ñájíhí Felipe, ñani da. <sup>4</sup> Jáchi mé Juan najánaḥi ñahá  
da saḥá ña ín Herodes xihìn ña ta já naçachi da:

—Co ndítahan coún xihìn ñájíhí ñanún —naçachi  
Juan xihìn dá.

<sup>5</sup> Ta janda já naḥucú Herodes cañí da Juan  
joo a cuú caja da ña jáchi yíhví da ñayivi saḥá ña  
cándúsa na ña cúu Juan in profeta naçindahá  
Ndióxi. <sup>6</sup> Joo in tañu nani ndácaḥa Juan vecaa já  
naçavaḥa Herodes víco saḥá quívi naçacu da. Ta  
naḥaça ndíhí ña cúu jaḥyi Herodías cán naçita

sáhá ña nu ndíhi na ndúu víco cán. Ta a juú quiahva nacajii ini Herodes xihín ña yóho. <sup>7</sup> Sahá ña cán quéa quivi Ndióxi tává da tá sáhan da tuhun da nu ñá cán ña quiahva da nu ña ndá ña cúni mé ñá caca ñá nu dá. <sup>8</sup> Tá nandihi nandaca tuhún jihna ñá náná ña já ndáva ñá nasahan ñá nu Herodes já cáchi ña já xihin dá:

—Viti ñuhú cúni ña ná quiahva ndó yiquí jíní Juan, da jácanduta ñayivi nuú i ini in cohó cáhnu —nacachi ñá xihin dá.

<sup>9</sup> Tá nacachi ñá já xihin Herodes já nacacuéha ndivaha ini da. Joo sahá ña sa natavá da quivi Ndióxi tá nasahan da tuhun dá nu ñá cán ta sahá ña cúni da candoo vaha da nuú na ndúu víco xihín da cán sahá ña cán quéa nasahnda da chuun ña ná quiahva na ña nu ñá. <sup>10</sup> Chí nasahnda da chuun ña ná chituhun ná yiquí jíní Juan ini vecaa cán. <sup>11</sup> Ta já nachicaan na yiquí jíní da ini in cohó cáhnu já nasahan na ña nu ñá cán. Anda já nandiquiahva ñá cán ña ndáha náná ña.

<sup>12</sup> Anda jáví naxinu na naxica xihin Juan cán já nasahan na nandiquehe na yiquí cuñu da ta najánduxu na da. Ta já nasahan na nacaxi tuhun na ña yóho nuú Jesús.

*Tá nasahan Jesús ña cuxu uhun mil tao*  
(Mr. 6:30-44; Lc. 9:10-17; Jn. 6:1-14)

<sup>13</sup> Tá naxini johó Jesús saha Juan já naquee xóo a ini in barco loho cuahan nuú co ndúu ñayivi. Joo tá naxini johó ñayivi ña cuahan Jesús já naquee na ñuu na ndíco na cuahan sáhá na nu ín a. <sup>14</sup> Ta tá nanuu Jesús barco cán já naxini a cuahá ndivaha ñayivi ta natahvi ini a saha ná. Ta chí nandaja

vaḥa mé á nā quíhvi nāquixi tañu nā cán. <sup>15</sup> Ta tá sa cáhini cuahān já nācayati nā xíca tuun xihín a cán nu á. Já cáhí nā já xihín á:

—Sa nahini va ta a juú xoo nu ndúu ñayivi quéa yóho. Ndindayí ndó ñayivi ná cuhun nā ñuu válí yati jan já ná cueen na ña cuxu na —nācachi nā cán xihín á.

<sup>16</sup> Anda já nācachi a já xihín ná:

—Cō xíní ñúhú toho quee na cuhun nā. Mé ndó quiahva ndó ná cuxu na —nācachi Jesús.

<sup>17</sup> Anda já nācachi tucu nā cán já xihín á:

—Cō mé ñaha va cuxu na yóho. Uḥun víxí pan xihín ivi laá tiyacá cuití va ín yóho —nācachi na xihín Jesús.

<sup>18</sup> —Taxi ndó a chóho —nācachi Jesús xihín ná.

<sup>19</sup> Anda já nāsaḥnda Jesús chuun ña ná ndaca nduu ndihi nā cán nuú yucu. Anda já natiin a ndíhuhun pan xihín ndíví tiyacá cán já nāsandehé a chí indiví já nāndiquiahva ndixahvi nu Ndióxi. Tá nāndihi já nāsaḥnda java pan ta nāsaḥan ña nuú nā xíca tuun xihín á cán ta nā cán nāndicaḥnda na ña nuú ñayivi cuaha cán. <sup>20</sup> Ta tóco ndihi na naxixi na janda quiahva nāchutú nā. Ta tá nāndihi naxixi na já najátaca na ña nācandōo cán ta najáchutú nā uxu ivi toyicá xihín ña nācandōo cán. <sup>21</sup> Ta tóco ndihi nā naxixi cán nāsaḥcuu na tátuhun uḥun mil ṭaa. Cō cáhan sahá najihí xihín nā válí.

*Tá naxica sáhá Jesús nuú tañuhú*

*(Mr. 6:45-52; Jn. 6:16-21)*

<sup>22</sup> Ta tá nāndihi já nācāja Jesús ña ná ndíhvi nā xíca tuun xihín á cán ini in barco ña ná cuhun

cuéé na inga xoo tañuhú cán nani candoo too mé á jándindayí a ñayivi cuaha cán. <sup>23</sup> Ta tá sa najánduta tóco ndihi ñayivi já nandaa mé á yúcu cuahan caca tahví a nu Ndióxi. Tá nandihí já nacuaá ta in túhún mé á ndacaan xíca tahví a nu Ndióxi cán. <sup>24</sup> Ta ndaja coo barco loho, dó cândojó na xíca tuun xihin á cán sa naxinu coo dó janda mahñú tañuhú cuahan do. Ta ndícojō ndivaħa tañuhú jáchi xoo cuahan na vaxi tachí. <sup>25</sup> Joo tátuhun sa cuahan tívi já xíca sáhá Jesús cuahan nuú tañuhú naxinu a nu ná. <sup>26</sup> Ta tá naxini na xíca sáhá Jesús vaxi a nuú tañuhú cán já nacatóntó na. Ta nacasáhá na cáyuhú cóhó na sahá ña yíhví na já cáchí na já:

—Ínima quea vaxi yóho —cáchí na.

<sup>27</sup> Joo ivi laá nandicaħan Jesús xihin ná já cáchí a já:

—Ndacú coo ini ndó jáchi yeħe va cúu u. A yíhví toho ndó —nacachi a xihin ná.

<sup>28</sup> Anda já nacachi Pedro já xihín Jesús:

—Xitoho i, tá ta jivi cúu mé ndó cahnda ndó chuun ña ná cuu sa a i nu ndo ta ná caca i nuú tañuhú —nacachi da xihín Jesús.

<sup>29</sup> Ta já cáchí Jesús já:

—Naha quíi —cáchí a xihin dá.

Anda já nanuu Pedro barco cán ta nacasáhá xíca sáhá da nuú tañuhú cuahan da nuú Jesús. <sup>30</sup> Joo tá naxini da tachí ndeé xíco nuú tañuhú cán já nayíhví da. Chí ivi laá nacasáhá queta nuu da cuahan da ini tañuhú. Já nacayuhú cóhó da já cáchí da já xihín Jesús:

—Chindeé ndó yeħe, xitoho i —nacachi da xihin á.

<sup>31</sup> Ta cama chá natiin Jesús ndáha da ta já nacihi a já xihin dá:

—Ndá cuéntá quéa co cándeé chága inún yehe ta nacasáhá cáhvi ivi joho inún —nacihi Jesús xihin dá.

<sup>32</sup> Ta tá nandaa ndívi na jata barco já nacatáji tachi cán. <sup>33</sup> Anda já nacija cáhnu na ñuhu ini barco cán Jesús já cáhí na já xihin á:

—Mé a ndaa táhyí cúu jivi ndusa ndó in túhún jini já jahyi Ndióxi —nacihi na xihin á.

*Tá nandaja vaha Jesús na quíhvi ndúu ñundáhyi Genesaret*

*(Mr: 6:53-56)*

<sup>34</sup> Ta já naxica loho ga na nuú tañuhú cán já naxinu coo na ñundáhyi Genesaret. <sup>35</sup> Ta tá nandicuni ñayivi ndúu cán mé á já nachindahá na chuun nasahan nuú ndaja táhan ñayivi ndúu ndijáá ñundáhyi cán. Já ñéhe ndihi na na quíhvi nacasaá na nu á. <sup>36</sup> Ta na quíhvi cán naxica tahví na nu á ña ná quiahva ñamaní cani ndaa ndáha ná yuhú jahmá níhnu a ta tóco ndihi na nacani ndaa ndáha jahmá a nandivaha na.

## 15

*Ña cája quini ínima ñayivi*

*(Mr: 7:1-23)*

<sup>1</sup> Ndaja coo java na fariseo xihin java na jánahe ley Moisés ndúu ñuu Jerusalén cán nacayati na nuú Jesús já nacasáhá cáhí na já xihin á:

<sup>2</sup> —Ndávaha co cája na xica tuun xuhun ña nacihi tásáhnu jíco yo caja na. Ndávaha xíxi na

tá cámanj ndahá nā tá quiahva sáhná ley caja na —nācachi nā cán xihín Jesús.

<sup>3</sup> Anda já nanducú ñehe Jesús tuhun nū ná já nācachi a já:

—Ta jári ndóhó va, ndá cuéntá quēa jándacoo ndó ña sáhná Ndióxi nū ndó caja ndó. Ta ña cája ndó quēa ndíco ndó costumbre mé va ndó. <sup>4</sup> Jáchi sáhná Ndióxi chuun já cáchí a já: “Caja cáhnún tátún xihín nánún.” Ta jári cáchí a: “Ndá nā ná chícaan cháhan jata tátá nā á náná nā, ndítahan quivi na”, cáchí a. <sup>5</sup> Joo ndóhó, jánaḥa ndó nuú ñayivi ña cuu cahan nā já xihín tátá nā á náná nā: “A cúu chindeé e ndohó jáchi sa nasacu xoo i ñaha i quiahva i ña nū Ndióxi”, cáchí nā. <sup>6</sup> Tá ná cachi na ña yóho já quēa cō ndúsa ga chindeé nā tátá náná nā. Quiahva johó cája ndó ta sácu xóo ndó ña nasahnda Ndióxi chuun nū ndo ta ndája ndó a tátuhun in ñaha ña coó saḥa. Jáchi ndíco cáhnu ndó ña najándacoo táśáhnū jícó ndo nū ndo. <sup>7</sup> Co cúu ndó tá quiahva ndáa ndó. Mé a ndaa nācahan profeta Isaías saḥa ndo sanahá tá nācahyí da ña nācachi Ndióxi:

<sup>8</sup> Yuhú ninu uun na cája cáhnu na yehe.

Ta cō cája cáhnu na yehe xihín ndinuhu ínima nā.

<sup>9</sup> Ta mé a uun quēa cája cáhnu na yehe,

jáchi ña jánaḥa nā nuú ñayivi cuití va cúu á ña quíxi jini mé va na, nācachi profeta Isaías sanahá ndivaha —nācachi Jesús xihín nā cán.

<sup>10</sup> Tá nandihi já nācana Jesús tóco ndihi ñayivi ndúu cán já nācachi a já xihín ná:

—Cuni johó vaha ndó ña cáhan i xihín ndó ta ná candaḥa ini ndó ña. <sup>11</sup> A juú ñaha xíxi ñayivi ndája

quini ínimã ná. Tuhun quini quéta yúhu ná ñã jan quéa cája quini ñahá —ñacachi Jesús.

<sup>12</sup> Tá ñandihí já ñacayati ña xíca tuun xihín Jesús cán nu á já ñacachi na já xihín á:

—Chí a váha mé ñacuu ini ña fariseo tá ñaxini johó na ñã ñacachi ndó jan —ñacachi ña cán.

<sup>13</sup> Ænda já ñacachi Jesús já xihín ná:

—Ñayivi, ña cõ ndíquehe váha tuhun Ndióxi cúu ná tátuhun in yító, dó cõó ñajánde Ndióxi, tátá i ñã ín indiví. Sahá ñã cõ cúu dó cuéntá mé á já tandaa quivi ñã tuhun mé á dõ anda yóhõ dõ. <sup>14</sup> Sahá ñã cán quéa cõ ndítahan ndicani ini ndó sahá ña jan jáchi ña cuaá va cúu ná. Ta a cúu toho caja in ña cuaá candaca da inga ña cuaá cõhun ña jáchi ndívi já ña ndacava da yávi —ñacachi Jesús.

<sup>15</sup> Tá ñandihí já ñacachi Pedro já xihín Jesús:

—Ndicani loho ndó nuú nde ndaja cáa ñã cáchi ndõ ñã cõ cája quini toho ñã xíxi ñayivi mé ná jáchi cõ cándaã ini nde ñã —ñacachi Pedro xihín Jesús.

<sup>16</sup> Já ñacachi Jesús já xihín ná:

—Á cõó toho xíní túní ri ndóhó va, váha. <sup>17</sup> Jáchi cõ cándaã ini ndó ñã tóco ndihí ñaha xíxi ñayivi a cúu caja quini a ña. Jáchi ñã xíxi ñayivi cõ xínu a ini ínimã ná joo xínu cõ ñã tíxi va na já queta tucu a yiquí cuñu na. <sup>18</sup> Ñã cuu ndaja quini ñayivi cúu ñã quíxi ínimã ná tátuhun tuhun cáhan ña xihín ñã cája na. <sup>19</sup> Jáchi chí ínimã ñayivi quíxi ñã cáhvi núu ini na tátuhun ñã cáhvi ini na cahní ña ndíi. Ta sã mé cán quíxi ñã cáhvi ini in ñataa cõ ña xihín ñájíhí ñani táhan ña á xihín in ñã cõ cúu ñájíhí ña. Ta sã mé cán quíxi ñã ndiáva íni ña caja cuíhná ña. Ta sã mé cán quíxi ñã cávaha jíquí ña tuhun sahá ñani táhan

da ta jári quíxi ña cána há da xihín Ndióxi. <sup>20</sup> Tóco ndihi ña cáhvi núu ini ñayivi caja na, ña yóho quéa ndája quini a na. Joo co cáquini toho ñayivi sahá ña co ndáhá na tá cámani cuxu na tá quiahva ín costumbre na —ñacachi Jesús xihín na xíca tuun xihín á cán.

*Tá ñacandeeé ini in ñá tóho Jesús  
(Mr. 7:24-30)*

<sup>21</sup> Tá ñandihí já ñaquee Jesús cuahan chí ñundáhyi cuéntá Tiro xihín cuéntá Sidón cán. <sup>22</sup> Ta nu xíca cuahan cán ñaqueta in ñáñáha ñundáhyi Canaan nu á já cáyuhú ña já cáchí ña já xihín á:

—Xitoho i, da ñaquixi chichi David caja ndó ñamani candáhví loho ini ndó yehe. Chindeé ndó jahyi jhí i jáchi rí quini ndácaan ini ñá —ñacachi ñáñáha cán xihín Jesús.

<sup>23</sup> Joo ni in túhún tuhun coó ñanducú ñehe Jesús nu ña. Anda já ñacativi na xíca tuun xihín a cán nu á já ñacachi na já xihín á:

—Taxi ndó ñá jan ná quee ñá cuhun ña jáchi cáyuhú ña ndácaa ña jata yó vaxi ña —ñacachi na cán xihín Jesús.

<sup>24</sup> Anda já ñacachi Jesús xihín ñáñáha cán já:

—Ñachindahá Ndióxi yehe vaxi i nuú ñayivi Israel cuití va, mé na cúu tátuhun ndicachi, rí ñandiñúhú —ñacachi Jesús.

<sup>25</sup> Anda já ndáva ñá cán ñaxinu coo ñá ñacaxítí ña nu Jesús já cáchí ña já xihín á:

—Caja ndó ñamaní chindeé loho ndó yehe, xitoho i.

<sup>26</sup> Anda já ñacachi Jesús já xihín ñá:



—A váha toho candaa i pan ndahá na valí ta já cana i ña nuú tina —ñacachi Jesús xihín ñá cán.

<sup>27</sup> Anda já ñacachi ñá cán já xihín Jesús:

—Mé a ndaa cáhan ndo joo anda tina, rí ndúu tixi mesa xíxi rí ña jácu yu jahyi xitoho rí —ñacachi ñá cán xihín Jesús.

<sup>28</sup> Anda já ñacachi Jesús já xihín ñá:

—Mé a ndaa cándeé cáhnu inún Ndióxi. Ná coo a tá quiahva cūni mún —ñacachi Jesús xihín ñá.

Chí mé hora já nandivaha jahyi jíhi ña.

### *Ndája vaha Jesús cuahá na quíhvi*

<sup>29</sup> Tá nandihí já ñaquee Jesús cuahan já naxinu coo a yati yuhú tañuhú Galilea. Já nandaa in jiní yúcu ta cán ñasaco a. <sup>30</sup> Ta já ñacasáhá nataca cuahá ndivaha ñayivi já ñéhe na ña quíhvi saha xihín na cuaá xihín na níhi xihín na réncó ndáha. Ta cuahá ga nuú na quíhvi ñéhe na ñacasaa na nachinduu na ña nu Jesús. Ta nandaja vaha mé á ña. <sup>31</sup> Ta xihín ña yóho a juú quiahva ñacatóntó ña tá naxini na ña ñacasáhá ndícahan na níhi. Ta ñacatóntó ña tá naxini na ña nandivaha ndahá ña réncó ta ndícaca vaha na quíhvi saha ta quiahva já nandivaha ri ña cuaá. Ta ñacasáhá ña cája cáhnu na Ndióxi, mé a cómi cuénta sahá na Israel.

### *Tá ñasahan Jesús ña cuxu comi mil natqa (Mr: 8:1-10)*

<sup>32</sup> Anda já ñacana Jesús ña xíca tuun xihín á já ñacachi a já xihín ná:

—Táhdá ndivaha ini i sahá ñayivi yóho jáchi sa naxinu uní quívi ndúu na xihín i ta chí coó ga ña cuxu na. Ta co cūni chindahá i ña nuhu ña vehe

na jáchi cámanj cuxu na ta tiahva náá cuitá nā ta cuyu na íchi —nācachi Jesús.

<sup>33</sup> Anda já nācachi nā xíca tuun xihín a cán já:

—Coó toho ñuu yati va ta ni mí, a cuú quiahva í ña cuxu na jáchi coó toho ñayivi ndúu yóho nuú cueén ña cuxu na —nācachi nā cán xihín Jesús.

<sup>34</sup> Já nācachi Jesús já:

—Ndaja pan cómi ndo.

Já nācachi nā cán já:

—Usa pan xihín java tiyaca válí.

<sup>35</sup> Anda já nāshnda Jesús chuun ña ná cacoo ndihi ñayivi nū ñúhu cán. <sup>36</sup> Ta já natiin a ndíhusa pan cán xihín java tiyaca válí cán já nandiquiahva ndixahvi nū Ndióxi. Ta já nāshnda java ña ta nāshān ña nuú nā xíca tuun xihín á cán ña ná ndicahnda na ña nuú ñayivi cuahā cán. <sup>37</sup> Ta naxixi tóco ndihi na janda quiahva nachutú tixi na. Ta tá najánditaca na ña nācandoo cán já nachutú usa toyicá xihín ña. <sup>38</sup> Ta nā naxixi cán cuú ná comi mil taa ta co cáhan sahā najihí xihín nā valí. <sup>39</sup> Ta tá nandihí nandindayí Jesús ñayivi já nandihvi a ini barco já naxinu coo a ñundáhyi cuéntá Magdala.

## 16

*Cúni nā fariseo xihín nā saduceo cuni na in ña xitúhún caja Jesús*

*(Mr. 8:11-13; Lc. 12:54-56)*

<sup>1</sup> Ta ndaja coo naxinu coo nā fariseo xihín nā saduceo nū Jesús. Ta sahā ña cúni nā coto ndojó cuití ñahá nā sahā ña cán quéa naxica nā nū á ña ná caja in ña xitúhún cuéntá indiví já ná candaa ini na

á mé a ndaa cúú á ña n̄achindahá Ndióxi. <sup>2</sup> Anda já n̄anducú ñehe Jesús tuhun nu ná já n̄acachi a já xih̄in ná:

—Tá nahini já cáchi ndo já: “Tiempo vaha ndivaha cacuu a jáchi ndíyéhe cuáhá indiví”, cáchi ndo. <sup>3</sup> Ta naha cáchi ndo já: “Viti ndusa quéa cuun ndeé ndivaha javi jáchi ín vico ndivaha ta ín vico cuáhá indiví”, cáchi ndo. Co cúú ndó tá quiahva ndáa ndó. Ndá cuéntá quéa tiahva ndó ndicuni ndó ndá quéa coo tá sándehe ndó indiví joo co tiahva ndó ndicuni ndó ndá tiempo cúú á viti. <sup>4</sup> Ñayivi quini, na co cúni candúsa Ndióxi, na cán cúú na xíca ña ná caja i ña xitúhún nu ná. Joo ni in túhún toho ñaha xitúhún a cája ga i nu ná. In túhún ña candehé na cacuu a ña tandaa quivi ndoho i tá quiahva n̄andoho profeta Jonás sanahá ndivaha —n̄acachi Jesús xih̄in ná.

Já naquee a cuahan.

*Tá sácú Jesús quiahva sahá na fariseo  
(Mr: 8:14-21)*

<sup>5</sup> Ta ndaja coo n̄axinu coo a inga xoo tañuhú xih̄in na xíca tuun xih̄in á cán ta n̄andindójó na cán cañehe na pan cuxu na. <sup>6</sup> Tá n̄andihi já n̄acachi Jesús já xih̄in ná:

—Candehé ndo. Cuéntá coo ndó xih̄in na fariseo ta xih̄in na saduceo jan jáchi ña jánaha na cúú á tátuhun yúsa n̄axaa ña cáva táhan na xih̄in harina cávaha na pan —n̄acachi Jesús.

<sup>7</sup> Joo na xíca tuun xih̄in á cán ndítuhún xih̄in táhan na ña n̄acachi Jesús já sahá ña coo pan ñehe na cuahan xih̄in ná.

<sup>8</sup> Ta tá ñacandaa ini Jesús ña cáhan na já ñacachi a já xihin ná:

—Ndá cuéntá quéa co cándee cáhnu ini ndó yehe ta cáhan ndo ña cáhí i ña yóho xihin ndo sahá ña co ñéhe ndó pan vaxi ndó. <sup>9</sup> A ñáha cándaa ini ndó. Ndítahan ndicuhun ini ndó ña nandaja cuahá i uhun víxí pan tá ñaxixi uhun mil taa. Ta sa xini ndó ndaja toyicá najáchutú ndo xihín ña ñacandoo cán. <sup>10</sup> Ta ndítahan ndicuhun ini ndó ña ñacaja i xihín usa pan tá nandicahnda i ña ñaxixi comi mil taa ta sa xini ndó ndaja toyicá najáchutú ndo xihín ña ñacandoo cán. <sup>11</sup> Ndá cuéntá quéa co cándaa toho ini ndó ña coo ñacachi i ña yóho xihin ndó sahá ña coo pan ñéhe ndó vaxi ndó. Joo ñacachi i ña cuéntá coo ndó xihín na fariseo ta xihín na saduceo jáchi ña jánaña na cúu á tátuhun yusá ñaxaa ña cává táhan na xihín harina cávaha na pan —ñacachi Jesús.

<sup>12</sup> Tá ñacachi Jesús ña yóho já ñacandaa ini na xica tuun xihín á cán ña a juú toho sahá yusá ñaxaa cáhan Jesús saha. Ña cuni Jesús cachi a xihín ná quéa cuéntá vaha ná coo na xihín ña jánaña na fariseo xihín na saduceo.

*Tá cáxi tuhun ndaa Pedro ña cúu Jesús mé á ñachindahá Ndióxi cacomí a cuéntá sahá ñayivi (Mr. 8:27-30; Lc. 9:18-21)*

<sup>13</sup> Tá ñaxinu coo Jesús ñundáhyi Cesarea cuéntá Filipo já nandaca tuhún a na xica tuun xihín á cán já ñacachi a já xihín ná:

—Ndá da cáhí ñayivi cúu yehe, da ñachindahá Ndióxi nduu ñayivi —ñacachi Jesús.

<sup>14</sup> Já ñacachi na cán já:

—Java na cáchí na ña cúú ndó Juan, da ñacaja ndúta ñayivi. Ta java na cáchí na ña cúú ndó profeta Elías. Ta java na cáchí na ña cúú ndó profeta Jeremías. Ta java na cáchí na ña cúú ndó in táhan profeta ñasanduu sanahá —ñacachi na.

<sup>15</sup> Andá já ñacachi Jesús já xihín ná:

—Ta ndóhó ri, ndá da cáchí ndó cúú u —ñacachi a.

<sup>16</sup> Andá já ñanducú ñehe Simón Pedro tuhun nu Jesús já ñacachi da já xihín á:

—Mé ndó cúú Cristo, ña ñachindahá Ndióxi cacomí cuéntá sahá ñayivi. Ta cúú ndó in túhún jiní já jahyi Ndióxi, mé a tácu ín indiví —ñacachi da.

<sup>17</sup> Andá já ñanducú ñehe Jesús tuhun nu dá já ñacachi a já xihín dá:

—Tahví ñahá cúún, Simón, jahyi Jonás jáchi ni in túhún ñayivi coó ñacaxi tuhun ña yóho xuhun. In túhún tátá i, mé a ín indiví ñanaha ña yóho nuun.

<sup>18</sup> Ta quiahva joho cáchí ri yehe saha yóhó: Yohó cúún Pedro ta quivun cúni cachi a tóto. Ta cúún tátuhun yuu ndúhu sahá in vehe nuú cavaha i veñuhu mí i jáchi yóhó caca nuún cahun sahá i nuú ñayivi já ná quee vaha na xihín tiñáhá sacuahá já ná a cuhun na indayá. <sup>19</sup> Ta caja i xuhun ña ná cuu ndicanún nuú ñayivi ndaja ndiquiahva na mé ná ndaha i cacomí i cuéntá saha ná. Cacu a tátuhun quiahva i yávi nuun ña ná cunún ichi nuú ndihvi ñayivi cacomí i cuéntá saha ná. Tá co sahun ñamani ná ndihvi ñayivi cán já quea a quiahva toho i ñamani nu ná. Joo tá sahun ñamani nu ná ndihvi na cán já quea quiahva ri yehe ñamani nu ná — cáchí a xihín Pedro.

20 Anda já nasahnda Jesús chuun nuú na xíca tuun xihín á cán ña ná a cáxi tuhun na xihín ni in túhún ñayivi ña cúú mé á Cristo, mé á nachindahá Ndióxi cacomí cuéntá sahá ñayivi.

*Tá cáxi tuhun Jesús ña quivi a  
(Mr. 8:31-9:1; Lc. 9:22-27)*

21 Ta janda mé quivi já ñacasáhá Jesús cáxi tuhun a xihín na xíca tuun xihín á ña ndítahan nu á cuhun a ñuu Jerusalén. Ta mé cán ndoho ndivaha ini a ndahá na sacuahá veñuhu xihín ndahá na sacuahá nuú jutu xihín ndahá na jánaha ley Moisés. Ta caja xíxi ri na cán va xihín á ta cahní ñahá na. Joo tá ná xinu uní quivi ndítacu tucu a.

22 Anda já natavá xóo Pedro Jesús já ñacasáhá da jánani ñahá da já ñacachi da já xihín á:

—Ama ná yaha ña yóho xihín ndó, xitoho i. Ná a quiahva toho Ndióxi ñamani ndoho ndó já — ñacachi Pedro xihín Jesús.

23 Joo ñacava nuu Jesús sándehe a nu Pedro ta já cáchi a já xihín dá:

—Cuáhán quee Satanás, rí cúú tiñáhá sacuahá. Tá quiahva ín na sáji nuu nu ná quiahva já íún nuú i. Jáchi co cáhvi ínún tá quiahva cáhvi ini Ndióxi joo cáhvi ínún tá quiahva cáhvi ini ñayivi cuéntá ñuyívi yóho — ñacachi Jesús xihín dá.

24 Anda já ñacachi Jesús já xihín na xíca tuun xihín a cán:

—Ndá na cúní candico yehe ndítahan nu ná ndihi chága ini na sahá yehe a juú ga saha mé ná. Ta ndítahan coo tiaha na ndoho ini na sahá yehe. Ta coo caja toho a ná quivi na sahá i. 25 Jáchi ndá na catóo coo chága ñuyívi yóho ndihi saha ná.

Joo ndá na sáhan ndeé ini quivi sahá i xihín sahá tuhun Ndióxi, ñehe táhvi ná catacu na anda ama cáa quivi. <sup>26</sup> Vati ná quee vaha in na ñuyivi yóho ta cómi na tóco ndihi ñaha ñuyivi yóho joo ndá chuun quea tá nu ndíhi ndihi saha ná indayá. Jáchí ni in ñaha a cuú chahvi in na saha ínima ná ña ná a cühun na indayá. <sup>27</sup> Jáchí yehe, da nachindahá Ndióxi nduu ñayivi quixi tucu u xihin ndée Ndióxi, tátá i ta xihin ndée tátó Ndióxi. Mé tiempo cán náha ndaja cáhnu cúu yehe. Anda já chahvi i nuú in in ñayivi sahá ñaha nacaja na nani nasanduu na ñuyivi yóho. <sup>28</sup> Mé a ndaa ná cahan i xihin ndo ña java na ndúu yóho a quivi toho na janda quiahva ná xinu quivi cuni na quixi tucu yehe, da nachindahá Ndióxi nduu ñayivi cacomí i cuéntá sahá na cúu cuéntá mí i —cáchi Jesús.

## 17

### *Tá nandijama nuu Jesús quiahva cáa (Mr. 9:2-13; Lc. 9:28-36)*

<sup>1</sup> Tá nayaha iñu quivi já nandaa Jesús in yucú jícó ta ndáca táhan Pedro xihin Jacobo xihín ñani da Juan cuahan na xihin á. <sup>2</sup> Ta nu táhyí mé na cán nandijama quiahva cáa. Ta a juú quiahva nandiyéhe nuu á tá quiahva ndiyéhe candii. Ta jáhma ndíxi a nandiyaa cachi ña ta chí a juú quiahva yehe ña. <sup>3</sup> Ta ndaja coo nandaca náha Moisés xihin Elías ta nacasáhá ndítuhún da xihín Jesús. <sup>4</sup> Anda já nandicahan Pedro xihin Jesús já nacachi da já xihin á:

—Vaha cúu ndúu nde yóho, xitoho nde. Tá cúni ndó cavaha nde uní vehe tiyahvá válí. In a coo

mé ndó ta inga coo Moisés ta inga coo Elías —cáchi Pedro.

<sup>5</sup> Ta nani cáhan Pedro nanuu in vico jata ná ta nacava nuu a na. Ta a juú quiahva ndató yéhe a. Ta tañu vico cán naxini johu na ña cáhan in a ta já cáchi a já:

—Da yóho cúu jahyi maní i ta cáji ini i xihin dá. Cuni johu ndó nu cáhan da —nacachi mé a cán.

<sup>6</sup> Tá naxini johu na xica tuun xihin Jesús cán ña cáhan yóho já nacaxítí na janda quiahva naxinu nuu ná nu ñúhu. Ta a juú quiahva ná yihví na.

<sup>7</sup> Anda já nacayati Jesús nu ná ta nacani ndaa ndáha na já nacachi a já xihin ná:

—Cuándacoo ndó. A cáyihví toho ndó —nacachi Jesús xihin ná.

<sup>8</sup> Ta tá nandiñehe na cán nuu ná já naxini na ña ín in túhún jini mé va Jesús.

<sup>9</sup> Ta tá nanuu na jini yucu cán já nasahnda Jesús chuun nu ná já nacachi a já xihin ná:

—A cáxi tuhun ndó ña naxini ndó yóho nuú ni in ñayivi janda quiahva ná nditacu tucu yehe, da nachindahá Ndióxi nduu ñayivi —nacachi Jesús.

<sup>10</sup> Já nacachi na cán já xihin á:

—Ndávaha cáchi na jánaha ley Moisés ña ndítahan quixi jihna ñúhú profeta Elías —nacachi na.

<sup>11</sup> Já nacachi Jesús já xihin ná:

—Mé a ndaa jihna ñúhú quixi Elías ta ndaja vaha ndihi da ñaha. <sup>12</sup> Joo mé a ndaa ná cahan i xihin ndo ña sa naquixi va Elías joo coo naxeen na ndicuni na da. Ta nacaja na tá quiahva cuni mé ná xihin dá. Ta quiahva já jándoho ri na ini yehe, da nachindahá Ndióxi nduu ñayivi —nacachi Jesús.



13 Anda jáví nacandaa ini na xíca tuun xihín Jesús cán ña cáhan Jesús saha Juan, da najácandúta ñayivi tá nacachi a ña sa naquixi va Elías.

*Tá nandaja vaha Jesús in da loho ndácaan ínima quini ini*

*(Mr. 9:14-29; Lc. 9:37-43)*

14 Ta tá sa nanuu na ta naxinu coo na nu ndúu cuahá ñayivi cán já naxinu coo in dataa ta já nacaxítí da nu Jesús. Já nacachi da já xihín á:

15 —Candáhví loho ini ndó jahyi i, xitoho i jachi xíhi yíhí da ta ndóho ndivaha ini da. Ta cuahá tañu ndícava da nu ñúhu ita á ini ticuí. 16 Ta ñéhe e da nacasaa i nuú na xíca tuun xihín ndó yóho joo coo nacuu ndaja vaha na da —nacachi da xihín Jesús.

17 Anda já nacachi Jesús já:

—Ndáhví nahá nacuu ndó jachi sa cuahá ndivaha quívi ín i xihín ndo ta a ñaha candeé ini ndó yehe. Cúu ndó ñayivi quini ndivaha chí co ndeé ga ini i xihín ña cája ndó. Taxi ndó taa loho jan chóho —nacachi Jesús.

18 Anda já najánani Jesús rí quini ndácaan ini da loho cán. Chí naqueta rí cuahan ri ta mé hora já nandivaha da loho cán.

19 Tá nandihi já nacahan jehé na xíca tuun xihín Jesús cán xihín á já nacachi na já:

—Ndávaha coo nacuu caja nde tavá nde ínima quini nasandacaan ini da loho jan —nacachi na xihín Jesús.

20 Já nacachi Jesús já xihín ná:

—Coo nacuu caja ndó jachi co candeé cáhnu ini ndó yehe. Mé a ndaa cáhí i xihín ndó, loho tíin ndivaha cáa in ndíqui mostaza joo ndúu dó in yító

cáhn̄u. Tá cánd̄eé loho ini ndó yehe viti vaxi quivi cánd̄eé chága ini ndó yehe. Anda jáví cuu caja ndó in ñaha ihvi ndivaha tátuhun ña cuu cachi ndó xihín in yucu ña ná caxoo a ta chí caxoo ndusa ña. Tóco ndihi ñaha cuu caja ndó tá ná cánd̄eé ini ndó yehe. <sup>21</sup> Joo tá cúni ndó tavá ndó ínima quini tátuhun rí yóho xíní ñúhú cajuhun ndó ta caça tahví ndó nu Ndióxi —cáchi Jesús xihín ná.

*Tá cáxi tuhun tucu Jesús ña quivi a  
(Mr. 9:30-32; Lc. 9:43-45)*

<sup>22</sup> Ta ndaja coo xíca tútú ndihi na xíca tuun xihín Jesús cán cuahan na xihín á chí estado Galilea. Ta já nandicani Jesús nuú na cán ña tandaa quivi ndiquiahva ñayivi mé á ndáha na cahní ñahá, mé a nachindahá Ndióxi nduu ñayivi. <sup>23</sup> Ta nacachi a xihín ná ña tá sa ná yaha uní quivi já nditacu tucu a. Tá nacachi Jesús ña yóho xihín na xíca tuun xihín á cán já nacacuéha ndivaha ini na.

*Tá nachahvi Jesús jjuhún impuesto cuéntá veñuhu cáhnu ñuu Jerusalén*

<sup>24</sup> Tá naxinu coo Jesús ñuu Capernaum xihín na xíca tuun xihín á já naxinu coo na játaca jjuhún impuesto cuéntá veñuhu nu Pedro. Já nacachi na já xihín dá:

—Á co cháhvi toho Jesús, da jánaha ndohó jan jjuhún impuesto cuéntá veñuhu ñuu Jerusalén — nacachi na xihín Pedro.

<sup>25</sup> Anda já nacachi Pedro já:

—Cháhvi a ña —nacachi da.

Anda já nandihvi Pedro ini vehe nu ndácaan Jesús joo jihna ñúhú nandicahan Jesús xihín dá já nacachi a já:

—Ndíá cáhvi inún, Simón. Yo já ndítahan nuu cháhvi jìuhún cuéntá impuesto nuú nà sáhndá chuun ñuyívi yóho. Á nà ñuu mé ná á nà ñuu tóho —nācachi Jesús.

<sup>26</sup> Já nācachi Pedro já:

—Nā tóho va sá cháhvi jìuhún cája na —nācachi Pedro.

Já nācachi tucu Jesús já:

—Sahá ñā cán quēā mé nā ñuu cō cháhvi toho na. <sup>27</sup> Joo mí cō cúnì yō ñā ná ndicuīta na xohō sahá ñā cán quēā cūhún tañuhú. Ta mé cán tavún tiyacá. Ta rí nū cuítí ná tavún jan candehún yúhu rí jáchi jan nditáhún in jìuhún cāa. Ta cañehe a cūhūn cháhvún saha mún ta saha mí ì jáchi queta va —nācachi Jesús xihìn Pedro.

## 18

*Ndícani Jesús ndá nā cúú nā ìn chága saha  
(Mr. 9:33-37; Lc. 9:46-48)*

<sup>1</sup> Mé tañu já nācayati nā xíca tuun xihìn Jesús nu á já nācasáhá ndáca tuhún ñahá nā já nācachi na já xihìn á:

—Yo já cacuu da cáhnu chága tá ná tandaa quivi cacomí Ndióxi cuéntá saha ñayivi —nācachi na xihìn Jesús.

<sup>2</sup> Anda já nācana Jesús in da loho já nasacandichi a da mañhú java nā cán. <sup>3</sup> Já nācachi a já:

—Mé a ndaa ná cahan ì xihìn ndo ñā ndítahan ndaja núu ndó mé ndó ta nduu ndó tátuhun nā valí já cuu cacomí Ndióxi cuéntá saha ndo. <sup>4</sup> Nā cúnì cacuu nā cáhnu chága tá cacomí Ndióxi cuéntá saha ñayivi ndítahan nduu na tátuhun in nā cōó saha ta

já nduu na tátuhun taa loho yóho. <sup>5</sup> Ta ndá na ná ndiquehe in aloho tátuhun da yóho sahá ña cúni na yehe, na cán cúu na ndíquehe ri na yehe viti.

*Tá jándacava ñayivi inga na nuú cuachi*  
(Mr. 9:42-48; Lc. 17:1-2)

<sup>6</sup> Ta ndá na ná jándacava in na ndahví, na cándeé ini yehe nuú cuachi janda vaha chága ná candico in yuú yojó jico ná ta ná ndihi sahá na cahá tañuhú. <sup>7</sup> Ndahví nahá nacuu ñayivi ñuyívi yóho jáchi mé a ndaá in cuahá ndivaha ña núu ñuyívi yóho. Ña cán quéa ndácava cuahá ñayivi nuú cuachi joo ndahví nahá nacuu na jándacava inga na nuú cuachi.

<sup>8</sup> 'Sahá ña cán quéa tá ndaha ndo á saha ndo jándacava ndohó nuú cuachi, chituhun ndó a ta jácana xíca ndó ña ná cuhun a. Jáchi vaha chága ná cuhun réncó ndó á lundu ndó indiví a juú ga ña ná cuhun níi yiquí cuñu ndó indayá nu cáyí ñúhu ita anda ama cáa quívi. <sup>9</sup> Ta tá nduchú núu ndo jándacava ndohó nuú cuachi, tavá ndó ña ta jácana xíca ndó ña ná cuhun a. Jáchi vaha chága ná cuhun ndó indiví xihín in tuhún nduchú núu ndo a juú ga ña ná cuhun ndó xihin ndívi nduchú núu ndo indayá nu cáyí ñúhu ita.

*Tá sácú Jesús quiahva sahá in ndicachi, ri nandiñuhú*  
(Lc. 15:3-7)

<sup>10</sup> 'Coto a quéhe núu ndó ni in na cúu cuénta mí i jáchi cáchí i xihin ndó ña táto Ndióxi, mé na ndaá na cán níi tiempo ndíta na nu Ndióxi, tátá i indiví. <sup>11</sup> Jáchi yehe, da nachindahá Ndióxi nduu ñayivi naquixi i jácacu u ñayivi, na cáa cuachi.

12 'Cuni johō ndó ná cahān i xihīn ndo: Tá cómí in dātaa in ciento ndicachi ta tá ndiñúhú in rí já quéa ña cája da quéa jándacoo da comi jíco sahun comi rí cán yúcu ta já quee da cūhun da ndinducú da mé rí nandiñúhú cán. 13 Ta tá ndiñehe dá ri cajii chága ini da saha rí nandiñúhú cán a juú ga sahá comi jíco sahun comi rí sa ndúu nu dá cán. 14 Ta quiahva já ndoho ri Ndióxi, tátá i jáchi cō cūni mé á ña ná ndihi sahá ni in na cāndeé ini mé á.

*Ndítahan caja cáhnu ini sahá ñani táhan í  
(Lc. 17:3)*

15 'Tá cája quini ñani táhan ndó xihīn ndo já quéa tavá xóo ndó da ta cahān ndó xihīn dá ña ná ndicuni da ña a váha toho cája da. Ta tá ná tahvi ini da sahá cuachi cája da já quéa sa nandiquehe táhan mañi tucu ndó xihīn dá. 16 Joo tá cō cūni da cuni johō da nu cáhān ndo já quéa ndítahan nu ndó cana ndó in á ivi chága ñani táhan ndó já ná cacuu na testigo sahá ña cáhān ndo. 17 Ta tá cō cūni da cuni johō da nu cáhān na cán xihīn dá já quéa ndítahan cūhun ndó nu tóco ndihi na cúu cuéntá Jesús táca veñuhu. Ta tá cō cūni da cuni johō da nu cáhān ndihi na cán xihīn dá já quéa ndítahan caja ndó xihīn dá tá quiahva cája ndó xihīn in da tóho, da cō cándúsa Ndióxi á in da játaca jiuhún cuéntá impuesto.

18 'Mé a ndaa ná cahān i xihīn ndo ña tóco ndihi ñaha ná cató ndo ñuyíví yóho candico a janda indiví. Ta tóco ndihi ña ná ndaxí ndo ñuyíví yóho janda indiví ndaxi ña.

19 'Ta jári cáhān i ña yóho xihīn ndó. Tá jándique táhan tuhun ivi ndó ñuyíví yóho ta tá mé a ndaa in

cúú ndó sahá ña xíca tahví ndó nu Ndióxi, mé á ín indiví já queá quiahva tátá i ña nu ndo. <sup>20</sup> Jáchi nu ndúu i vi á uní na ta táca na cuéntá mí i já queá tañu na cán ndacaan i —nacachi Jesús.

*Tá sácú Jesús quiahva sahá in da co cuni caja cáhnu ini da sahá inga da*

<sup>21</sup> Ta ndaja coo nacayati Pedro ndáca tuhún da Jesús já nacachi da já:

—Xitoho i, ndaja tañu xíní ñúhú caja cáhnu ini i sahá ñani táhan i tá cája núu da xihín i. Á ndítahan nuú i caja cáhnu ini i saha dá janda usa tañu —nacachi da xihín Jesús.

<sup>22</sup> Já nacachi Jesús já xihín dá:

—A juú janda usa tañu cuití ndítahan caja cáhnu inún sahá ñani táhún. Vaha janda comi ciento comi jíco uxu tañu ndítahan nuun caja cáhnu inún sahá ñani táhún.

<sup>23</sup> Cáchi i ña yóho xihín ndó jáchi tá cómi Ndióxi cuéntá sahá ñayivi cúú á tátuhun ña nayaha xihín in rey tá nacasáha da jataca da cuéntá nuú na yíca nu dá. <sup>24</sup> Mé tañu já ñéhe na in da yíca cuahá millón nu dá nacasaá na. <sup>25</sup> Ta sahá ña coo nacuu chahvi da ña yíca da sahá ña cán queá nasahnda rey chuun ña ná jíco na mé dá xihín ñájihí da xihín jahyi válí da ta janda ñaha da viti ña ná cuu ndiquehe rey cán cuéntá da. <sup>26</sup> Anda já nacaxítí da yíca cán nu mé rey já nacasáha xíca tahví da já cáchi da já: “Caja ndó ñamaní, xitoho i candati too chága ndó yehe, ndáhví i, já chahvi ndihi i ña yíca i nu ndo”, nacachi da xíca tahví da nu rey cán. <sup>27</sup> Anda já nacandáhví ini rey cán da ta nacaja

cáhn̄u ini a saḥa tóco ndiḥi ña yíca da ja najani a da cuah̄an da.

<sup>28</sup> Ta tá naqueta da yíca cán cuah̄an da ja nandique táhan da xih̄in inga da cúu mozo. Ta mé mozo cán yíca da loho va nuú da cán. Ta ja nacasáha da ndaca yih̄i da cuénta nuú da cúu mozo jácuahnú ñahá da. Já cáchi da ja: “Chahvún ña yícun nuú i”, cáchi da cán. <sup>29</sup> Anda ja nandacava xítí mé da cúu mozo cán nu dá ja nacasáha xíca tahví da nu dá ja cáchi da ja xih̄in dá: “Cajún ñamani candati tóo chágun yehe, ndáhvi i, ja chahvi ndiḥi i ña yíca i nuun”, nacachi da cúu mozo cán. <sup>30</sup> Joo coo naxeen da ta ña nacaja da quea nasahan da nachicaan da da cúu mozo cán veca janda quiahva ná cuu chahvi ndiḥi da ña yíca da nu dá. <sup>31</sup> Ta tá naxini java ga na cúu mozo cán ña yóho ja nandih̄iv̄i ndivaha ini na ta chí ndáva na nasahan na nacaxi tuhun na nu mé rey cán ndaja cáa ña nacuu. <sup>32</sup> Anda ja xójo ndivaha ini mé rey cán chí nacana da da nasayíca cán ja nacachi da ja xih̄in dá: “Mozo quini ndivaha cúu yóho. Cuahá ndivaha jiuḥun nasayícun nuú i joo nacaja cáhn̄u ini i saḥa tóco ndiḥi a jáchi naxíca tahvún nuú i. <sup>33</sup> Quiahva ja ndítahan ri nu yóho va caja cáhn̄u inún saḥá ña yíca ñani táhún nuun jáchi ja nacaja i xuhun”, nacachi rey cán. <sup>34</sup> Ta saḥá ña xójo ndivaha ini mé rey cán xih̄in dá saḥá ña cán quea nandiquiahva da da yíca cán ndáha na jácaxáhan ñahá cán janda quiahva ná chahvi da saḥa tóco ndiḥi ña yíca da —cáchi Jesús.

<sup>35</sup> Já nacachi tucu Jesús ja:

—Quiahva ja caja ri Ndióxi, tátá i, mé a ín indiví

xihin ndóhó va tá cō cája cáhnu ini ndó sahá ñani táhan ndó xihín ndinuhu ini ndó —cáchi Jesús.

## 19

*Jánaha Jesús nuú na sa natandaha ña cō ndítahan jándacoo táhan na*

*(Mr. 10:1-12; Lc. 16:18)*

<sup>1</sup> Tá nandihí naçachi Jesús ña yóho já naçuee a estado Galilea já naxinu cōo a estado Judea, ña ín inga xoo yuta Jordán cán. <sup>2</sup> Ta a juú quiahva cuhá ñayivi nandico jatá ta nandaja vaha mé á na quíhvi.

<sup>3</sup> Joo ndaja coo java na fariseo naçayati na nu Jesús sahá ña coto ndojó ñahá na cúní na. Já naçachi na já xihín á:

—Á núná nuú in dataa jándacoo da ñájihí da saha ndá ña naçuu —naçachi na fariseo cán.

<sup>4</sup> Anda já naçachi Jesús já:

—Á a ñaha cahvi ndó tuhun Ndióxi nu cáchi a ña janda mé saha tá naçavaha Ndióxi ñayivi nu cuítí já naçavaha dataa ta naçavaha ñáñáha. <sup>5</sup> Ta naçachi tucu a ña ndítahan nuú dataa jándacoo da tátá da xihín náná da já ndique táhan da xihín ñájihí da. Já xinu ndíví na cán cacuu na tátuhun in víxí yiquí cuñu na. <sup>6</sup> Sahá ña cán quéa cō cúu ga na ivi yiquí cuñu sahá ña nanduu na tátuhun in tuhún yiquí cuñu na. Sahá ña cán quéa cō ndítahan nuú da cán janí táhan da ña najácatáhan Ndióxi tá natandaha ná —naçachi Jesús.

<sup>7</sup> Anda já nandaca tuhún tucu na cán Jesús já naçachi na já:



—Joo já cachi ndó xihín nde: ndá cuéntá quéa nasahnda ri Moisés chuun ña cuu cavaha in dataa in tutu quiahva da nu ñájíhí da ta xihín ña cán cuu jándacoo da ña —ñacachi na cán xihín Jesús.

<sup>8</sup> Já ñacachi Jesús já:

—Sahá ña táhyí ndivaha ínima ndo sahá ña cán quéa sahan Moisés ñamaní nu ndó ña cuu cavaha ndó tutu quiahva ndó nu ñájíhí ndo ña ná jándacoo ndó ña. Joo tá ñacavaha Ndióxi ñayivi nu cuítí cóo ñacacúni toho a coo ña yóho. <sup>9</sup> Cuni johó ndó ná cahan i xihín ndo. Tá ná jándacoo in dataa ñájíhí da ta có cúú á sahá ña ñacaja ñá cuachi xihín inga ta ta tá tándaha dá xihín inga ñá já quéa cája da cuachi nu Ndióxi. Ta quiahva já in ri cuachi da ná tandaha xihín ñá ñacandoo cán —cáchi Jesús.

<sup>10</sup> Tá ñaxini johó na xíca tuun xihín Jesús cán ña yóho já ñacachi na já:

—Tá ta quiahva já cáa janda vaha chága ná a tándahá ñayivi, dá já —ñacachi na cán.

<sup>11</sup> Já ñacachi Jesús já:

—A juú ndihi ñayivi candaa ini ña cahan i yóho. Ndinuhu na ndínuna xíní túní cája Ndióxi, na cán cúú na candaa ini ña yóho. <sup>12</sup> Ndúu java dataa ta a cuú tandaha da jáchi já ñacacu da ta já ta cúú mé va da. Ta java da a cuú tandaha da jáchi já ñacaja ñayivi xihín ná ta já ta cúú mé va na. Ta java da a tándaha da jáchi cúni da ndiquiahva ní da mé dá nu Ndióxi ña ná cacomí a cuéntá saha dá. Ta ndá ndó, na ndínuna xíní túní, candaa ini ndó ña yóho —ñacachi Jesús.

*Cája yíi Jesús na valí  
(Mr. 10:13-16; Lc. 18:15-17)*

<sup>13</sup> Tá nandihí já ñéhe na java na valí ñacasaa na nu Jesús ña ná chinúu a ndahá a jiní ná ta já caca tahví a nu Ndióxi saha ná. Joo ndaja coo na xica tuun xihin á cán ñacasáhá na cája cuehe na xihin na ndáca na valí cán. <sup>14</sup> Já ñacachi Jesús xihin na xica tuun xihin á cán já:

—Quiahva ndó ñamaní ná quixi na valí nuú i ta a cáji nuu ndó nu ná jáchi cacomí Ndióxi cuéntá sahá ñayivi tá ná caja na tá quiahva cája na valí yóho —ñacachi Jesús.

<sup>15</sup> Tá nandihí já ñachinúu Jesús ndáha á jiní na valí cán. Anda já ñaquee a cuahan.

*Ndítuhún in da cuicá xihin Jesús  
(Mr. 10:17-31; Lc. 18:18-30)*

<sup>16</sup> Ta ndaja coo ñaxinu in dataa nu ín Jesús ta nandaca tuhún ñahá da já ñacachi da já:

—Maestro, mé ndó cúu ndó taa vaha ña cán quea ndáca tuhún i ndohó ndía ndítahan caja i já ná ñehe táhvi i cuhun i indiví coo i anda ama cáa quivi —ñacachi da xihin Jesús.

<sup>17</sup> Já ñacachi Jesús já xihin dá:

—Ndá cuéntá quea cáchún xihin i ña cúu u da vaha. Ni in tuhún toho ñayivi coo cúu ná na vaha ñuyivi yóho. In tuhún Ndióxi cuití va quea vaha. Tá cúnun catacún nu ín mé á já quea xini ñnúhú cajún ña sáhdá tuhún Ndióxi —ñacachi Jesús xihin dá.

<sup>18</sup> Já ñacachi da cán já:

—Ndá cúu mé ña ndítahan caja i —ñacachi da.

Já ñacachi Jesús já xihin dá:

—Coto a cáhnún ndii. Coto a cóun xihin ñájíhí á yí ñani táhún. Coto a cája cuíhnún. Coto a cáhun ña tuhún sahá ñayivi. <sup>19</sup> Ndítahan caja cáhnún tátún

xih̄in nánún. Ta ndítahan quih̄vi inún ñani táhún tá quiah̄va quih̄vi inún mún —ñacachi Jesús.

<sup>20</sup> Já ñacachi da yúta cán já xih̄in á:

—Janda ña loho ñasacuu u ñacasáhá i cája i tóco ndihi ña sáhndá Ndióxi caja i. Ndía cúu ga ndítahan caja i —ñacachi da.

<sup>21</sup> Já ñacachi Jesús já xih̄in dá:

—Tá ña cúnun cacuún in ña ndacú nu Ndióxi cuáhán jicún tóco ndihi ñahún ñan ta ndacahndún jih̄un ñan nuú ña ndahví já ñeh̄e táhvun coo cuahá ñahún indiví. Ta tá ñandih̄i já quisún candicún yehe —ñacachi Jesús.

<sup>22</sup> Tá ñaxini joho da yúta cán ña yóho já ñaquee cuéha ndivaha da cuahan da jáchi da cuicá ndivaha cúu dá.

<sup>23</sup> Anda já ñacachi Jesús xih̄in ña xica tuun xih̄in á cán já:

—Mé a ndaa ná cachi i xih̄in ndó ña ndaja yáncá ndivaha cáa já ndiquiah̄va ña cuicá mé ná ndáha Ndióxi ña ná cacomí a cuéntá saha ná. <sup>24</sup> Jáchi janda cama chága cuu yaha in camello ini in yávi sahá yitucú a juú ga ña ná ndiquiah̄va in da cuicá mé dá ndáha Ndióxi ña ná cacomí a cuéntá saha dá —ñacachi a.

<sup>25</sup> Tá ñaxini joho ña xica tuun xih̄in Jesús cán ña yóho já ñacatóntó ndivaha na ta ñandaca tuhún táhan na já cáchi ña já:

—Ndá ña cúu ña cuu cacu ndaa ínima, dá já — cáchi ña.

<sup>26</sup> Ñandicoto nihni Jesús nu ná já ñacachi a já xih̄in ná:

—Ni in na a cúu caja ña yóho joo Ndióxi quéa cuu caja ña jáchi ni in ñaha co íhvi toho nu Ndióxi — ñacachi Jesús.

<sup>27</sup> Anda já ñacachi Pedro já:

—Joo ndehe, najándacoo ndihi nde ñaha nasacomí nde ta ndíco nde ndohó. Ndía ñehe táhvi nde caja ndó —ñacachi Pedro xihín Jesús.

<sup>28</sup> Anda já ñacachi Jesús já xihín dá:

—Mé a ndaa ná cachi i xihín ndo. Tá ná tandaa quivi nduu saá tóco ndihi ñaha já cacoo yehe, da ñachindahá Ndióxi nduu ñayivi nuú ndicáhu ndivaha i. Ta cán cacoo ri ndóhó, na ñaxica tuun xihín i nuú uxu ivi táyi vaha. Ta cán caja víi ndó sahá ndíhuxu ivi táhnda na ñaquixi chichi Israel. <sup>29</sup> Ta ndá na najándacoo vehe na á ñani na á quiahva na á tátá na á náná na á ñájíhí na á jahyi na á ñundáhyi na sahá yehe, na cán cúu na ñehe ná cuaha chága ví ñaha. Ta jatá ña cán ñehe táhvi ná catacu na nu Ndióxi anda ama cáa quivi. <sup>30</sup> Ta ndúu cuahá na ín saha ñuyíví yóho viti joo vaxi quivi cacuu na na coó saha nu Ndióxi. Ta ndúu cuahá na coó saha ñuyíví yóho viti joo vaxi quivi cacuu na na ín saha nu Ndióxi —ñacachi Jesús.

## 20

### *Sácú Jesús quiahva sahá java da sáhnda uva*

<sup>1</sup> Já ñacachi Jesús já sácú a quiahva:

—Nuú cacomí Ndióxi cuénta sahá ñayivi cúu á tátuhun ña yóho: Ín in dataa naha chá ñaquee da cuahan da nducú da mozo caja chúun da cahnda da uva nu ñúhu dá. <sup>2</sup> Ta ñacandoo da chahvi da in jiuhún caa naní denario in quivi. Ta já

nachindahá da mé mozo cán cuahān da caja chūun da nu ñúhu dá. <sup>3</sup> Tá nandihí já ñaquee tucu da xihín ñaha ñúhu cán tátuhun caa in naha já nanditahan da java da ndúu núná uun nuú yahvi. <sup>4</sup> Já ñacachi mé da xihín ñaha ñúhu cán já: “Cuáhán ri ndóhó va cahnda ndó uva nu ñúhu i ta já चाहवि i ndohó tá quiahva ndítahan nu ndó quehe ndó”, ñacachi da. Já ñaquee mozo cán cuahān da jáquee da nu ñúhu dá. <sup>5</sup> Ta tá ñacuu caxivi já ñaqueta tucu da xihín ñaha ñúhu cán cuahān da ta ñatiin da java ga da caja chūun xihín dá. Ta tá ñacuu caa uni ñatiin chága da da jáquee nu ñúhu dá. <sup>6</sup> Ta tá ñacuu tátuhun caa uhun sahini ñaqueta tucu da ta nuú yahvi cán ñaxini chága da da ndúu núná uun. Já ñacachi da já xihín da ndúu cán: “Ndá cuéntá quea sa ñacuu ndivi yaa ndúu ndó yóho”, ñacachi da xihín da ndúu cán. <sup>7</sup> Ta nanducú ñehe da cán tuhun já cáchí da já: “Cō cāja chūun nde jáchí coō ña quixi ndúcú nde caja chūun nde”, ñacachi da cán. Anda já ñacachi da xihín ñaha ñúhu cán já: “Cuáhán ri ndóhó va cahnda ndó uva nu ñúhu i. Ta já चाहवि i ndohó tá quiahva ndítahan nu ndó quehe ndó”, ñacachi da.

<sup>8</sup> Ta tá sa ñacuaá já ñacachi da xihín ñaha ñúhu cán xihín da cómi chuun nu mozo cán ña ná cana da da cúu mozo cán já ná quehe yahvi da sahá chuun ñacaja da. Ta da ñaquihvi ñacaja chūun nu ndihí cán, da cán cúu da jihna ñúhú ná quehe yahvi. Tá nandihí cán ná quehe yahvi da ñaquihvi nu cuítí. <sup>9</sup> Anda já ñacasaā da ñaquihvi caja chūun caa uhun sahini já ñaquehe in in da cán in denario. <sup>10</sup> Ta ndaja coo tá ñacani a nuú da ñaquihvi caja chūun janda naha cán quehe yahvi

da já quéa nacaḥán da ña cuaḥa chága jiuḥún ndiquehe da nuú da naquihvi caa uḥun saḥini cán. Joo quiahva já in denario naquehe ri in in da cán. <sup>11</sup> Sahá ña cán quéa nacasáhá da cáḥan cuachí da xihín da xihín ñaha ñúḥu cán. <sup>12</sup> Já nacachi da já: “Da nandai cuu caja chúun nu ndíhí cuíi yóho in hora cuití nacaja chúun da. Ta tá quiahva nachahvi ndó ndeḥe, da nacaja chúun ndiví yaa nu ndítahyí quiahva já nachahvi ri ndó nuú da cáa va”, nacachi da cáḥan cuachí da cán. <sup>13</sup> Anda já nacachi da xihín ñaha ñúḥu cán xihín in táhan mozo cán já: “Candehé, amigo. Co cája quini toho i xuhun. Á a juú in denario nacandoo i chahvi i nuun. <sup>14</sup> Júhun ña ndítahan quehún ta cuanúḥun. Jáchi cúni chahvi i nuú da nacaja chúun in hora cuití va tá quiahva nacandoo i chahvi i nu yóho. <sup>15</sup> Jáchi núná nuú i caja i ña cúni mí i xihín jiuḥún i. Ta co ndítahan cahihvi inún saḥá ña vaḥa ini i”, nacachi da xihín ñaha ñúḥu cán xihín da cáḥan cuachí cán —nacachi Jesús sácú a quiahva.

<sup>16</sup> Ta nacachi tucu a já:

—Sahá ña cán quéa ndúu cuaḥá na íin saḥa ñuyiví yóho viti joo vaxi quivi cacuu na na coó saḥa nu Ndióxi. Ta ndúu cuaḥá na coó saḥa ñuyiví yóho viti joo vaxi quivi cacuu na na íin saḥa nu Ndióxi —nacachi a.

*Cáxi tuḥun tucu Jesús ña quivi a*  
(Mr. 10:32-34; Lc. 18:31-34)

<sup>17</sup> Ta tá sa naquee tucu Jesús cuaḥan chí Jerusalén já íchi cán natavá xóo a ndíḥuxu ivi na xíca tuun xihín á cán já nacachi a já xihín ná:

18 —Candehé ndo. Yóho ndáa í cuahān yó chí Jerusalén nuú ndiquiahva na yehe, da nāchindahá Ndióxi nduu ñayivi ndahá nā sacuaḥa nuú jutu xihín nuú nā jānaha ley Moisés. Ta nā cán cúú nā cacu ini sahá ndaja quivi i. 19 Anda já ndiquiahva na yehe ndahá nā tóho ña ná cuacu ndaa na yehe. Ta cani na yehe ta já cata caa na yehe ndica crúxu joo tá ná yaha unī quivī já nditacu tucu ũ —ñacachi Jesús.

*Tá naxica náná Jacobo xihín Juan ñamanī nuú Jesús*

*(Mr. 10:35-45)*

20 Anda já ñacayati ñájíhí Zebedeo, ña cúú náná Jacobo xihín Juan nuú Jesús. Ta ndáca ña ndíví jahyi ña ñacasaa ña ñacaxítí ña nu á jáchi cúni ña caca ña in ñamanī nuú Jesús. 21 Anda já ñacachi Jesús já xihín ña:

—Ndá quéa cúni ndó —ñacachi a.

Já ñacachi ña cán já:

—Ña cúni quéa ná caja ndó ñamanī cahnda ndó chuun ña ná cacoo in in jahyi i xoo jíin ndó. In da xoo cuáha ta in da xoo íti jíin ndó indiví tá ná cacomí ndó cuéntá sahá ñayivi —ñacachi ña cán.

22 Anda já ñacachi Jesús já xihín ña:

—Co cándaā ini ndó ña xica ndó nuú i —ñacachi a.

Anda já ñacachi a já xihín Jacobo xihín Juan cán:

—Á cuu ndoho ini ndó tá quiahva nditahan nuú i ndoho ini i. Jáchi ña vaxi nuú i ndoho ini i cúú á tátuhun coho i in yáxi ndutá ova. Á íin tiaḥva ndó ndoho ini ndó tá quiahva ndítahan nuú i ndoho

ini i anda quiahva ná quivi i —nacachi Jesús xihin ndívi da cán.

—Cuu caja nde ña —nacachi ndívi da cán xihin Jesús.

<sup>23</sup> Anda já nacachi tucu a já xihin dá:

—Mé a ndaa tandaa quivi coho ndó ña ova ñuhu in yáxi, mé ña coho i. Ta tandaa quivi ndoho ndivaha ini ndó tá quiahva ndoho ini i anda quiahva ná quivi i. Joo sahá ña xíca ndó cacoo in ndó xoo cuáha i ta in ndó xoo íti i a juu yehe cúu dá cuu quiahva i ña nu ndo. Jáchi sa nandicaxi Ndióxi na ñehe táhvi cacoo cán —nacachi a.

<sup>24</sup> Joo ndaja coo tá naxini joho ndíhuxu chága na xíca tuun xihín Jesús cán ña yóho já nacasáhá na xójo ini na xihin ndívi da cúu ñani cán. <sup>25</sup> Anda já nacana Jesús tóco ndihi na xíca tuun xihín a cán já nacachi a já xihin ná:

—Sa xini ndó ndaja cája na sáhdá chuun nuú ñayivi ndúu ñuyívi yóho. Ña cája na quea jácandíhi na ñayivi ta cája na tá quiahva cúni mé ná. <sup>26</sup> Joo co ndítahan coo ña cán tañu mé ndó jáchi ndá da cúni cacuu da cáhnu chága tañu ndó xini ñuhú cacuu da in da cája chúun cuéntá ndihi ndó. <sup>27</sup> Ta ndá da cúni cacuu da nu cuítí tañu ndóhó ndítahan cacuu da da cája ndívi nuú ndihi ndó. <sup>28</sup> Jáchi ni yehe, da nachindahá Ndióxi nduu ñayivi coo naquixi i ñuyívi yóho ña ná caja ndívi ñayivi nuú i. Ña naquixi i caja i quea caja ndívi i nu ná ta ndiquiahva i mí i quivi i já ná cuu cacu ndaa ínima cuahá ñayivi ná a cùhun na indayá —nacachi a.

*Tá nandaja vaha Jesús ivi da cuaá  
(Mr. 10:46-52; Lc. 18:35-43)*



<sup>29</sup> Ta tá naqueta Jesús ñuu Jericó xihín na xíca tuun xihín á cán já ndíco cuahá ndivaha ñayivi jatá cásahan na. <sup>30</sup> Ta ndaja coo yati jín íchi cán nasanduu coo ivi da cuaá ta tá naxini joho da ña yáha Jesús cuahan já nacasáhá ndíví da cáyuhú da já cáchí da já:

—Jesús, da naquixi chichi David, caja ndó ñamaní candáhví loho ini ndó ndehe —cáchí da.

<sup>31</sup> Anda já nacasáhá cája cuehe ñayivi xihín ndíví da cuaá cán ña ná catáji yúhu dá. Joo ví ga ví cáyuhú da já cáchí da já:

—Jesús, da naquixi chichi David, caja ndó ñamaní candáhví loho ini ndó ndehe —nacachi da.

<sup>32</sup> Anda já nandaca ndichi Jesús já nacana ndíví da cuaá cán. Ta já nandaca tuhún a da já nacachi a já xihín dá:

—Ndía cúni ndó ña ná caja i xihín ndo —nacachi a.

<sup>33</sup> Já nacachi ndíví da cuaá cán já:

—Candehé nde cúni nde, xitoho.

<sup>34</sup> Anda já nacandáhví ini Jesús da ta nacani ndaa ndáha á nuu dá. Chí ivi laá nanuna nuú da cuaá cán ta nacasáhá da ndíco da jatá Jesús cuahan da.

## 21

### *Ndihvi Jesús ñuu Jerusalén*

(Mr. 11:1-11; Lc. 19:28-40; Jn. 12:12-19)

<sup>1</sup> Ta tá sa ja chá xinu coo na ñuu Jerusalén já naxinu na in ñuu loho naní Betfagé yati jín yucu naní olivo. Ta cán nasahnda Jesús chuun nuú ivi táhan da xíca tuun xihín á cán. <sup>2</sup> Já nacachi a já xihín dá:

—Cuáhán ndó ñuu loho jaṅ ta tá ná xīnū cōo ndó jaṅ ndiñeḥe ndo in búrrō jíhí ndíco ndaa rí ta xīhīn mé rí jaṅ cándichi inga búrrō loho. Ndaxí ndó rī ta cañeḥe ndó ndívi rī quixi ndó. <sup>3</sup> Ta ndá na ná caḥan xīhīn ndo já quéa cachi ndó xīhīn ná ña xíní ñúhú xitoho ndó rī joo tá ná ndihi chuun rí já nducú ñeḥe tucu da rī, já cachi ndó xīhīn ná —naçachi Jesús xīhīn ndívi da cán.

<sup>4</sup> Tóco ndihi ña yóho naḃaha já ná xīnū cōo nuú ña naçahyí in da profeta já:

<sup>5</sup> Joho cachi ndó xīhīn na ñuu Jerusalén:

“Candehé ndo. Ndáhvi uun cáa da cómí cuéntá saḥa ndó.

Vaxi da nu ndo ta canúu da jaṭa búrrō jíhí, jaḃhi in rí ndiójo, canúu da vaxi da nu ndo”, cáchí tuhun Ndióxi.

<sup>6</sup> Ta ndívi da xíca tuun xīhīn Jesús cán naḃahan da naçaja da tá lín naḃahnda Jesús chuun nu dá.

<sup>7</sup> Já ñeḥe da búrrō jíhí cán xīhīn búrrō loho, jaḃhi rí naḃinū na nuú Jesús. Anda já naçojó na cotó ndéé na jaṭa rī ta nandaa Jesús jaṭa rī. <sup>8</sup> Ta mé cuahá ñayivi ndúu cán naçasáhá na chínduu na cotó ndéé na íchi mé nuú yaḥa Jesús cán. Ta java na naçasáhá na sáhnda na ndahá yíto ta chínduu na do íchi mé nuú yaḥa Jesús cuḥun a. <sup>9</sup> Ta ñayivi cuahān chí nuu ta jári na vaxi chí jaṭa naçasáhá na cáyuhú na já cáchí na já:

—Cája cáhnu í da naquixi chīchi David yóho. Ndicáhnu naḥá ná cacuu da cómí cuéntá saḥa yo jáchi cúu dá da vaxi yuhú nuu Ndióxi. Cáhnu ná cacuu Ndióxi —cáchí ñayivi cuahā cán cáyuhú na cásahan na xīhīn á.

<sup>10</sup> Ta tá nandihvi Jesús ñuu Jerusalén cán tóco ndihi ñayivi ñacasáhá cátóntó ndivaha na. Já cáchí xihín táhan na já:

—Ndá da cúú da yóho —cáchí xihín táhan na.

<sup>11</sup> Java táhan na cán cáchí na:

—Da yóho cúú in profeta, da ñuu Nazaret cuéntá estado Galilea —cáchí xihín táhan na.

*Tá nataxí Jesús na ndúu jícó ñaha yéhe veñuhu  
(Mr. 11:15-19; Lc. 19:45-48; Jn. 2:13-22)*

<sup>12</sup> Anda já nandihvi Jesús veñuhu cáhnu cán já ñacasáhá táxí ndihi a na ndúu jícó xihín na ndúu xéen cán. Ta ñaxicó ñehe a mesa na ndúu ndijama jjuhún cán ta ñaxicó ñehe a táyi sácoo na ndúu jícó ndijata. <sup>13</sup> Já ñacasáhá cáchí a já xihín ndihi na cán já:

—Já cáchí tuhun Ndióxi já: “Vehe mí i cacuu a vehe nuú quixi na caça tahví na nu Ndióxi”, cáchí tuhun Ndióxi. Joo ndóhó nandai cuu ndó yóho caja cuíhná ndo nuú ñayivi —ñacachi Jesús xihín ná.

<sup>14</sup> Tá nandihvi já ñacayati java na cuaá xihín java na rénco nu á ini mé veñuhu cáhnu cán ta nandaja vaha mé á na. <sup>15</sup> Joo xójo ndivaha ini na sacuaḥa nuú jutú xihín na jánaḥa ley Moisés tá ñaxini na ña xitúhún ñacaja mé á ta tá ñaxini johó na ña cája cáhnu na valí cán mé á tá cáchí na já: “Cája cáhnu í da ñaquixi chichi David.” Sahá ña cán quéa xójo ini na <sup>16</sup> ta já ñacachi na já xihín Jesús:

—Á xini johún ña cáhan na valí yóho —ñacachi na xihín Jesús.

Já ñacachi Jesús já:

—Ajan, xini johó i ña cája cáhnu na Ndióxi. Á coó ñacahvi ndó tuhun Ndióxi nu cáchí a já:

Janda na valí ta janda na chíchí nacaja Ndióxi xihin ná,  
 ña ná cuu caja cáhnu na mé á, cáhí tuhun Ndióxi  
 —nacachi Jesús xihín na cán.

<sup>17</sup> Anda já najándacoo a na já naqueta jatá ñuu  
 cán cuahan chí ñuu Betania ta cán nasahin a.

*Tá nachicaan Jesús cháhan jata tító ñuhú  
 (Mr. 11:12-14, 20-26)*

<sup>18</sup> Ta inga quiví itaan tá nandicó coo a cuahan  
 chí Jerusalén já nacasáhá cuico a cuahan. <sup>19</sup> Ta  
 yuhú íchi cán naxini a cándichi in tító ñuhú. Ta chí  
 nasahan sánehé a á íin cuihi nu do caxí a. Joo coo  
 ñaha ná ndiñehé a. Ndáha uun dó cán cuití va íin.  
 Anda já nacachi a já xihin do:

—Ni in túhún ga tañu a cána cuihi nu yóho —  
 nacachi a xihin do.

Chí ivi laá nahichi tító ñuhú cán. <sup>20</sup> Tá naxini na  
 xíca tuun xihín Jesús cán ña yóho já nacatontó na já  
 cáhí na já:

—Ndá cuéntá quéa nahichi tító ñuhú cán ivi  
 tuhun —nacachi na xihín Jesús.

<sup>21</sup> Ta nanducú ñehé Jesús tuhun nu ná já nacachi  
 a já:

—Mé a ndaa ná cahan i xihin ndo ña tá ná  
 candeé ini ndó yehe ta ni loho co cáhvi ivi joho ini  
 ndó já quéa cuu caja ndó ña náhnu chága nuú ña  
 nacaja i yóho. Ta janda cuu cachi ndó xihín in yucu:  
 “Caxoo ta cuahán jáquetún mún ini tañuhú”, ta chí  
 já ndusa coo. <sup>22</sup> Ta tá ná candeé ini ndó yehe nani  
 xíca tahví ndo nu Ndióxi ta co cáhvi ivi joho ini ndó  
 já quéa ñehé ndó ña xíca ndo nu á —nacachi Jesús.

*Tá ndáca tuhún na Jesús yo sáhan ndéé nu á ña jánaḥa mé á nuú ñayivi*

*(Mr. 11:27-33; Lc. 20:1-8)*

<sup>23</sup> Tá nandihí já nandihvi Jesús ini veñuhu cáhnu cán ta nani jánaḥa tuhun Ndióxi nuú na ndúu cán naxinu na sacuaḥa nuú jutu xihín na sacuaḥa nuú na Israel cán nu á. Já nacachi na já xihin á:

—Yo já sáhan ñamaní nuun cajún ña cájún yóho —nacachi na.

<sup>24</sup> Anda já nanducú ñehe Jesús tuhun nu ná já nacachi a já:

—Ta ná ndáca tuhún ri yehe va ndohó ta tá ná nducú ñehe ndó tuhun nuú i anda já caxi tuhun i nu ndó yo já nasahan ñamaní nuú i caja i ña cája i yóho. <sup>25</sup> Ta viti cachi ndó xihín i yo já nachindahá Juan ña ná quixi da caja ndúta dá ñayivi. Á Ndióxi nachindahá da á ñayivi nachindahá ñahá —nacachi Jesús ndáca tuhun a na.

Já nacasáhá ndítuhún xihin táhan na já cáchí na já:

—Tá ná cachí ña Ndióxi quéa nachindahá Juan ta já nducú ñehe Jesús tuhun nu yo já cachi da xoho: “Ndá cuéntá quéa coó naxeen ndó candúsa ndó da, dá já”, cachi Jesús xoho. <sup>26</sup> Ta tá ná cachí ña ñayivi cúu na nachindahá Juan já yihví yo ña ndicuíta ñayivi xihin yo. Jáchi tóco ndihi na cándúsa na ña naquixi Juan jáyaha da ña nacahan Ndióxi nuú ñayivi —cáchí na ndítuhún xihin táhan na.

<sup>27</sup> Sahá ña cán quéa nacachi na já xihin Jesús:

—Co xini toho nde yo já nachindahá Juan.

Anda já nacachi Jesús já xihin ná:

—Ta ni yehe a cáxi tuhun i nu ndo yo já nasahan ñamani nuú i caja i ña yóho —nacachi Jesús xihín na cán.

*Sácu Jesús quiahva sahá ivi da cúu jahyi in dataa*

<sup>28</sup> Anda já nacachi tucu Jesús xihín na cán já:

—Cuni johó ndó ña nayaha in tañu. Ín in dataa ta nasahin ivi jahyi ta da. Ta nasahan da nuú in táhan da cán já nacachi da já xihín dá: “Jahyi a, cuáhán caja chúun lohún nu ñuhú i nu cáa tó uva”, nacachi da xihín jahyi da. <sup>29</sup> Já nacachi jahyi da já xihín dá: “A cühun toho i jáchi co xíca ini i cühun i”, nacachi da. Joo tá nandihí nacahvi ini da ña a váha ná cuu ini da chí já naquee da cuahan da caja chúun da nu ñuhú tátá da. <sup>30</sup> Ta jári nasahan tátá da cahan da xihín inga jahyi da ta quiahva já nasahnda ri da chuun nuú da cán. Ta da cán nacachi da já xihín tátá da: “Ajan. Cühun i”, cáchi da. Joo tá nandihí coó nasahan toho da. <sup>31</sup> Ta viti cachi ndó xihín i ndá da cúu da nacaja ña cúní tátá da —nacachi Jesús.

Já nacachi na cán:

—Da nu cuítí.

Anda já nacachi tucu Jesús já:

—Mé a ndaa ná cahan i xihín ndo ña ín chága sahá na játaca jiuhún cuéntá impuesto xihín najihí xíca jii ña ná cacomí Ndióxi cuéntá saha ná a juú ga ndohó. <sup>32</sup> Jáchi naquixi Juan, da jácandúta ñayivi najánaha da ndohó ndaja ndítahan caja ndó ta coó naxeen ndó candúsa ndó da. Joo na játaca jiuhún cuéntá impuesto xihín najihí xíca jii nacandúsa na ña nacahan da. Ta vatí naxini ndó ña yóho joo

coó naxeen ndó ndijama ndó ña cája ndó jáchi coó naxeen ndó candúsa ndó mé Juan.

*Sácú Jesús quiahva sahá java mozo, da nacaja quini xihín xitoho da*

*(Mr. 12:1-12; Lc. 20:9-19)*

<sup>33</sup> Cuni johó ndó ná cacu u inga quiahva nu ndó. Nasahiin in dataa ta najándee cuaha dá tó uva nu ñúhu dá. Ta nasacu da in corra yito nu do. Ta nacavaha da in nuú cuhní mé uva cán ña cavaha vino. Ta nacavaha da in nu jíco canúu da já cuu candaa da tóco ndihi dó cán.

’Anda já nasahan ndojó da ñúhu dá nuú java na caja chúun na ña. Ta já naquee da cuahan xicá da. <sup>34</sup> Ta tá naxinu tiempo jáquee na já nachindahá da java mozo da ña ná cahun na nuú na ndúu cája chúun ñúhu da cán ña ná ndiquiahva na nu dá ña cáni nu dá ndiquehe da saha ñúhu dá ña nasahan ndojó da nuú na cán. <sup>35</sup> Joo ndaja coo na cája chúun nu ñúhu cán natiin na in táhan da cúu mozo da cán ta nacani na da. Ta inga táhan da cán nasahní na. Ta inga táhan da cán nandicujita ñee na xihín yuu. <sup>36</sup> Joo mé da xihín ñaha ñúhu cán nachindahá cuaha chága da mozo da nasahan da nu ñúhu dá. Ta tá quiahva nacaja na xihín mé java mozo nasahan nu cuítí cán quiahva já nacaja ri na xihín tóco ndihi mozo cán.

<sup>37</sup> Tá nandihí já nasacu ini da xihín ñaha ñúhu cán chindahá da jahyi da jáchi ncahán da: “Cája i cuéntá coo toní ñúhu na xihín jahyi i”, ncahán da xihín ñaha ñúhu cán. <sup>38</sup> Joo tá naxini na cája chúun ndojó ñúhu cán ña vaxi da cúu jahyi da xihín ñaha ñúhu cán já nacachi xihín táhan na já: “Candehé

ndo. Yóho vaxi da cúu jahyi xitoho í. Ta tá ná xinu quivi quivi xitoho í ta da yóho cacuu da ndicojo chuun saha ñúhu yóho. Cóho cahní yó da já ná candoo ñúhu yóho ndáha mí”, ñacachi xihin táhan na cán. <sup>39</sup> Ña cán quea ñatiin na da ta ñatavá na da janda yuhú cútu ta cán ñasahní na da —ñacachi Jesús sácú a quiahva.

<sup>40</sup> Anda já ñandaca tuhún Jesús na ndúu cán já ñacachi a já:

—Ndía cáhan ndo caja da xihin ñaha ñúhu yóho xihin na cája chúun nu ñúhu dá —ñacachi a.

<sup>41</sup> Anda já ñacachi na cán já xihin Jesús:

—Ña caja da quea cahní da na quini, mé na ñacaja chúun tóo nu ñúhu da cán. Ta já ndiquiahva ndojó da ñúhu da nuú java ga na ña ná caja chúun na nu á. Ta tá jáquee na ndiquiahva na nu dá ña cáni nu dá ndiquehe da saha ñúhu dá —ñacachi na cán xihin Jesús.

<sup>42</sup> Já ñacachi Jesús já xihin na cán:

—Á a ñaha cahvi ndó tuhun Ndióxi nu cáchi a:  
Mé yuu ña najácana da cávaha vehe,  
ña cán cúu ña ñandu yuu ndúhu sahá vehe ña ín  
chága saha.

Ña yóho quea ñacaja Ndióxi,  
ta cúu á in ñaha cáhnu ndivaha nu yo, cáchi tuhun  
Ndióxi.

<sup>43</sup> Ña cán quea cáhan i xihin ndó ña cacu xoo Ndióxi ndohó ña ná a cácomí ga mé á cuénta saha ndo. Ta quiahva mé á ñamaní nuú java ga ñayivi ña ná ndihvi na nuú cacomí Ndióxi cuénta saha ná, mé na ndiquiahva na nu á ña cáni nu á ndiquehe a. <sup>44</sup> Ta cáchi i xihin ndó ña yehe cúu u tátuhun



mé yuu cáhan i saha. Ta ndá na ná ndicava jatá yuu cán chí chachi xéhe na. Quiahva já ndihi sahá ñayivi tá cō cūni na candúsa na yehe. Ta tá mé yuu cán ná yaha ndicava jatá in na já caji ndihí ñahá. Quiahva já ndihi sahá ñayivi ini indayá tá cō cūni na candúsa na yehe —naçachi Jesús.

<sup>45</sup> Tá naxini joho na cúu sacuaḥa nuú jutū xihín na fariseo cán ña yóho, naçandaḥ táhyí ini na ña saha mé ná cáhan Jesús. <sup>46</sup> Sahá ña cán quéa nanducú na tiin na mé á joo cōo naçuu caja na sahá ña nayihví na ñayivi jáchi cándúsa ñayivi cán ña cáhan Jesús cuéntá Ndióxi.

## 22

### *Sácú Jesús quiahva sahá vicó tándaha (Lc. 14:15-24)*

<sup>1</sup> Tá nandihí já naçasáhá tucu Jesús jánaḥa ñayivi xihín ndinuhu quiahva. Já cáchi a já xihín ná:

<sup>2</sup> —Nuú cacomí Ndióxi cuéntá sahá ñayivi cúu á tátuhun ña nayaha xihín in rey tá naçavaḥa da in víco ña tandaha jahyi ta da. <sup>3</sup> Naçindahá da mozo da ña ná cuhun da cana da na ndítahan quixi. Joo cōo naçeen na quixi na mé víco. <sup>4</sup> Anda já naçindahá chága da mozo da ña ná çaxi tuhun da nuú na ndítahan quixi cán ña sa naçaja ndíví da ña cuxu na. Sa naxihí tindiçui xihín java ga quíti, rí nandaha. Sa naçandíví ndihí ñaha cuéntá víco tándaha sahá ña cán quéa ná quixi na. Ña yóho cúu chuun natahnda nu mozo cán cachi da xihín na ndítahan quixi cán. <sup>5</sup> Joo cō ndáa na cán cuhun na. In táhan da cán naçquee da cuahan da candehé da nu ñúhu dá. Ta inga da naçquee da cuahan da caja

ndaḥvi da. <sup>6</sup> Ta java ga na cán naṭiin na mozo mé rey cán ta naçaja xíxi na xihín dá janda quiaḥva naṣahní ñahá na. <sup>7</sup> Anda já naçojo ndivaha ini rey cán sahá ña cán quea nachindahá da soldado da ña ná cuhun na cahní na na naṣahní ndii cán ta ná chicaan ñúhu dá ñuu na. <sup>8</sup> Anda já naçachi tucu rey cán já xihín java ga mozo da: “Sa naçandívi tóco ndihi ñaha ña coo víco joo na naçana i cán coo saha toho na quixi na víco. <sup>9</sup> Ña cán quea cuáhán ndó ndijáá cáyé náhnu ta ndá ñayivi naçuu cana ndó na ná quixi na víco tándaḥa yóho”, naçachi rey cán naṣahnda da chuun nu mozo da. <sup>10</sup> Anda já naçuee mozo da naṣahan na ndijáá cáyé ta ndaja cáa mé ñayivi najátaca na. Ñayivi vaha xihín na quini viti nataca naçaja na. Ta já najácutu na vehe nuú coo víco tándaḥa cán xihín ñayivi.

<sup>11</sup> Anda já nandihvi rey nu ñúhu na cán já naḥini da ndácaan in dataa, da co ndíxi jáhma ña ndíxi na ndúu víco tándaḥa. <sup>12</sup> Ta naçayati mé rey nu dá já naçachi da já xihín dá: “Amigo, ndaja naçajún naquihvún yóho tá co ndíxi tohún jáhma ña ndíxi na ndúu víco tándaḥa”, naçachi rey xihín da cán. Joo coo nanducú ñehe da tuhun nu rey. <sup>13</sup> Anda já naṣahnda rey chuun nu mozo da. Já naçachi da já xihín ná: “Cató ndó ndáḥa dá xihín saḥa dá. Ta jácana ndó da chí jata nuú naá yávi. Cán cuacu ndivaha da anda quiaḥva cahná nuḥu da”, cáchi da. <sup>14</sup> Jáchi cuahá ndivaha cúu ná naçana Ndióxi ña ná cacomí a cuénta saḥa joo chá cúu ná ndiquiaḥva na ndáḥa mé á ña ná cuu caxi a na — naçachi Jesús.

*Ndáca tuhún na Jesús á ndítahan nu ná chaḥvi na*

*jiuhún cuéntá impuesto**(Mr. 12:13-17; Lc. 20:20-26)*

<sup>15</sup> Tá nandihi já naquee na fariseo nasahan na jándique táhan na tuhun na ndaja caja na coto ndojó na Jesús xihín tuhun cáhan mé á já ná cuu jácojo na cuachi jatá. <sup>16</sup> Ña cán quea nachindahá na java na cuéntá mé ná xihín java na cuéntá Herodes nuú Jesús já nacachi na já xihin á:

—Maestro, xini nde ña ndinuhu ña ndaa cáhan mé ndó. Ta cándaa ini nde ña jánahá ndó ña ndaa saha íchi cuéntá Ndióxi. Ta co quehe ndó cuéntá tá cáhan núu ñayivi saha ndo. Ta cándaa ini nde ña tá cáhan ndó sahá in ñaha cája ñayivi cúu á sahá ña sándehe ndó janda ínima ná. <sup>17</sup> Sahá ña cán quea cúni nde candaa ini nde ndía cachi ndó sahá ña yóho: Á ndítahan nuú nde chahvi nde jiuhún cuéntá impuesto nuú da cómi cuéntá sahá ñuu Roma. Á chahvi nde ña á a chahvi toho nde ña —nacachi na cán xihín Jesús.

<sup>18</sup> Joo sa nacandaa ini Jesús ña cáhvi núu ini na sahá ña cán quea nacachi a já xihin ná:

—Co cúu ndó tá quiahva ndaa ndó jáchi cúni ndó coto ndojó cuití ndó yehe. <sup>19</sup> Jánahá ndó in táhan jiuhún ña chahvi ndó impuesto jan nuú i —nacachi Jesús.

Anda já nasahan na in jiuhún caa naní denario nu á. <sup>20</sup> Tá naxini Jesús ña yóho já nacachi a já xihin ná:

—Yo nahná ta yo quivi quea ndaa nu á —nacachi a.

<sup>21</sup> Já nacachi na cán já xihin á:

—Ñéhe a nahná xihin quivi da cómi cuéntá sahá ñuu Roma —nacachi na.

Anda já nacachi tucu Jesús já:

—Ndiquiahva ndó ña cúu ñaha da cómi cuéntá sahá ñuu Roma jan nu dá. Ta ndiquiahva ndó ña cúu ñaha Ndióxi nu á —nacachi a.

<sup>22</sup> Tá naxini joho na cán ña yóho já nacatóntó na ta najándacoo na a naquee na cuahan na.

*Tá ndaca tuhun na Saduceo Jesús á mé a ndaa nditacu ndii*

*(Mr. 12:18-27; Lc. 20:27-40)*

<sup>23</sup> Ta sa mé quivi já nasahan java na saduceo cahan na xihin Jesús. Ta mé na saduceo yóho co cándusa na ña nditacu tucu na sa naxihi. Sahá ña cán quea nandaca tuhún na Jesús já cáchi na já xihin á:

<sup>24</sup> —Maestro, nu ley nacyhyí Moisés sanahá natahnda chuun ta cáchi a já: “Tá tandaha in dataa xihin ñájíhí da ta tá xihí da ta coo jahyi da cacu já quea ndítahan nuú ñani da tandaha dá xihin ña cuaan nacandoo cán. Ta já ná coo jahyi da cán xihin yuhú nuú ñani da”, cáchi ley Moisés. <sup>25</sup> Ta viti cuni joho ndó ná cacu nde in quiahva nu ndó. Tañu mé nde yóho nasanduu usa ñani. Ta da nu cuítí cán natandaha dá xihin in ñáñáha. Tá nandihí já naxihí da. Joó sahá ña coo jahyi da nacacu xihin ñájíhí da sahá ña cán quea nandiquehe ñani da, da chí ivi jata dá ña cuaan cán. <sup>26</sup> Ta quiahva já nandoho ri da chí ivi cán jáchi naxihí da ta coo jahyi da nacacu xihin ña. Ta janda ndíhusa ñani cán natandaha xihin ña ta ndíhusa da naxihí ta ni in da coo nacacu jahyi xihin ña. <sup>27</sup> Ta tá nu ndíhí naxihí ri ñáñáha cán va. <sup>28</sup> Ta viti cachi ndó xihin nde tá ná xinu quiví nditacu tucu ndii, ndá da cacuu ndusa yí ña cán jáchi ndíhusa ñani

cán natandaha xihin ña ñuyivi yóho —ñacachi na saduceo cán xihin Jesús.

<sup>29</sup> Anda já ñacachi Jesús já:

—A váha toho cáhán ndo jáchi co xini ndó ndaja cáhan tuhun Ndióxi ta ni co xini ndó ndá quiahva cáhnu cúu ndéé Ndióxi. <sup>30</sup> Jáchi mé quivi tá ná nditacu tucu ndii a tándaha ga ná ta ni a quiahva na jahyi jhíhí na tandaha ná. Cacu na tátuhun táto Ndióxi ndúu indivi ta co tándaha na cán. <sup>31</sup> Joo sa xini yo ña nditacu tucu ndii. Á a ñaha cahvi ndó tuhun Ndióxi nu cáchi a já: <sup>32</sup> “Yehe cúu Ndióxi ña cája cáhnu Abraham ta yehe cúu Ndióxi ña cája cáhnu Isaac ta yehe cúu Ndióxi ña cája cáhnu Jacob viti”, ñacachi a. Ta ña yóho cuni cachi a ña tácu yii va Abraham xihin Isaac xihin Jacob vatí sa ñaxihí yiquí cuñu na —ñacachi Jesús.

<sup>33</sup> Tá ñaxini johó ñayivi ndúu cán ña yóho já ñacatóntó na xihin ña jánaha Jesús nu ná.

*Tá cáhan Jesús ndá ley quéa cáhnu chága  
(Mr. 12:28-34)*

<sup>34</sup> Tá ñañehé na fariseo tuhun ña ñaquee vaha Jesús ñasahnu a nuú na saduceo já ñanditútú ndihi na. <sup>35</sup> Ta in táhan mé da cán, da jánaha ley Moisés ñandaça tuhún da Jesús jáchi cuni da coto ndojó da mé á. Já ñacachi da já:

<sup>36</sup> —Maestro, ndia cúu ña cáhnu chága sáhdá ley Moisés caja í —ñacachi da cán xihin Jesús.

<sup>37</sup> Já ñacachi Jesús já xihin dá:

—Ña cáhnu chága nu ley Moisés cúu ña yóho: “Ndítahan quihvi ini ndó Ndióxi, xitoho ndó xihin tóco ndihi ínimá ndó ta xihin ndinuhu ini ndó ta xihin tóco ndihi xini túni ndo.” <sup>38</sup> Ña yóho cúu ley

nu cuítí ta cúú á ña cáhnu chága nu tóco ndihi ley.  
<sup>39</sup> Ta tá quiahva ín ña nu cuítí yóho quiahva já ín ri ña chí ìvì va ta cáhí a já: “Xíní ñúhú quihvì ini ndó ñani táhan ndó tá quiahva quihvì ini ndó mé ndó.” <sup>40</sup> Ta jata ndíví ña yóho tiin tóco ndihi ley Moisés xihín ña najánaha na profeta sanahá — ñacachi Jesús xihín na fariseo cán.

*Ndáca tuhún na Jesús ndáchí naquixi a*

*(Mr. 12:35-37; Lc. 20:41-44)*

<sup>41</sup> Ta nani ñanditútú ndihi na fariseo ndúu na nu Jesús cán já ñandaca tuhún a na. <sup>42</sup> Já ñacachi a já xihín ná:

—Ndía cáhvi ini ndó saha Cristo. Ndá chichi cáhán ndo vaxi a — ñacachi Jesús xihín ná.

Já ñacachi na cán já:

—Vaxi a chichi David, da ñasacuu rey sanahá — ñacachi na cán xihín Jesús.

<sup>43</sup> Anda já ñacachi tucu Jesús já xihín ná:

—Tá ta mé a ndaa vaxi Cristo chichi David ndá cuéntá quéa ñacachi da ña cúú á xitoho da. Jáchi ñachutú ndaa ínimá David xihín ínimá yìi Ndióxi tá ñacahí da já:

<sup>44</sup> Já ñacachi Ndióxi xihín xitoho ì:

“Cacoo xoo cuáha ì yóho

jandá quiahva ná caja ì ña ná cacomún cuéntá sahá na co cúní yohó”, ñacachi Ndióxi, ñacachi David.

<sup>45</sup> Ndávaha cáhí na ña vaxi Cristo chichi David tá ta sa mé David ñacachi da ña cúú á xitoho da — ñacachi Jesús.

<sup>46</sup> Ta chí ni in na coo ñacuu caja nducú ñehe na tuhun nu á. Ta jandá mé quivì já ni in ga na coo ñasahan ndeé ini ndaca tuhún chága na mé á.

## 23

*Chícaan Jesús cuachi jatá na fariseo xihín jatá na jánaḥa ley Moisés*

*(Mr. 12:38-40; Lc. 11:37-54; 20:45-47)*

<sup>1</sup> Anda já naçachi Jesús já xihín tóco ndihi ñayivi ta xihín na xíca tuun xihín á cán já:

<sup>2</sup> —Na jánaḥa ley xihín na fariseo cúu ná na ndítahan nuu ndicani na ña cúní cachi ley Moisés.

<sup>3</sup> Ña cán quéa xíní ñúhú caja ndó tóco ndihi ña jánaḥa na nu ndo. Joo a cája toho ndó tá quiahva cája mé ná jáchi co cája na ña jánaḥa mé va na.

<sup>4</sup> Jáchi cája na ña ná coo ihvi ndivaha ley janda quiahva co ndeé ini ñayivi cája na ña. Joo mé ná ni loho tীন co chindeé ñahá na. <sup>5</sup> Ta cája na tóco ndihi ñaha ña ná cuni ñayivi na jáchi cátóo na candico listoni náhnu jiní ná xihín jico ndáha ná nu ndáa tuhun Ndióxi. Ta cátóo na coo lándá chága yuhú jáhma ná a juú ga java ga ñayivi. <sup>6</sup> Ta tá cuahan na víco cátóo na coo na nuú vaha cuití va. Ta tá quihvi na veñuhu cátóo na cacoo na nu sácco na íin chága saha. <sup>7</sup> Ta cátóo na ña ná cahan toní ñúhú ndivaha ñayivi xihín ná tá xíca nuu na nuú yahvi. Ta chí a juú quiahva cátóo na ña ná cachi ñayivi 'maestro' xihín ná.

<sup>8</sup> Joo ndóhó co ndítahan nu ndó nducú ndó ña ná cahan ñayivi 'maestro' xihín ndo. Jáchi in ñani cúu ndihi ndó ta in túhún cúu maestro ndo, mé á cúu Cristo. <sup>9</sup> Ta a cáhan ndo tátá cáhnu xihín ni in ñayivi ñuyiví yóho jáchi in túhún Ndióxi cúu á tátá ndo ta mé á íin a indiví. <sup>10</sup> Ta a ndúcú ndo ña ná cahan ñayivi 'jefe' xihín ndó jáchi in túhún laá va cúu jefe ndo, mé a cúu Cristo. <sup>11</sup> Ndá da cúu da cáhnu chága

tañu ndó xíní ñúhú da cája chúun da sahá ndihi ndó. <sup>12</sup> Jáchi ndá na ndíñehe jícó mé, jánuu ndáha Ndióxi na. Joo ndá na jánuu ndáha mé nu Ndióxi, jándíñehe jícó mé á na.

<sup>13</sup> Ndáhví naçuu ndó, na jánaḥa ley Moisés xihín na fariseo jáchi co cúu ndó tá quiahva ndáa ndó. Jáchi sáji nuu ndó nuú ñayivi já ná a cuú cacomí Ndióxi cuéntá saḥa ná. Ta ni ndóhó co ndiquiahva ndó mé ndó ndáha Ndióxi ná cacomí a cuéntá saḥa ndo. Ta cája ndó ña ná a cúu candaa ini ñayivi ndaja caja na ndiquiahva na mé ná ndáha Ndióxi.

<sup>14</sup> Ndáhví naḥá naçuu ndó, na jánaḥa ley Moisés xihín na fariseo jáchi co cúu ndó tá quiahva ndáa ndó. Jáchi cánda ndó vehe najihí cuáan ta tá nandihí cuaḥá ndivaha xíca taḥví ndo nu Ndióxi jáchi cúni ndó jájahví ndó nuú ña núu cája ndó. Sahá ña cán quea cáchí i xihín ndó ña ndóhó cacuu ndó na ndoho chága ini, caja Ndióxi.

<sup>15</sup> Ndáhví naḥá naçuu ndó, na jánaḥa ley Moisés xihín na fariseo jáchi co cúu ndó tá quiahva ndáa ndó. Jáchi a juú quiahva xíca nuu ndó ndúcú ndo in tálaá ñayivi ña ná candico na ña jánaḥa ndo. Ta tá sa nandaja ndó na cuéntá mé ndó já cája chága na cuaḥi janda cáni a nu ná ndoho chága ini na indayá a juú ga mé ndó.

<sup>16</sup> Ndáhví naḥá naçuu ndó jáchi cúu ndó tátuhun na cuaá ndáca inga na cuaá. Jáchi jánaḥa ndó ñayivi ña tá sahan na tuhun na nuú inga ñayivi nani tává na quivi veñuhu cáhnu já quea co ndúsa jáxinu coo na tuhun na. Joo cáchí ndo ña tá tává na quivi jiyuhun cuáan ndácaan veñuhu cáhnu já quea ndúsa jáxinu coo na tuhun na, já cáchí ndo. <sup>17</sup> Joo tóntó ndivaha ndó ta cúu ndó tátuhun na cuaá viti.



Jáchì cò cándaā ini ndó ña íin chága sahá veñuhu cáhnu a juú ga sahá jiuñun cuáán jáchì mé jiuñun cuáán cúú á cuéntá Ndióxi sahá ña ndácaan ini veñuhu cáhnu ña cúú cuéntá mé á. <sup>18</sup> Ta inga tucu ña jánaha ndó nuú ñayivi cúú ña yóho: Tá sahan in na tuñun na nuú ñayivi nani tává na quivi nu náa Ndióxi já queá cò ndúsa jáxinu còo na tuñun na. Joo cáchí ndo ña tá tává ñayivi quivi ña sájo cò na cánúu nu náa cán já queá ndúsa jáxinu còo na tuñun na, já cáchí ndo. <sup>19</sup> Joo tóntó ndivaha ndó ta cúú ndó tátuhun na cuaá. Jáchì íin chága sahá nu náa cán a juú ga sahá ña sájo cò na cánúu nu náa jáchì ña sájo cò na cán cúú á cuéntá Ndióxi sahá ña cánúu a nu náa cuéntá mé á. <sup>20</sup> Sahá ña cán queá ndá na tává quivi nu náa já queá tává ndihi ri na quivi tóco ndihi ña sájo cò na cánúu nu náa cán. <sup>21</sup> Ta ndá na tává quivi veñuhu cáhnu já queá tává ri na quivi Ndióxi jáchì cán íin mé á. <sup>22</sup> Ta ndá na tává quivi indivi já queá tává ri na quivi Ndióxi xihín quivi nu sá còo a sáhdá a chuun.

<sup>23</sup> Ndáhví nahá nacuu ndó, na jánaha ley Moisés xihín na fariseo jáchì cò cúú ndó tá quiahva ndáa ndó. Mé ndó cávaha ndó uxu táhdá ña jáquee ndó ñundáhyi ndo ta sahan ndó in táhdá ña nu Ndióxi. Já cája ndó anda yucu válí ña támi sahan tátuhun menta xihín anís xihín comino. Joo cò cája ndó ña íin chága saha ña sáhdá ley Moisés. Jáchì cò cája ndó ña ndaa ta cò cándáhví ini ndó ñayivi ta cò cándeé ini ndó Ndióxi tá quiahva sáhdá ley caja ndó. Mé a ndaa xíní ñúhú cája ndó tóco ndihi ña yóho joo a jándacoo ndó ña jó cò ndó nu Ndióxi in táhdá nuú uxu táhdá ña ñéhe ndó. <sup>24</sup> Mé ndó cúú ndó tátuhun na cuaá ndáca inga na cuaá. Jáchì

ndinuhu ini ndó cája ndó ña coó cuahá saha cuéntá ley Moisés joo sácú xoo ndó ña ín chága saha nu Ndióxi caja ndó. Cúú ndó tátuhun in da ndíhi ini da tavá da in ndicama loho ndácaan tásá da ná a cócó da ri. Joo co íhvi toho nu dá cócó da in camello.

<sup>25</sup> Ndáhví nahá nacuu ndó, na jánaha ley Moisés xihín na fariseo jáchi co cúú ndó tá quiahva ndáa ndó. Jáchi ndíhi ini ndó caja ndó costumbre ña ndícata ndó jata vaso xihín jata cohó joo ña ñúhu ini a cán najátaca cuíhná ndo sahá ña ndiáva ndivaha ini ndó ña núu. <sup>26</sup> Ndáhví nahá nacuu ndó, na fariseo jáchi cúú ndó tátuhun na cuaá. Ña ndítahan caja ndó nu cuítí quéa ndaja víi ndó ínima ndó já cacuu ndó tátuhun in vaso á in cohó sa nandicata vaha na jáchi nandivií ini a xihín jata víti.

<sup>27</sup> Ndáhví nahá nacuu ndó, na jánaha ley Moisés xihín na fariseo jáchi co cúú ndó tá quiahva ndáa ndó. Cúú ndó tátuhun vehe válí ndíta camasanto nu táan na ndii. Ndató jándicuchu na jata joo chí ini a a juú quiahva quini sáhan jáchi ndinuhu lásá ndii ñúhu ini a. <sup>28</sup> Quiahva já cúú mé ndó jáchi ndáa ndó tátuhun ñayivi vaha ndivaha. Joo mé a ndaa co cúú ndó tá quiahva ndáa ndó jáchi ndinuhu ña núu ndácaan ínima ndo.

<sup>29</sup> Ndáhví nahá nacuu ndó, na jánaha ley Moisés xihín na fariseo jáchi co cúú ndó tá quiahva ndáa ndó. Cávaha ndó vehe válí ndíta camasanto nuú cañuhu lásá na nasacuu profeta sanahá ta jácacutú ndó nuú nanduxu na nacaja ndaa. <sup>30</sup> Ta cáchi ndo já: “Ta tá nasanduu nde tiempo nasanduu tásáhnú jícó yo sanahá ta chí a chindeé toho nde na nasahni profeta, na nasanduu sanahá”, cáchi ndo. <sup>31</sup> Ta xihín ña yóho náha táhyí a ña naquixi ndó chichi

na nasahní profeta sanahá. <sup>32</sup> Cuáhán ndo jáxinu coo ndó mé cuachi nacasáhá cája tásáhnú jícó ndo sanahá.

<sup>33</sup> Mé ndó cúú ndó tátuhun coo jáchi cája ndó tá quiahva cája coo. A cuú cacu ndaa ínima ndó ta chí tandaa quivi cuhun ndó indayá nū ndoho ndivaha ini ndó. <sup>34</sup> Sahá ña cán quéa yehe chindahá i java profeta nū ndo xihín java na ndichí xihín java na jánahá tuhun Ndióxi nū ndo. Joo java na cahní ndó na ta java na cata caa ndó na ndica crúxu ta java na cani ndó na ini veñuhu ta java na taxí ndó na tá ñuu tá ñuu. <sup>35</sup> Ña cán quéa caça Ndióxi cuéntá nū ndó saha tóco ndihi ñayivi ndaa, na nasahní ndo sanahá. Caça mé á cuéntá saha Abel, da nasacuu da ndaa janda quiahva naxinu coo a nuú caça mé á cuéntá saha Zacarías, da nasacuu jahyi Berequías. Mé da yóho nasahní ndó ini veñuhu tañu nū náa xihín nuú yí ndivaha. <sup>36</sup> Mé a ndaa ná cahan i xihín ndo ña caça Ndióxi cuéntá saha tóco ndihi ndii jan nuú ñayivi ndúu tiempo viti.

*Tá sácu Jesús sahá ñayivi ndúu ñuu Jerusalén  
(Lc. 13:34-35)*

<sup>37</sup> 'Ndáhvi nahá nacuu ndó, na ndúu ñuu Jerusalén. Jáchi sáhní ndó na profeta. Ta ndicuíta ndó cáni ndó na xihín yuu na nachindahá Ndióxi nū ndó. Cuahá ndivaha tañu cúní jándataca ndihi i ndohó joo coo naxeen ndó cuni johó ndó. Cúú á tá quiahva cája nduxú tá játaca rí jahyi válí rí tíxi ndixí rí. <sup>38</sup> Ta viti cuni johó ndó ña cahan i xihín ndo. Vaxi quivi tá janí ndáha mé vehe ndó candoo a. <sup>39</sup> Ta mé a ndaa ná cahan i xihín ndó ña a cúní ga ndó yehe janda quiahva ná xinu coo quivi cachi

ndó: “Cáhn̄u nahá ná cacuu da vaxi cuéntá Ndióxi, xitoho í”, cachi ndó —nacachi Jesús xihín na cán.

## 24

*Cáxi tuhun Jesús ña vaxi quiví ndihi sahá veñuhu cáhn̄u ndácaan ñuu Jerusalén*

*(Mr. 13:1-2; Lc. 21:5-6)*

<sup>1</sup> Ta tá sa ñaquee Jesús veñuhu cáhn̄u Jerusalén cán cuah̄an já ñacativi na xíca tuun xihín á nu á ta ñacasáhá na cáhan na xihín á ndá quiahva cáa veñuhu cán. <sup>2</sup> Joo ñanducú ñehe Jesús tuhun nu ná já ñacachi a já:

—Mé a ndaa ná cahan i xihín ndo ña janda ni in yuu yóho a cándo jatá inga yuu jáchi vaxi quiví tá nditan̄i ndihi ña yóho —nacachi Jesús xihín na xíca tuun xihín á cán.

*Ña coo tá sa ñacayati quiví ndihi saha ñuyíví*

*(Mr. 13:3-23; Lc. 21:7-24; 17:22-24)*

<sup>3</sup> Anda já ñaquee Jesús cuah̄an chí yúcu nu cáa yitó olivo xihín na xíca tuun xihín á. Ta nani ndúu na cán ñacativi na xíca tuun xihín á nu ín coo a cán já ñacasáhá ndáca tuhún xóo na a já ñacachi na já xihín á:

—Cúni nde ña ná caxi tuhun ndó xihín nde ndá ama coo tóco ndihi ña yóho. Ta ndaja coo tá ná xinu coo quiví quixi tucu ndó ñuyíví yóho. Ta ndaja coo tá ná ndihi saha ñuyíví —nacachi na xihín Jesús.

<sup>4</sup> Já ñacachi Jesús já:

—Cuéntá coo ndó ná a jándahvi ni in na ndohó.

<sup>5</sup> Jáchi cuahá ndivaha na quixi na cuéntá mí i ta cahan na ña tuhún tá cachi na já xihín ndo: “Yehe

cúú Cristo, da nachindahá Ndióxi cacomí cuéntá sahá ñayivi”, cachi na. Ta xihín ña yóho cuahá ndivaha ñayivi jándahvi na. <sup>6</sup> Ta jándá johó ñehe ndó tuhun ña ndicuíta ñayivi caní táhan na yóho á cáa. Joo a cáyihví toho ndó jáchi já ndítahan coo. Joo ña yóho cō cūni cachi a ña naxinu cōo quiví nu ndíhí. <sup>7</sup> Jáchi ñayivi ndúu in nación ndicuíta na caní táhan na xihín na ndúu inga nación. Ta quixi tamá ta quixi cuehe ta ndaja táhan quixi a táan. <sup>8</sup> Ta ña yóho cacuu a tondóhó ña casáhá jihna ñúhú vaxi nuú ñayivi jáchi cámani xinu cōo nuú ndoho chága ini na.

<sup>9</sup> Anda já tiin na ndohó ta ndiquiahva na ndohó ndahá na cō cūni ndohó já ná caja xíxi na xihín ndo. Ta cahní na ndohó ta tóco ndihi ñayivi ndúu ñuyíví candají na ndohó sahá yehe. <sup>10</sup> Ta mé tañu já cuaha ná jándacoo na ña candeé ini na yehe ta ndaja táhan mé ná candají táhan na ta ndaja mé ná jicó túhún táhan na. <sup>11</sup> Ta quixi cuahá ndivaha na tuhún ta cachi na cúú ná profeta cuéntá Ndióxi joo jándahvi na cuahá ndivaha ñayivi. <sup>12</sup> Ta sahá ña ndicuahá ndivaha ña núu ñuyíví yóho sahá ña cán queá jándacoo cuahá ñayivi ña quíhvi ini táhan na. <sup>13</sup> Joo ndá na ná candico tuun íchi mí i janda ná xinu quiví quivi na, na cán cacuu na cacu ndaa ínima. <sup>14</sup> Ta níi cúú ñuyíví ndicuíta nuu tuhun vaha cáhan sahá yehe já ná candaa ini ñayivi ndá quiahva cacomí Ndióxi cuéntá saha ná. Anda jávi ndihi saha ñuyíví.

<sup>15</sup> Na cáhvi tutu ná candaa ini na ña cáhan. Sanahá nacahyí profeta Daniel sahá in ña quini ña jativí ñahá. Tá ná cuni ndó ña xinu cōo ña yóho nuú yíi cuéntá Ndióxi <sup>16</sup> já queá ndá na ndúu estado

Judea xíní ñúhú cunu na cūhūn nā chí yúcu. <sup>17</sup> Ta ndá nā cándójó jīnī véhe, cō ndítahan nuu na tavá nā ndá ñaha vehe na. <sup>18</sup> Ta ndá nā ndúu yúcu, ná a ndícó cōo na vehe na ndiquehe na jáhma ná. <sup>19</sup> Ndáhvī nācuu najihí, nā ñúhu jahyi mé quivī já. Ta ndáhvī nācuu najihí nā néhe ndaa nā valí táhan ña chíchí yīi. <sup>20</sup> Cācā tahví ndo nū Ndióxi ña ná a cácuu a tiempo vixi tá ná cunu ndó cūhūn ndo. Ta cācā tahví ndo nū á ña ná a cácuu a quivī ndiquehe ndée ná. <sup>21</sup> Jáchi quiví ndoho ndivaha ini ñayivi cacuu a cán. Jáchi jandá tá nācava sáhá saha ñuyívī cōó nandoho ini na tá quiahva ndoho ini na mé quivī já. Ta tá ná yaha ña jan, a ndícó cōo ga ña ndoho ini na quiahva já. <sup>22</sup> Ta tá ná a ndája cuítí Ndióxi tiempo cán ni in ñayivi a cúu cacu ndaa. Joo sahá nā sa nācaxi mé á sahá nā cán ndaja cuítí mé á tiempo cán.

<sup>23</sup> Ta tá ná cachi in na xihīn ndó: “Candehé ndo. Yóho ín Cristo, da nāchindahá Ndióxi cacomí a cuéntá sahá ñayivi.” Á tá ná cachi na: “Candehé ndo. Cáa ín da”, cachi na, já queá a cándúsa toho ndó nā. <sup>24</sup> Jáchi quixi cuahá nā jándahvi ndohó ta ndaja na mé ná tátuhun Cristo. Joo a juú Cristo cúu ná. Ta quixi cuaha ná ta cachi na cahan nā cuéntá Ndióxi ta jari caja na cuahá ndivaha ña náhnu xihín ña xitúhún ña ná jándahvi na ñayivi. Ta jandá nā sa nācaxi Ndióxi jándahvi na tá ná cuu caja na ña. <sup>25</sup> Candehé ndo jáchi sa nācaxi tuhun yachi ndihi i ña yóho xihīn ndo. <sup>26</sup> Ña cán queá tá ná cachi na xihīn ndo: “Candehé ndo. Yucú íchí cáa ín Cristo.” Já queá a cūhūn ndó jan. Á tá ná cachi na xihīn ndo: “Candehé ndo. Ini vehe yóho ndācaan

da cúu Cristo.” A cándúsa ndó na. <sup>27</sup> Jáchi tá quiahva yehe tása quéta xoo nu cána candii ta xójo cava indivi quiahva já queta yehe, da nachindahá Ndióxi nduu ñayivi. <sup>28</sup> Mé nu candúhu yiquí cuñu ndii cán cacuu nuú ndicutú tiyocó canduu rí.

*Ndá quiahva coo tá ná quixi tucu Jesucristo  
(Mr. 13:24-37; Lc. 21:25-33; 17:26-30, 34-36)*

<sup>29</sup> Ta ivi laá tá jacá nayaha quivi ndoho nahá ini na cán já canaá nuú candii ta ni a ndíyehe ga yoo ta janda indivi quee quimi cuyu rí nu ñuhu ta janda indivi ña nacavaha Ndióxi ndiquiji nuu. <sup>30</sup> Anda já ndaca náha ña xituhún indivi já candaá ini ñayivi ña vaxi yehe, da nachindahá Ndióxi nduu ñayivi. Ta ndaja táhan ñayivi ndúu ní cúu sahá ñuyívi ndahyi cóhó na ta já cuni na yehe quixi i tañu vico indivi xihin tóco ndihi ndeé e ta cuni na ndá quiahva cáhnu cúu yehe. <sup>31</sup> Ta já chindahá i tátó mí i ña ná tiví cóhó na trompeta já ná nditaca tóco ndihi na naxaxi i tañu tóco ndihi ñuu janda ní cúu saha ñuyívi ta janda ní cúu sahá indivi.

<sup>32</sup> Jacuaha ndó ña cuni cachi mé quiahva sácú u nu ndó sahá yító tító ñuhú. Jáchi tá yúta ndáha dó cán ta já vaxi núma válí do já candaá ini ndó ña sa nacayati tiempo ihní. <sup>33</sup> Quiahva já cuu candaá ini ndó ña tá ná cuni ndó ña sa cúu tóco ndihi ña nacachi i xihin ndo yóho já cuu candaá cáxi ini ndó ña sa nacayati tiempo quixi tucu yehe ñuyívi yóho. <sup>34</sup> Mé a ndaa ná cahan i xihin ndo ña yaha tóco ndihi ña yóho ta anda jávi quivi na ndúu tiempo viti. <sup>35</sup> Ta ndihi saha indivi xihin ñuyívi joo a ndihi toho sahá tuhun nahan i xihin ndo yóho jáchi coo tá coo tá quiahva nacachi i yóho.

<sup>36</sup> Joo ni in túhún toho ñayivi co xíni na ndá quivi á ndá hora yaha ña yóho. Ni mé tátò Ndióxi ndúu indivi co xíni na ndá quivi coo ña yóho. Ta ni yehe, da cúu in túhún jini já jahyi Ndióxi co xíni ndá quivi coo ña yóho. In túhún Ndióxi, tátá i quea xíni a. <sup>37</sup> Tá quiahva nayaha tiempo tá nasahiin Noé sanahá quiahva já yaha ri tá ná tandaa quivi quixi tucu yehe, da nachindahá Ndióxi nduu ñayivi. <sup>38</sup> Jáchi mé tiempo cán tá cámaní cuun javi quini cán já cáxixi ñayivi ta cáxihi na ta tándaha ná ndúu na janda quiahva naquihvi Noé ini barco cáhnu cán. <sup>39</sup> Ta coo naquehe na cuénta janda quiahva naxinu coo javi quini cán ta najánaa dó sahá ndihi na. Quiahva já a quehe na cuénta saha ndá quivi quixi yehe, da nachindahá Ndióxi nduu ñayivi. <sup>40</sup> Mé tiempo já canduu ivi dataa xútu da ta in da ndindita cuhun xihín i ta inga da candoo va. <sup>41</sup> Ta canduu ivi najihí ndíco na ta in ña ndindita cuhun xihín i ta inga ña candoo va.

<sup>42</sup> 'Xíni ñúhú coo tiahva vaha ndó jáchi co xíni ndó ndá quivi quixi tucu xitoho ndó. <sup>43</sup> Xíni ñúhú candaá vaha ini ndó ña tá xíni in dataa ndá hora cúni quihvi ta cuihná vehe da já quea a cúju toho da jáchi candaá vaha da vehe da já ná a quihvi da cuihná vehe da. <sup>44</sup> Sahá ña cán quea ndítahan canduu tiahva ri ndóhó va. Jáchi xinu coo yehe, da nachindahá Ndióxi nduu ñayivi mé hora tá co cáhán ndo xinu coo i nu ndo.

*Da cája chúun vaha ta da co cája chúun vaha  
(Lc. 12:41-48)*

<sup>45</sup> 'Mé ndó ndítahan nu ndó cacuu ndó tátuhun in da ndíchí jini, da cája chúun vaha nuú xitoho



da. Ta najándacoo xitoho da chuun ndáha dá ña ná quiahva da cuxu na java ga cúu mozo xihín da cán. Anda já naquee xitoho da cuahan da. <sup>46</sup> Tahví nacuu mé mozo cán tá xinu coo xitoho da ta ndítahan da cája chuun yji va da ña nacandoo nu dá caja da. <sup>47</sup> Mé a ndaa ná cahan i xihin ndo ña quiahva xitoho da cán chuun nu dá ña ná cacomí da cuénta saha tóco ndihi ñaha cómí xitoho da. <sup>48</sup> Joo tá cásahá da cája núu da ta cáhán da ña cayáncá ndivaha xitoho da ndicó coo da. <sup>49</sup> Ta sahá ña cán queá cásahá da cája xíxi da xihín java ga na cúu mozo xihin dá. Ta já cáa ga da cásahá xíxi da ta xíhi da ta já xíni da. <sup>50</sup> Ta ndaja coo xinu coo xitoho mozo cán mé quivi co cáhán da ña xinu coo da. <sup>51</sup> Anda jáví jándoho quini xitoho da cán ini da jáchi co cúu dá tá quiahva cáa da. Ta ndítahan ndoho da tá quiahva ndoho tóco ndihi na cája já mé nuú cuacu ndivaha na janda quiahva cáhña nuhu ná —nacachi Jesús.

## 25

*Sácú Jesús quiahva sahá ña nacaja uxu najihí, na tacú*

<sup>1</sup> Já cáchi tucu Jesús já:

—Tá ná xinu coo quivi cacomí Ndióxi cuénta sahá ñayivi já cacuu a tá quiahva nayaha xihín uxu najihí, na tacú tá nasahan na vicó tándaha. Tá naqueehe na candil ña ñúhu sítí ini já cuahan na ndique táhan na xihín da tándaha cán. <sup>2</sup> Uhun táhan na tacú cán cúu ná na tácu ini ta uhun na cán cúu ná na co tácu toho ini. <sup>3</sup> Ndíhuhun na co tácu ini cán natiin na candil ñaha na cuahan na joo coo naqueehe chága na sítí ña jácutú tucu

na candil tá sa cúni ndahva ña. <sup>4</sup> Joo na tácu ini cán ñehe na candil ñaha na ta ñehe ri na yúyú sítí cuahan na ña jácutú na candil tá sa cúni ndahva ña. <sup>5</sup> Ta ndaja coo ñacasáhá cáyáncá mé da tándaḥa cán sahá ña cán quéa nanaá ini ndihi na ta ñaquiiji va na. <sup>6</sup> Joo tá ñacuu yati java ñuu já tácu cáyuhú java na já cáchí na já: “Candehé ndo. Sa vaxi da tándaḥa. Cuahán queta ndó ndiquehe ndó da”, cáchí na cáyuhú na cán. <sup>7</sup> Já ñandacoo tóco ndihi na tacú cán ta ñacasáhá na cája ndíví na candil ñaha na. <sup>8</sup> Anda já ñacasáhá ndíhuhun na co tácu ini cán cáhan na xihín ndíhuhun na tácu ini cán já cáchí na já xihín ná: “Caja ndó ñamaní quiahva loho ndó sítí ndo nuú nde jáchí sa ñandíhi sítí nde ta jalóho cúni ndahva candil ñaha nde”, cáchí na co tácu ini cán. <sup>9</sup> Já ñanducú ñehe ndíhuhun na tácu ini cán tuhun nu ná já cáchí na já: “A cúu toho caja nde quiahva nde sítí nu ndó jáchí tiaḥva náá ndimaní dó nu mé nde. Vaha chága cuahán mé ndó nu cáyahvi dó cueen ndó do”, ñacachi na tácu ini cán xihín ná. Já ñaquee na co tácu toho ini cán cuahan na. <sup>10</sup> Joo nani ñaquee ndíhuhun na co tácu ini cán cuahan na cueen na sítí na já ñaxinu da tándaḥa cán ta ñandíhvi ndíhuhun ñajihí tácu ini cán ini vehe nu ín vicó tándaḥa cán ta ñandaji yéhe. <sup>11</sup> Tá ñandíhi já ñandai cuu ndíhuhun na ñasahan ñaxeen sítí cán já catí ndáḥa ná yéhe ta cáyuhú na já cáchí na já: “Cuná loho ndó yéhe nuú nde, xitoho”, cáchí na cáyuhú na ndíta na jata véhe. <sup>12</sup> Anda já ñanducú ñehe da tándaḥa cán tuhun nu ná já cáchí da já xihín ná: “Co xini toho i yo cúu ndóhó”, ñacachi da cán xihín ná —ñacachi Jesús.

13 Já nacachi tucu Jesús já:

—Sahá ña cán quea xini ñuhú cuénta vaha coo ri ndóhó va jáchi co xini ndó ndá hora xinu coo quívi cacomí Ndióxi cuénta saha ndo —cáchi Jesús.

*Ña nacaja in taa xihín jiuhún da  
(Lc. 19:11-27)*

14 Ta já cáchi tucu Jesús já:

—Tá ná xinu coo quívi cacomí Ndióxi cuénta saha ñayivi já cacuu a tátuhun ña nayaha xihín in dataa. Tá naxinu coo quívi quee da cuhun xicá da já nacana da java da cája chúun xihín dá. Ta já nandiquiahva da jiuhún da ndahá da cán ña ná candaa da ña. 15 Ta tá quiahva tiahva in in da cañehe da jiuhún quiahva já nasahan xitoho da nu dá. In táhan da cán nasahan xitoho da uhun mil nu dá ña ná candaa da ña. Ta inga da cán nañehe ivi mil. Ta inga da cán nañehe in mil. Anda já naquee xitoho da cuahan xicá da. 16 Ta ndaja coo da nandiquiahva xitoho uhun mil ndáha cán nacaja da ndahvi xihín jiuhún xitoho da ta já nañehe dá inga uhun mil chága jatá. 17 Ta jári da nasahan xitoho ivi mil nu cán nacaja da ndahvi xihín jiuhún cán ta nañehe dá inga ivi mil jatá. 18 Joo da nasahan xitoho in mil nu cán natiin da jiuhún xitoho da ta já nasahan da nacaan da in yávi ta já najánduxu da ña.

19 Ta tá sa nayaha cuaha tiempo já nandicó coo xitoho mozo cán. Ta já nacasáhá cája vií da cuénta xihín da cán. 20 Ta já naxinu da nañehe uhun mil cán nuú xitoho da ta já nandiquiahva da inga uhun mil ña nañehe dá jatá jiuhún cán nuú xitoho da. Ta já cáchi da já xihín xitoho da: “Candehé

ndo uhun mil nasahan ndó nuú i. Joo yóho ín inga uhun mil nañehé e jatá”, nacachi da xihín xitoho da. <sup>21</sup> Anda já nacachi xitoho da já xihín dá: “Vaha ndivaha nacajún. Mozo vaha ndivaha cúu yóhó jáchi chá va nasahan i nuun ta vaha nacaja chúun ña. Sahá ña cán quéa caja i ña ná cacomún cuéntá sahá cuaha chága ñaha. Ta viti cuu coún xihín i ta já ná cajii chága inún”, nacachi xitoho da. <sup>22</sup> Tá nandihí já naxinu coo ri da nandiquehe ivi mil cán nuú xitoho da. Já nacachi da já xihín xitoho da: “Ivi mil nasahan ndó nuú i joo yóho ín inga ivi mil nañehé e jatá”, nacachi da xihín xitoho da. <sup>23</sup> Anda já nacachi xitoho da já xihín dá: “Vaha ndivaha nacajún. Mozo vaha cúu yóhó jáchi chá va nasahan i nuun ta nacaja chúun vahún ña. Sahá ña cán quéa caja i ña ná cacomún cuéntá sahá cuaha chága ñaha. Ta viti cuu coún xihín i ta já ná cajii chága inún”, nacachi xitoho da. <sup>24</sup> Joo tá naxinu coo ri da nañehé in mil ndahá xitoho cán já nacasáhá cáchí da já xihín xitoho da: “Candehé ndo, xitoho i. Sa cándaá vaha ini i ña cúu ndó in ta ndacú ndivaha tuhun. Ta vatí co xútu ndó nuú in ñuhu joo jáquee tá jáquee ndó nu á. Ta jataca ndó ña nuú coó naxutu ndó ña. <sup>25</sup> Sahá ña cán quéa nayihví vi ta nasahan i najánduxu u jjuhún nasahan ndó nuú i tixi ñuhu. Joo yóho ín jjuhún ndo ndiquehe ndó ña”, nacachi da cán xihín xitoho da. <sup>26</sup> Anda já nacachi xitoho da já xihín dá: “Coo cúun in mozo vaha nuú i. Cúun da júsa ndivaha. Sa cándaá vaha inún ña jáquee e nu ñuhu ña co xútu u, <sup>27</sup> ña cán quéa ndá cuéntá quéa coó nasahan tóun jjuhún i banco já ná ndiquehe e jiqui á nuú na cán tá ná ndicó coo i, nduu”, nacachi xitoho da

cán xihín dá. <sup>28</sup> Anda já nacachi da xihín java na ndúu cán: “Candaa ndó in mil jan ndahá da jan ta quiahva ndó ña nuú da sa cómí uxu mil jan. <sup>29</sup> Jáchi da cája chúun vaha ñehe chága ví da ñaha já queá ná coo cuahá chága nu dá. Joo da co cája chúun vaha janda ña chá cómí da ndindaa ndáha dá. <sup>30</sup> Ta mozo a váha toho jan tiin ndó da jácana ndó da nuú naá jata véhe jan. Cán cúu nu ndáhyi ndaa ñayivi janda quiahva cáhña nuhu ná sahá ña ndóho ndivaha ini na”, nacachi xitoho da, — nacachi Jesús.

*Tá ná cavií sahá ñayivi nu Ndióxi*

<sup>31</sup> Já nacachi tucu Jesús já:

—Tá ná xinu quiví quixi yehe, da nachindahá Ndióxi nduu ñayivi ta quixi i xihín tóco ndihi na cúu tát Ndióxi. Anda já cacoo i nu sácoo na sáhndá chuun ta já ndicáhnu ndivaha i. <sup>32</sup> Ta nditaca ñayivi ndúu ndíjáá ñuyiví nuú i. Ta já casahá i ndicahnda java táhan i na tá quiahva cája in da ndáá ndicachi tá sáhndá java da ndicachi xihín tijúhu ña ná a cáva táhan rí. <sup>33</sup> Ta já chinduu u ñayivi cuéntá mí i, na cúu tátuhun ndicachi cán xoo cuáha i. Ta xoo íti i chinduu u na co cúu cuéntá mí i, na cúu tátuhun tijúhu cán. <sup>34</sup> Ta sahá ña cúu u da cómí cuéntá sahá ñayivi sahá ña cán queá cachi i já xihín na ndúu xoo cuáha i cán já: “Cuáyaha ndó ná cacomí Ndióxi, tátá i cuéntá saha ndo jáchi cúu ndó na nacaja cuahá mé á ñamaní xihín. Jáchi janda tá camaní cava sahá saha ñuyiví sa nasacu tiahva mé á nuú canduu ndó ña cacomí a cuéntá saha ndo. <sup>35</sup> Jáchi nasahan ndó naxixi i tá nacuico i. Ta nasahan ndó ticuí nuú i tá nahichi

ini i. Ta nandiquehe vaha ndó yehe tá nasacuu u da tóho naxinu i nu ndo. <sup>36</sup> Ta najasá ndo jáhma nuú i tá co ñéhé e ña cándixi i. Ta tá nasaquíhvi já nachindeé ndó yehe. Ta tá nasandacaan i vecaa já naxito nihni ndó yehe.” <sup>37</sup> Anda já ndaca tuhún java na nacaja vaha ta já cachi na já xihín i: “Ndá tañu quéa naxini nde ña cuico ndó, xitoho nde ta já nasahan nde ña xixi ndó. Ta ndá tañu naxini nde ña íchi ndó ticuúí ta já nasahan nde ticuúí nu ndo. <sup>38</sup> Ta ndá tañu nasacuu ndó da tóho ta nandiquehe vaha nde ndohó. Ta ndá tañu naxini nde ña cámaní jáhma candixi ndó ta najasá nde ña nu ndo. <sup>39</sup> Ta ndá tañu quéa naxini nde ña quíhvi ndo ta nachindeé nde ndohó. Ta ndá tañu nasandacaan ndó vecaa ta naxito nihni nde ndohó.” <sup>40</sup> Anda já cachi yehe, da cómi cuéntá sahá ñayivi já xihín ná: “Mé a ndaa ná cahan i xihín ndó ña tá nacaja ndó a xihín na cúu cuéntá mí i, na coó saha nuú ñayivi ñuyiví já cúu á tátuhun nacaja ndó a xihín mí i”, cachi i xihín na ndúu xoo cuáha i.

<sup>41</sup> 'Anda já casahá cachi i já xihín na ndúu xoo íti i cán já: “Caxoo ndó nuú i jáchi cúu ndó na nacatavi cháhan ta cuhun ndó indayá cañuhu ndó anda ama cáa quivi. Jáchi ña jan cúu ña nasacu tiahva Ndióxi ndacaan tiñahá sacuaaha xihín tátó mé rí. <sup>42</sup> Jáchi coó nasahan ndó ña xixi i tá nacuico i ta ni coó nasahan ndó ticuúí nuú i coho i tá nahichi ini i. <sup>43</sup> Da tóho cúu u naxinu coo i tañu ndó ta coó nandiquehe vaha ndó yehe. Ta nandimaní i ña candixi i ta coó nasahan ndó in jáhma loho nuú i. Nasaquíhvi ta nasandacaan i vecaa ta coó naxito nihni ndó yehe”, cachi i xihín na ndúu xoo íti i cán. <sup>44</sup> Anda já nducú ñehe ri na cán tuhun nuú i já cachi

na já xihín i: “Ndá tañu quéa naxini nde ña cuíco ndó ta ndá tañu quéa naxini nde ña íchi ini ndó ticuú ta ndá tañu nasacuu ndó da tóho ta ndá tañu nandimaní jáhma ndo ta ndá tañu nasahin quíhvi ndo ta ndá tañu nasandacaan ndó vecaa ta coó nachindeé nde ndohó”, cachi na ndúu xoo íti i cán xihín i. <sup>45</sup> Anda já cachi i já xihín na co cúu cuénta mí i já: “Mé a ndaa ná cahan i xihin ndo ña tá ta coó nacaja ndó xihín ñani táhan ndó, na coó saha nuú ñayivi ñuyívi já quéa coó nacaja ndó ña xihín yehe”, cachi i xihín na co cúu cuénta mí i. <sup>46</sup> Ta já yaha ndihi na cán cuhun ná indayá anda ama caa quívi. Ta na nacaja vaha cán yaha na nu Ndióxi catacu na anda ama caa quívi —cáchi Jesús.

## 26

### *Ndítuhún jehé na tiin na Jesús*

(Mr. 14:1-2; Lc. 22:1-2; Jn. 11:45-53)

<sup>1</sup> Tá nandihí nacahan Jesús tóco ndihí ña yóho xihín ñayivi cán já nacachi a xihín na xíca tuun xihin á cán já:

<sup>2</sup> —Sa cándaá ini ndó ña tixi ivi quívi coo vicó pascua ta já ndiquiahva na yehe, da nachindahá Ndióxi nduu ñayivi ndahá na cata caa yehe ndica crúxu —nacachi Jesús xihín na xíca tuun xihin á cán.

<sup>3</sup> Anda já na sacuaḥa nuú jutú xihín na jánaḥa ley Moisés xihín na sacuaḥa veñuhu nandique táhan na yéhe Caifás, da cúu sacuaḥa chága nu ndíhi jutú cán. <sup>4</sup> Ta najándique táhan tuhun na ndá quiahva caja na tiin jehé na Jesús ña ná cahní ñahá na. <sup>5</sup> Já cáchi xihin táhan na já:

—Joo a tíin toho í da tañu mé víco jáchi tia\_hva náa ndiva\_a ñayivi —ñacachi na.

*Tá n\_achojo in ñáñá\_ha perfume jini Jesús  
(Mr. 14:3-9; Jn. 12:1-8)*

<sup>6</sup> Ta ndaja coo íin Jesús ñuu Betania vehe Simón, da cáhan na xihín: taa nandoho cuehe táhyi. <sup>7</sup> Já naxinu in ñáñá\_ha nu á ta cáñee in yúyú ña alabastro ndá\_ha ña. Ta ini mé yúyú cán ñúhu perfume, dó yahvi ndiva\_ha. Ta já naxinu ña najá\_cuyu ña do jini Jesús nani íin coo a nu mesa cán. <sup>8</sup> Tá naxini na xica tuun xihín Jesús cán ña yóho já nacasá\_ha na xójo ini na já cáchi na já:

—Ndá cuénta quéa tívi uun perfume yahvi ndiva\_ha yóho. <sup>9</sup> Jáchi cuu jicó yó do ta já quehé cuahá jiu\_hún sa\_ha do, nduu ta já cuu jasa yo jiu\_hún cán nuú na ndahví —ñacachi na cán.

<sup>10</sup> Ta nacanda\_a ini Jesús ña cáhvi ini na cán ña cán quéa nacasá\_ha cáchi a já xihín ná:

—Ndá cuénta quéa cája cuehe ndó xihín ñáñá\_ha jan jáchi ña va\_ha quéa nacaja ña yóho xihín í.

<sup>11</sup> Jáchi na ndahví ní tiempo canduu na tañu ndó joo yehe a cóo tuun toho í xihín ndo. <sup>12</sup> Jáchi tá najá\_cuyu ña perfume yiquí cuñu í já nacaja tia\_hva ña yehe ná coo tia\_hva ví tá ná casa\_a quiví nduxu.

<sup>13</sup> Mé a ndaa ná ca\_han í xihín ndo ña ní cúu ñuyiví nuú caca nuu ñayivi ca\_han na tuhun va\_ha sa\_ha í ndicani na ña nacaja ña yóho xihín í já ndicu\_hun ini na sa\_ha ña —ñacachi a.

*Jicó túhún Judas Jesús  
(Mr. 14:10-11; Lc. 22:3-6)*

<sup>14</sup> Ta ndaja coo in táhan da uxu ivi xica tuun xihín Jesús, da naní Judas Iscariote nasahan da ca\_han da



xihín na sacuaḥa nuú jutu. <sup>15</sup> Ta já cáchí da já xihín ná:

—Ndaja quiahva ndó nuú i tá ná ndiquiahva i Jesús nu ndo —nacachi Judas xihín na sacuaḥa nuú jutu cán.

Anda já nasahan na oco uxu jiuḥun cúxú nu dá sahá Jesús. <sup>16</sup> Ta sa mé nani já nacasáhá Judas ndúcú da ndaja cuu caja da ndiquiahva da Jesús ndáḥa ná.

*Tá naxijini ndayí Jesús xihín na xíca tuun xihín á (Mr. 14:12-25; Lc. 22:7-23; Jn. 13:21-30; 1 Co. 11:23-26)*

<sup>17</sup> Mé quiví nuú vicó xíxi na pan, ña co quée yusá naxaa xihín cán já naxinu na xíca tuun xihín Jesús cán nu á. Já nacachi na já xihín á:

—Ndáchí cúní ndó cuḥun nde caja ndíví nde cajíni ndó vicó pascua —nacachi na xihín á.

<sup>18</sup> Anda já nacachi Jesús já xihín ná:

—Cuáhán ndó ñuu jaḥ ta jaḥ cuni ndó in dataa ta já cachi ndó já xihín dá: “Da jánaḥa ndeḥe cáchí xuhun: Cuḥun i vehe ndó cajíni i vicó pascua xihín na xíca tuun xihín i jáchi sa nandindaa tiempo cuḥun i viti” —nacachi Jesús.

<sup>19</sup> Já naquee na cán nasahan na nacaja na tá ín nasahnda Jesús nu ná ta cán nacaja ndíví na ña cajíni na vicó pascua.

<sup>20</sup> Ta ndaja coo tá nacuaá já nasacoo Jesús nu mesa xihín ndíhuxu iví na xíca tuun xihín a cán.

<sup>21</sup> Ta nani xíjini na já nacasáhá cáchí a já:

—Mé a ndaa ná caḥan i xihín ndó ña in táhan ndó, na xíca tuun xihín i cacuu da jicó túhún yeḥe —nacachi Jesús xihín ná.

<sup>22</sup> Anda já naçasáhá nā cán cácuéha ndivaha ini na já naçasáhá tá in tá in na ndáca tuhún nā Jesús já cáchí nā já xihín á:

—Á yehe cacuu da jicó tuhún ndo, xitoho i — cáchí nā ndáca tuhún ñahá nā.

<sup>23</sup> Anda já nanducú ñehe Jesús tuhun nu ná já nacachi a já xihín ná:

—Da naquihvi ndáha ini coho xíxi i, da cán cúú da jicó tuhún yehe. <sup>24</sup> Yehe cúú da nachindahá Ndióxi nduu ñayivi ta ndítahan nuú i quivi i tá ín cáchí tuhun Ndióxi. Joo ndáhvi nahá nacuu da jicó tuhún yehe. Janda vaha chága ná a cácu da, nduu —nacachi Jesús.

<sup>25</sup> Anda já nandicahan Judas, mé da jicó tuhún ñahá cán já nacachi da já xihín Jesús:

—Xitoho i, á yehe cúú da jicó tuhún ndo — nacachi da xihín á.

—Jivi mún cúú dá —nacachi Jesús xihín dá.

<sup>26</sup> Ta nani xíxi na ndúu na natiin Jesús pan já nandiquiahva ndixahvi nu Ndióxi. Tá nandihi já nasahnda java ña ta nandicahnda ña nuú nā xíca tuun xihín á cán. Ta já nacachi a já xihín ná:

—Júhun ndó jáchi ña yóho cúú tátuhun yiquí cuñu i —nacachi a.

<sup>27</sup> Tá nandihi já natiin a in vaso nu ñúhu tó uva já nandiquiahva ndixahvi nu Ndióxi já nacachi a já xihín nā xíca tuun xihín á cán já:

—Coho ndihi ndó dó ñúhu ini vaso yóho. <sup>28</sup> Jáchi dó yóho cúú dó tátuhun ñí i, dó cuíta sahá cuahá ñayivi já ná ndoo cuachi na. Tá ná cuíta ñí i já candaa ini ndó ña najáxinu coo Ndióxi tuhun a nasahan sanahá. <sup>29</sup> Mé a ndaa ná cahan i xihín ndo ña a cóho ga i tó uva janda quiahva ná xinu

coo quiví coho tucu u inga dó vaha chága xih̄in ndo tá ná xinu quiví cacomí Ndióxi, tátá i cuéntá sahá ñayivi —ñacachi a.

*Cáxi tuhun Jesús ña chijehé tuhún Pedro ña xini da mé á*

*(Mr. 14:26-31; Lc. 22:31-34; Jn. 13:36-38)*

<sup>30</sup> Ta tá nandihí ñaxita na in canto já ñaquee na cuahan ña yúcu yitó olivo. <sup>31</sup> Ta já ñacachi Jesús já xih̄in ná:

—Mé ñuú viti jándacoo ndihí ndó yehe cūhun ndó sahá ña ndoho i. Já cáchí tuhun Ndióxi já: “Cahní i da ndáá ndicachi ta xih̄in ña yóho ndicuita nuu ndicachi jana dá cūhun ri”, cáchí tuhun Ndióxi. <sup>32</sup> Joo tá sa ná nditacu tucu u já cūhun jihna ñuhú yehe estado Galilea anda já cūhun mé ndó —ñacachi Jesús.

<sup>33</sup> Anda já nanducú ñehe Pedro tuhun nu á já ñacachi da já xih̄in á:

—Vatí ná jándacoo tóco ndihí na mé ndó sahá ña ndoho ndó joo a jándacoo toho i ndohó —ñacachi da xih̄in á.

<sup>34</sup> Anda já ñacachi Jesús já xih̄in dá:

—Mé a ndaa ná cuhan i xuhun ña mé ñuú viti tá cámani cana chéle já chijehé tuhún ña xinun yehe uní táhnda —ñacachi Jesús xih̄in dá.

<sup>35</sup> Anda já ñacachi tucu da já:

—Vatí ná quivi i xih̄in ndo joo a chíjehé tuhun toho i sahá ña xini i mé ndó —ñacachi da xih̄in Jesús.

Ta quiahva já ñacachi tóco ndihí java ga ña xica tuun xih̄in á cán.

*Tá xíca tahví Jesús nu Ndióxi in nuú naní a Getsemani*

(Mr. 14:32-42; Lc. 22:39-46)

<sup>36</sup> Anda já naxinu coo Jesús xihin na xíca tuun xihin á cán in nuú naní a Getsemani. Já nacachi a já xihin ná:

—Yóho cacoo ndó nani ná cuhun i cáa caça tahví i nu Ndióxi —cáchi a.

<sup>37</sup> Ta ndáca Pedro xihin ndívi da cúu jahyi Zebedeo cuahan xihin á. Ta já nacasáhá cácuéha ndivaha ini a ta a juú quiahva táhvi ini a. <sup>38</sup> Anda já nacachi a já:

—A juú quiahva cácuéha ini i chí quivi i cúu ini i. Yóho candati too ndó yehé ta coto a cúju ndo —nacachi Jesús.

<sup>39</sup> Ta já naquee mé á nasahan loho chága chí nuu já nacaxítí a janda quiahva naxinu taan nu ñúhu. Ta já cáchi a já:

—Tátá Ndióxi, tá ta ná cuu caja ndó ñamaní ña ná a ndóho i ña ihvi ndivaha vaxi nuú i ndoho i. Joo ná coo tá ín cúní mé ndó ta ná a cóo toho ña cúní yehé —cáchi Jesús.

<sup>40</sup> Tá nandíhi já nandicó coo a nuú najándacoo a na xíca tuun xihin á cán ta já nandíñehé á na quíji na ndúu na. Anda já nacachi a já xihin Pedro:

—Á cóo nacuu candita ndó ni in hora. <sup>41</sup> Xíní ñúhú coo tiahva ndó ta caça tahví ndo nu Ndióxi já ná a cóto ndojó rí quini ndohó. Jáchi ínimá ñayivi cúní a ndinducú a Ndióxi joo yiquí cuñu na co ín tiahva caja ña cúní Ndióxi —nacachi Jesús.

<sup>42</sup> Anda já naquee tucu Jesús táhnda ivi cuahan tucu a caça tahví a nu Ndióxi já cáchi a já:

—Tátá Ndióxi, tá ta a cúu va caja ndó ñamaní ná a ndóho ini i ña jan já ná coo tá íin cúní mé ndó coo —cá chí a.

<sup>43</sup> Tá nandihí já nandicó coo tucu a nu ndúu na xíca tuun xihín á cán ta nandiñehe á na quíji tucu na ndúu na jáchi naquehe a mahnú na. <sup>44</sup> Já naquee tucu a nasahan xíca tahví a nu Ndióxi táhdá uní ta sa mé tuhun cán nacañan tucu a. <sup>45</sup> Anda já naquixi tucu a nu ndúu na xíca tuun xihín á cán já nacachi a já xihín ná:

—Vatí cúní ndó cuju ndó ta vatí cúní ndó ndiquehe ndée ndó joo a cúu caja ndó ña viti. Jáchi sa naxinu coo hora ndiquiahva na yehe, da nachindahá Ndióxi nduu ñayivi ndahá ñayivi cája cuachi. <sup>46</sup> Cuahán ndacoo ndó ná cohó. Jáchi sa vaxi da jicó túhún yehe —cá chí a.

### *Tá natiin na Jesús*

*(Mr. 14:43-50; Lc. 22:47-53; Jn. 18:2-11)*

<sup>47</sup> Ta nani cáhan yíi va Jesús já naxinu Judas, da cúu in táhan uxu ivi na xíca tuun xihín á cán. Ta ndáca da cuahá ñayivi, ñehe na machítí xihín yító viti. Ta na cán cúu ná na naquixi cuéntá na sacuaña nuú jutú xihín cuéntá na sacuaña veñuhu. <sup>48</sup> Ta mé Judas, da ndiquiahva ñahá cán sa nacandoo da xihín na cán ña tatí yúhu dá sajóho Jesús jáchi nacachi da já xihín ná:

—Ndá da ná tatí yuhú u sajóho, da cán cúu dá tiin ndó —nacachi da.

<sup>49</sup> Chí ivi laá nacativi da nu Jesús já nacañan Ndióxi dá xihín á ta já natatí yúhu dá sajóho mé á.

<sup>50</sup> Anda já nacachi Jesús já xihín dá:

—Cama chá cajún ña, amigo.

Anda já nacayati na nu Jesús ta natiin tuun na a.

<sup>51</sup> Joo in táhan da xíca tuun xihín Jesús cán, natavá da machítí da ta já năchitúhūn da in joho da cúú mozo nuú da sacuahă chăga nu ndíhi jutū cán. <sup>52</sup> Anda já nacachi Jesús já xihín dá:

—Chicaan vaha machítí jan jáchi ndá na sáhní xihín machítí, xihín machítí quivi ri na cán va. <sup>53</sup> Á cō cándaā inún ña cuu cača tahví i nu Ndióxi, tátá i ña ná chindahá mé á cuahă ndivaha tátō mé á ña ná chindeé na yehe. <sup>54</sup> Cuu caja i ña joo xíní ñúhú yaha tá yaha ña năcahyi nuú tuhun Ndióxi ndoho i —cáchi Jesús.

<sup>55</sup> Ta já nacachi Jesús já xihín na năxinu tiin ñahá cán:

—Cája ndó xihín i tátuhun cája na xihín taa cuihná jáchi naqueta ndó vaxi ndó tiin ndó yehe xihín machítí ta xihín yító viti. Ta ndijáá ní quivi năsahiin i xihín ndo ini veñuhu cáhnu jánahă i tuhun Ndióxi nu ndo ta ni in tañu cōó natiin ndó yehe. <sup>56</sup> Joo tóco ndihi ña yóho yáha ña já ná xinu cōo ña năcahyí na profeta sahá i ini tuhun Ndióxi sanahá —cáchi a.

Tá năndihi já năxinu ndihi na xíca tuun xihín Jesús cán cuahan na ta najándacoo na mé á.

*Tá ñéhe na Jesús cuahan na nuú nataca ndihi na sacuahă*

*(Mr. 14:53-65; Lc. 22:54-55, 63-71; Jn. 18:12-14, 19-24)*

<sup>57</sup> Tá natiin na cán Jesús já ñéhe na a cuahan na nuú Caifás, da cúú sacuahă chăga nu ndíhi jutū. Ta cán sa nănditútú na jánahă ley Moisés ndúu na xihín na sacuahă veñuhu. <sup>58</sup> Joo ndaja coo

na<sub>s</sub>andico xicá Pedro Jesús anda quiahva naxinu da yéhe vehe da cúu sacuahá chága nu ndíhi jutú cán. Ta já nandihvi da nasacoo da nu ndúu soldado cán sándehe da ndá quéa caja na xihín Jesús.

<sup>59</sup> Ta na sacuahá nuú jutú xihín tóco ndihi na cómi cuénta sahá na Israel nataca na cán ndúcú na cuachi jácojo na jatá Jesús já ná cuu cahni ñahá na. <sup>60</sup> Joo cóo ñañehe ná cuachi jíquí ña cuu chinúu na jata mé á vatí naxinu cóo cuahá na nacahan ña tuhún sahá. Anda jáví naxinu cóo ivi ga da cahan ña tuhún sahá. <sup>61</sup> Já nacachi da já:

—Naxini johó nde nacachi da jan já: “Jánditani i veñuhu cáhnu cán ta jácandichi tucu u ña tixi uní quiví”, cáhí da —nacachi na cán chícāan na cuachi jatá Jesús.

<sup>62</sup> Anda já nandaca ndichi da cúu sacuahá chága nu ndíhi jutú cán já cáhí da já xihín Jesús:

—Á chí a ndúcú ñehún tuhun nuú nde sahá cuachi jácojo na jatun —nacachi da.

<sup>63</sup> Joo ni in tuhun cóo nanducú ñehe Jesús nu dá. Anda já nacachi da cúu sacuahá chága nu ndíhi jutú cán já xihín á:

—Tavún quiví Ndióxi, ña tácu in indivi ta cachún xihín nde á jivi ndusa yóhó cúun Cristo, da cúu in tuhún jiní já jahyi Ndióxi, da nachindahá mé á cacomí cuénta sahá ñayivi —nacachi da xihín Jesús.

<sup>64</sup> Já nanducú ñehe Jesús tuhun nu dá já nacachi a já:

—Ajan, jivi yehe cúu u da cáhí ndó jan. Ta viti ná cahan i xihín ndo ña vaxi quivi tá cuni ndó yehe, da nachindahá Ndióxi nduu ñayivi cacoo i

xoo cuáha Ndióxi, mé á íin cuaha ndée. Ta já cuni ndó yehe ndicó coo i ñuyívi yóho tañu vicó tá ná quixi i chí indiví —ñacachi a.

<sup>65</sup> Tá naxini johó da sacuaḥa chága nu ndíhi jutú cán ña yóho já nandatá da jáhma dá ña ná candaa ini ñayivi ña xójó ini da. Ta já ñacachi da já:

—Ndája núu da yóho Ndióxi. Coó chicuu chága yó ñayivi ná caḥan na xihín yo jáchi sa naxini johó ndihí ña ñacanahá da yóho xihín Ndióxi. <sup>66</sup> Ta ndaja xíní ndó caja í xihín dá viti —ñacachi da.

Anda já ñacachi ndihi na cán já:

—Íin cuachi da jañ ta ndítahan cuḥun da quivi da —ñacachi na cán.

<sup>67</sup> Ta já ñacasáhá na xíhnu ndaa na tójíi na nu á. Ta ñacasáhá túxú na yiquí a. Ta java na cáni jahndá nuu á. <sup>68</sup> Ta já cáchi na já xihín á:

—Caḥan xihín nde yo ñacani yohó tá ta mé a ndaa cúun Cristo, da ñachindahá Ndióxi cacomí cuéntá saḥá ñayivi —cáchi na xihín á.

*Tá nachijehé tuhun Pedro ña xíní da Jesús*

*(Mr. 14:66-72; Lc. 22:56-62; Jn. 18:15-18, 25-27)*

<sup>69</sup> Ta ndaja coo íin coo Pedro yuhú yéhe da cúu sacuaḥa chága nu ndíhi jutú cán. Já ñacativi in ñáñáḥa, ña caja chúun mé vehe cán. Já ñacasáhá cáchi ña já xihín dá:

—Yóhó cúun in táhan da xíca tuun xihín Jesús, da estado Galilea —ñacachi ña cán xihín dá.

<sup>70</sup> Joo ndaja coo nachijehé tuhun Pedro nu ndíhi na cán ña xíní da Jesús. Já cáchi da já:

—Coo xíní toho i ndá saḥa cáḥun —ñacachi da xihín ña cán.



<sup>71</sup> Ta tá sa ñaqueta da yéhe cán já ñaxini inga ñáñáha da já ñacasáhá cáchí ña já xihín tóco ndihi na ndúu cán:

—Ñaxini i ñaxica tuun da yóho xihín Jesús, da ñuu Nazaret cán —ñacachi ñá cán.

<sup>72</sup> Ta já ñacasáhá tucu Pedro chíjehé tuhun da ña xini da Jesús ta ñatavá da quivi Ndióxi já cáchí da já:

—Co xini toho i ndá da cúu da ñan —ñacachi Pedro xihín na cán.

<sup>73</sup> Chá va ñayaha ña yóho ta ñacayati java na ndúu cán nu Pedro. Já ñacachi na já xihín dá:

—Mé a ndaa táhyí jivi táhan na xica tuun xihín Jesús cúu ri yóhó va jáchi cáhun tátuhun cáhan na cán —ñacachi na xihín dá.

<sup>74</sup> Anda já ñacasáhá Pedro cánahá da ta ñatavá da quivi Ndióxi ña co xini da Jesús. Já cáchí da já:

—Co xini toho i ndá da cúu da ñan —ñacachi da.

Tá ñacachi da já chíivi laá ñacana chéle. <sup>75</sup> Anda já ñandicuhun ini Pedro ña ñacahan Jesús xihín dá tá ñacachi a xihín dá: “Tá cámaní cana chéle sa chíjehé tuhún ña xínun yehe uní tañu.” Anda já ñaqueta da ñata véhe ta a juú quiahva sácu da jáchi cácuéha ndivaha ini da.

## 27

*Tá ñandiquiahva na Jesús ndáha Pilato  
(Mr. 15:1; Lc. 23:1-2; Jn. 18:28-32)*

<sup>1</sup> Tá ñativi inga quivi itaan já ñandique táhan ndihi na sacuahá nuú jutú xihín na sacuahá veñuhu ña nditúhún na ndá quiahva jácojo na cuachi ñatá Jesús já ná cuu cahní ñahá na. <sup>2</sup> Sahá ña cán queá ñacató na mé á ta ñéhe na a cuahan na

ndiquiahva na mé á nu Pilato, da cúu gobernador ñuu cán.

### *Tá naxihí Judas*

<sup>3</sup> Ta ndaja coo naxini Judas, da najicó túhún Jesús ña nasacu ini na cán cahní na Jesús. Já nacahvi ini da sahá ña núu nacaja da chí ndáva da cuahan da nducú ñehe da ndíhocō uxu jiuñun cúxú nuú na sacuaḥa nuú jutū xihín nuú na sacuaḥa veñuhu. <sup>4</sup>Já nacachi da já xihín na cán:

—Cuachi cáhnu ndivaha quēa nacaja i jáchi najicó túhún i in da coó cuachi.

Já nacachi na cán já xihín dá:

—Co sáhní toho nde mé nde sahá ña yóho. Mún xini ndá quēa nacajún —nacachi na cán xihín dá.

<sup>5</sup> Andá já nacuihna Judas jiuñun cán ini veñuhu cáhnu. Ta já naqueta da nasahan da nacata caa da mé dá já nasahní da mé dá.

<sup>6</sup> Ta já najátaca na sacuaḥa nuú jutū jiuñun cán já nacachi xihín táhan na já:

—A váha toho ña ná chican yó jiuñun yóho ini satō nu táan na jiuñun jóco na nu Ndióxi jáchi ndii naxihí sahá ña yóho —nacachi na.

<sup>7</sup> Ta tá sa nanditúhún vaha xihín táhan na já naxeen na in ñúhu xihín jiuñun cán. Mé ñúhu cán naní a ñúhu da cávaha ñaha xihín ñundáhyi. Ta ñúhu cán cacuu a nu jánduxu na na tóho. <sup>8</sup>Sahá ña cán quēa nasacu na quivi ñúhu cán ña cananí a yójo nuú naxita nii. Ta já naní a janda viti. <sup>9</sup>Ta xihín ña yóho naxinu coo nuú ña nacahyí profeta Jeremías sanahá tá nacachi da já sahá Jesús: “Natiin na ndíhocō uxu jiuñun cúxú jáchi ña jan nasacuu yahvi nasacu na Israel chahvi na saḥa dá. <sup>10</sup> Ta

xihin mé jjuhún cán naxeen na ñúhu naní a ñúhu da cávaha ñaha xihín ñundáhyi jáchi quiahva já nasahnda Ndióxi chuun nuú i caja i”, cáchi tuhun Ndióxi.

*Tá cándichi Jesús nu Pilato*

*(Mr. 15:2-5; Lc. 23:3-5; Jn. 18:33-38)*

<sup>11</sup> Ta ndaja coo cándichi Jesús nu Pilato, da cúu gobernador. Ta já nacasáhá da cán ndáca tuhún ñahá da já cáchi da já xihín á:

—Á mé a ndaa cúun in rey, da cómi cuénta sahá na Israel.

—Ajan. Jivi ndusa cúu u tá quiahva cáchi ndó jan —nacachi Jesús xihín dá.

<sup>12</sup> Ta na sacuahá nuú jutú xihín na sacuahá veñuhu nachicaan na cuachi jatá Jesús joo ni in tuhun coó nanducú ñehe a nu ná. <sup>13</sup> Anda já nacachi Pilato já xihín Jesús:

—Á co xini johó tohún ndaja cuahá nuú cuachi jácojo na jatun —nacachi da.

<sup>14</sup> Joo ni in túhún tuhun coó nanducú ñehe Jesús nu dá. Chí catóntó ndivaha da cúu gobernador sahá ña co cáhan Jesús.

*Sácu ini na ndaja caja na ña ná quivi Jesús*

*(Mr. 15:6-20; Lc. 23:13-25; Jn. 18:38-19:16)*

<sup>15</sup> Tañu mé víco pascua nasahiin costumbre da cúu gobernador cán sá janí da in táhan da ndácaan vecaa. Ndá da cúní ñayivi janí da, da cán cúu da janí da. <sup>16</sup> Mé tañu já nasandacaan in da naní Barrabás vecaa. Níi cúu naxita nuu tuhun sahá da yóho. <sup>17</sup> Ta tá nataca ndihi ñayivi já nandaca tuhún Pilato na já nacachi da já xihín ná:

—Yo cúni ndo ña ná janí i. Á Barrabás janí i á Jesús, da cáchí na cúu Cristo, da nachindahá Ndióxi cacomí cuéntá sahá ñayivi. Yo janí i cúni ndo —nacachi da.

<sup>18</sup> Nacachi Pilato ña yóho xihin ná jáchi sa cánda vaaha ini da ña sahá ña cáhivi ini na xihin Jesús sahá ña cán quéa nandiquiahva na mé á nu dá.

<sup>19</sup> Ta nani íin coo da nu sácoo da sáhdá da chuun vechúun cán já nachindahá ñájíhí da tuhun nu dá já nacachi ñá já: “A quíhvi ndáhun Jesús jáchi cúu dá in ta ndaa. Ñuú anda véhe nasaní i nacaja Jesús ta ndícani ndivaha ini i sahá”, nacachi ñá.

<sup>20</sup> Joo ndaja coo na sacuahá nuú jutú xihin na sacuahá veñuhu cán najácahan na ñayivi ña ná caça na nu Pilato ña ná janí da Barrabás ta ná cahní da Jesús. <sup>21</sup> Anda já nacachi da cúu gobernador cán já xihin ná:

—Yo cúni ndó ña ná janí i.

Anda já nacachi na cán já:

—Barrabás jan va janí ndó —nacachi na xihin dá.

<sup>22</sup> Anda já nacachi tucu Pilato já xihin ná:

—Ndía cúni ndó caha i xihin Jesús, da cáchí ndo cúu Cristo.

Anda já nacachi tóco ndihi na cán já:

—Cata caa ndó da ndica crúxu.

<sup>23</sup> Anda já nacachi tucu Pilato já xihin ná:

—Ndá cuachi nacaja da, vaaha —nacachi da xihin ná.

Joo xihin ña yóho ví ga ví nacasáhá cáyuhú na já cáchí na já:

—Cata caa ndó da ndica crúxu.

24 Ta tá naxini Pilato ña co yáa na cán ta ví ga ví ndívaā nā já natiin da ticuúí ta nandahá da nu ndíhi ñayivi cán ta já nacachi da já xihín ná:

—Xihín ña yóho jánaḥa i nu ndo ña coó cuachi toho ndójo i saḥa ndá ña ná caja ndó xihín da yóho jáchi coó cuachi toho da yóho. Jata mé ndó ná cuḥun ndihi va —nacachi da xihín ná.

25 Anda já nacachi tóco ndihi na cán já:

—Vaha ná candojo nde cuachi ta janda jahyi nde viti ná candojo na cuachi saḥá ña ná quivi da —nacachi na cán xihín dá.

26 Anda já najaní Pilato Barrabás. Ta tá nandihí najácaxáhan na Jesús já nandiquiahva da a ndáḥa ná ña ná cata caa na a ndica crúxu.

27 Anda já ñéhe soldado cuéntá gobernador cán Jesús yuyéhe vechúun. Já najátaca soldado cán java ga táhan da ta cán nacava toyivi da mé á ndúu da. 28 Tá nandihí já natavá na jáhma á. Anda já nachinúu na in jahmá cuáhá túun jatá. 29 Ta já nachinúu na in tiyivi íñu jini á. Ta nachínee na in ndoo ndahá cuáha. Ta já nacasáhá na cáxítí na nu á já sácū ndaa ichi ñahá na já cáchí na já xihín á:

—Cáhnū nahá ná cacuu yóhó, da cúu rey nuú na Israel —nacachi na.

30 Ta nacasáhá xihnu ndaa na tójíí na nuu á. Ta já cándaa na ndoo cán ndáḥa á ta cáni na yiquí jini a xihín do. 31 Ta tá sa nandihí na sacū ndaa ñahá na já nacandaa na jáhma nachinúu na jatá cán ta najácandixi tucu na a xihín jáhma mé á. Anda já ñéhe na a cuḥan na cata caa na a ndica crúxu.

*Tá nacata caa na Jesús ndica crúxu  
(Mr. 15:21-32; Lc. 23:26-43; Jn. 19:17-27)*

<sup>32</sup> Ta tá ñéhe na Jesús cuahān nā cata caa na a já nānditahan na in da naní Simón, da ñuu Cirene. Ta nācāja ndúsa nā xihín dá ña ná ndicojo da crúxu nuú cata caa na Jesús. <sup>33</sup> Ta naxinu coo na xiqui naní Gólgota. Tuhun yóho cūni cachi a: nu ndúu lásá yiquí jíní ndii. <sup>34</sup> Mé cán nasahan nā vino nu á, dó nacava táhan xihín ña ova ña ná coho a do. Joo tá naxito ndojó a do coo naxeen toho a coho a do.

<sup>35</sup> Ta tá sa nandihī nacata caa na a ndica crúxu já naquehe na jáhma á nandicahnda nu táhan na. Joo jihna ñúhú nasajiquí nā sahá ta da naquee vaha cán, da cán nandiquehe jáhma á. Xihín ña yóho naxinu coo nuú ña nacañyí profeta sanahá tá nacañyí da já: “Nandicahnda nu táhan mé ná cotó níhnu i ta já nasajiquí nā sahá cotó maá i ta da naquee vaha cán nandiquehe da ña”, cáhī tuhun Ndióxi. <sup>36</sup> Ta já nasacoo soldado cán ndúu na ndáá ñahá nā. <sup>37</sup> Ta jini ndica crúxu cán nacañyí nā ndá saha nacata caa na a já cáhī a já: “Da yóho cúu Jesús, da cúu rey nuú nā Israel.”

<sup>38</sup> Ta sa mé já nacata caa ri na ivi taa cuihná xihín Jesús: in da xoo cuáha ta inga da xoo íti. <sup>39</sup> Chí cáva jini mé ñayivi yáha cán cánahá nā xihín á. <sup>40</sup> Ta já cáhī nā já:

—Yóhó cáhún jánditani veñuhu cáhnu cán ta tixi unī víxī quivi cáhún jácandichi tucún ña. Tá ta mé a ndaa cúuñ jáhyi Ndióxi jácacu mún ta cuáhān nuu ndica crúxu jan —nacachi na xihín Jesús.

<sup>41</sup> Ta quiahva já nacaja ri nā sacuaħa nuú jutū xihín nā jánahā ley Moisés xihín nā sacuaħa veñuhu. Sácu ndaa nā a já cáhī nā já:

42 —Najácacu da java ga ñayivi ta viti chí a cuú caja da jácacu da mé dá. Tá ta mé a ndaa cúú dá rey nuú na Israel, ná nuu da ndica crúxu viti ñuhú já ná candúsa nde da. 43 Cándéé ini da Ndióxi ta cáhí da cúú da jahyi Ndióxi já quéa ná quixi Ndióxi chindeé a da tá ta mé a ndaa quihvi ini a da —nacachi na cán canahá na xihín Jesús.

44 Quiahva já canahá ri ndívi ta cuíhná tácaa in in xoo jín á cán xihín á.

### *Tá naxihi Jesús*

*(Mr. 15:33-41; Lc. 23:44-49; Jn. 19:28-30)*

45 Tá naxinu coo caxivi ndaa nacanaá ní cúú ñuyívi ta janda caa uní sahini já nacasahá nandiyehé tucu. 46 Ta sa mé hora já nacayuhú cóhó Jesús já nacachi a já:

—Elí, Elí, lama sabactani —ña yóho cúní cachi a: Ndióxi mí i, Ndióxi mí i, ndávaha najándacoo ndáha ndó yehé.

47 Ta java na ndíta cán tá naxini johó na tuhun cáhí a já nacachi na já:

—Cána da profeta Elías —nacachi na cán.

48 Ivi laá xínu in da nasahan da naxindaxi da in ticoto ini vino iyá. Ta nacató da ña nuú in yitó ndoó já naxiñee da do yati yúhu Jesús ña ná coho a do. 49 Joo na java ndíta cán nacachi na já xihín dá:

—Cóho candehé yo á quixi Elías jácacu a da —nacachi na cán.

50 Anda já nacayuhú cóhó tucu Jesús já naxihi a. 51 Ta ndaja coo nandatá java ndaa jahmá ndeé ña sáji nuu nuú yíi ndivaha veñuhu cáhnu ñuu Jerusalén cán. Janda jini á ta janda sahá nandata.

Ta mé hora já n̄aṭaan ta ndijáá yuu tóto ndúu cán n̄andata. <sup>52</sup> Ta n̄anuna cáva nu n̄asañuhu na n̄axih̄i ta cuahá ñayivi, n̄a n̄asaṭuu cuéntá Ndióxi n̄anditacu tucu na. <sup>53</sup> Ta tá sa n̄anditacu tucu Jesús já n̄axinu na naqueta cáva cán ñuu Jerusalén ta cuahá ndivaha ñayivi n̄axini ñahá.

<sup>54</sup> Ta da cúu sacuaḥa nuú soldado cuéntá Roma xih̄in da ndáá Jesús xih̄in da cán tá n̄axini da ña n̄aṭaan ta n̄axini da java ga ña n̄ayaḥa cán já n̄acasahá yíhv̄i ndivaha da. Já n̄acachi da já:

—Mé a ndaa táhyí cúu da yóho in túhún jini já jahyi Ndióxi —n̄acachi da.

<sup>55</sup> Ta mé cán n̄asandita cuahá najih̄i sándeḥé xicá na Jesús. Mé na cán cúu na n̄acaja ndíví ñahá nu Jesús tá n̄andico na mé a n̄aquixi na janda estado Galilea. <sup>56</sup> Tañu najih̄i cán n̄asandacaan María, ñá ñuu Magdala xih̄in María, ñá cúu náná Jacobo xih̄in José. Ta cán n̄asandacaan ri ñá cúu náná ndíví da cúu jahyi Zebedeo.

*Tá n̄achicaan na yiquí cuñu Jesús ini cáva  
(Mr. 15:42-47; Lc. 23:50-56; Jn. 19:38-42)*

<sup>57</sup> Ta ndaja coo n̄asahiin in da cuicá naní José, da ñuu Arimatea. Mé da yóho n̄asaṭuu da in táhan da n̄asaxica tuun xih̄in Jesús. Ta tá sa n̄acuaá já n̄axinu da <sup>58</sup> n̄asahan da cahan ndahví da xih̄in Pilato ña ná ndiquiahva da yiquí cuñu Jesús nu dá. Anda já n̄asahnda Pilato chuun ña ná ndiquiahva na ña nu dá. <sup>59</sup> Ta já n̄achitiví José cán yiquí cuñu Jesús xih̄in in jáhma vaha ña vií. <sup>60</sup> Ta já n̄achicaan da yiquí cuñu Jesús ini in yávi ña saá ndácaan ndica cáva ña jacá naṭaán da cuéntá mé dá. Ta tá n̄andihi já n̄achijahví da yuhú cáva cán xih̄in in yuu jáhnda



cáhn̄u ta já naq̄uee da cuaḥan̄ da. <sup>61</sup> Ta nu yéhé mé cáva cán naṣandu u coo María, ñá ñuu Magdala xihín inga ñá naní María cán.

*Tá ndáá java soldado nu ndácaan Jesús*

<sup>62</sup> Ta ndaja coo sa nandihi naḥaja ndíví na ñaha cuéntá quiví ndíquehe ndée na. Ta inga quiví itaan najátaca táhan na saḥuaḥa nuú jutú xihín na fariseo já naṣaḥan̄ na nu Pilato. <sup>63</sup> Já naḥachi na já xihín dá:

—Vaxi nde nu ndo caḥa loho nde ñamaní nu ndó. Jáchi ndícuḥun̄ ini nde ña tá naṣatacu Jesús, da naḥica jándahvi ñayivi cán naḥachi da ña tá sa ná yaḥa uní quiví já nditacu tucu da. <sup>64</sup> Ña cúni nde queá ná chindahá loho ndó na cuḥun̄ candaa nuú naḥicaḥan̄ na yiquí cuñu da cán janda quiahva ná yaḥa uní quiví. Jáchi tiaḥva náá xinu coo na naḥica tuun xihín dá ñuu ta caja cuihná na yiquí cuñu da. Ta já casáhá cachi na xihín ñayivi ñuu ña nanditacu tucu Jesús tañu na naḥihí. Ta xihín ña yóho jándahvi chága na ñayivi a juú ga jihna —naḥachi na.

<sup>65</sup> Anda já naḥachi Pilato já:

—Cañehe ndó in táhnda soldado. Cuáhán ndó candaa ndó nu ndácaan̄ da tá quiahva xini mé ndó caja ndó —cáchi Pilato xihín ná.

<sup>66</sup> Anda já naq̄uee na cán naṣaḥan̄ na já naḥicají vaḥa chága na nu ndácaan̄ yiquí cuñu Jesús cán. Ta naṣacu na sello yuu jáhnda cán ta já naṣacu na soldado ña ná candaa da ña.

## 28

*Tá nanditacu tucu Jesús*

*(Mr. 16:1-8; Lc. 24:1-12; Jn. 20:1-10)*

1 Tá sa nayaha quivi ndíquehe ndée ná ta nativi inga quiví itaan já naxinu María, ña ñuu Magdala xihín inga María cán sándehe ná nuú nachicaan ná yiquí cuñu Jesús cán. 2 In naá cuití nataan ndée ndivaha. Nayaha ña yóho jáchi nanuu in tátō Ndióxi indiví. Ta najátivi a yuu jáhndá nasajahvi nuú nasandacaan yiquí cuñu Jesús cán. Ta já nasacoo a jatá. 3 Ta yéhe mé tátō Ndióxi cán tá quiahva yéhe tasa. Ta jáhma ndíxi a cúú á jahmá yaa cachi. 4 Ta a juú quiahva ná yihví soldado ndúu cán nacaja tátō Ndióxi chí nacasáhá quíji ninu da. Ta já nacuyu da nu ñúhu tátuhun ndii naxihi. 5 Joo ndaja coo tátō Ndióxi cán nandicaahan xihín najihí cán já nacachi a já xihín ná:

—A cáyivi toho ndó. Sa xíni vaha i ña ndínducú ndo Jesús, ña nacata caa na ndíca crúxu. 6 Coó toho a cán ín yóho jáchi sa nanditacu tucu a tá quiahva nacachi mé á xihín ndo. Naha ndó candehé ndo nuú nasahin a já cuni ndó ña coó ga ín nuú nasacu na ña. 7 Ta cama ndó cuhun ndó caxi tuhun ndó xihín dá naxica tuun xihín á ña sa nanditacu tucu Jesús tañu ná sa naxihi. Ta viti cánúú mé á cuahan estado Galilea. Ta tá cuhun ndó cán já cuni ndó a. Ta ndicuhun ini ndó ña nacachi i xihín ndo —nacachi tátō Ndióxi cán.

8 Anda já naquee mé najihí cán mé nuú nasandacaan yiquí cuñu Jesús. Ta vatí yihví ná joo cávatá ndivaha na ta sahá ña cán quea xínu na cuahan ná caxi tuhun na ña yóho nuú ná naxica tuun xihín Jesús cán. 9 Ta nani cuahan ná ivi laá sa ín va Jesús xihín ná. Já nacachi a já xihín ná:

—Ndióxi ná coo xihín ndo.

Anda já n̄acayati n̄a cán nu á já nanumi na sahá ta n̄acaja cáhnu na a. <sup>10</sup> Anda já n̄acachi tucu Jesús já xihín ná:

—A cáyhívi toho ndó. Cuáhán ndo caxi tuhun ndó xihín n̄a cúu cuéntá mí i ña ná cuhun n̄a estado Galilea jáchi cán cuni na yehe —n̄acachi Jesús xihín najihí cán.

<sup>11</sup> Ta nani xínu najihí cán cuahan n̄a já ndáva java soldado, da nasandaa nuú nasandacaan Jesús cán naxinu da ñuu Jerusalén já n̄acaxi tuhun da ña n̄acuu nuú n̄a sacuahā nuú jutū. <sup>12</sup> Anda já najátaca táhan n̄a sacuahā cán xihín n̄a sacuahā veñuhu já najándique táhan na tuhun na ta já nasahan cuahá ndivaha na jihún nuú n̄a soldado cán. <sup>13</sup> Já n̄acachi na já xihín soldado cán:

—Coto a cáhan ndó ña n̄anditacu Jesús. Ña cachi ndó cúu ña yóho: “N̄a n̄axica tuun xihín á cán, n̄a cán cúu n̄a n̄aquixi ñuu ta n̄acaja cuíhná n̄a yiquí cuñu a nani n̄aquiji nde”, já cachi ndó xihín ndá n̄a ná ndaca tuhún ndohó. <sup>14</sup> Ta a cáyhívi toho ndó tá ná candaa ini da cúu gobernador sahá ña yóho jáchi cahan mé nde xihín dá ta chindeé nde ndohó ña ná a cája da ni in ñaha xihín ndo —n̄acachi n̄a sacuahā cán xihín soldado.

<sup>15</sup> Anda já n̄aquehe da cúu soldado cán jihún ta n̄acaja da tá quiahva nasahnda n̄a sacuahā cán chuun nu dá. Ta xihín ña yóho n̄andicuita nuu tuhun sahá ña nayaha cán. Ta cáhan n̄a Israel cán sahá ña yóho janda quivi víti.

*Tá sáhdá Jesús chuun nuú n̄a n̄axica tuun xihín á  
(Mr. 16:14-18; Lc. 24:36-49; Jn. 20:19-23)*

16 Joo ndíhuxu in na naxica tuun xihín Jesús cán nasahan na chí Galilea. Já nandaa na in jini yúcu tá quiahva nasahnda mé Jesús chuun nu ná. 17 Ta tá naxini na mé á já nacaja cáhnu na a. Joo java na cáhvi ivi joho ini na jáchi co cándúsa na ña nanditacu tucu a. 18 Anda já nacayati Jesús nu ná já nacachi a já xihin ná:

—Nasahan Ndióxi ndée nuú i caja i ña náhnu ndivaha indivi xihín ñuyívi yóho. 19 Sahá ña cán queá cuáhán ndo jánaha ndo nuú ñayivi ndúu ndi-jáá ñuyívi ndaja caja na caca vaha na íchi cuéntá mí i. Ta caja ndúta ndó na xihín quivi Ndióxi, tátá i ta xihín quivi yehe, da cúú in túhún jini já jahyi mé á ta xihín quivi ínimá yii Ndióxi. 20 Ta jánaha ndó na ña ná caja na tóco ndihi ña nasahnda i nu ndó caja ndó. Ta mé a ndaa coo i xihin ndo ndijáá ní quivi janda quiahva ná xinu coo quivi ndihi saha ñuyívi. Já ná coo —nacachi Jesús.

**Tuhun saá ña najá<sup>ndacoo</sup> Jesucristo nu yo: El  
Nuevo Testamento en el mixteco de  
Silacayoapan  
New Testament in Mixtec, Silacayoapan  
(MX:mks:Mixtec, Silacayoapan)**

copyright © 2009 Wycliffe Bible Translators, Inc.

Language: Mixtec, Silacayoapan

Translation by: Wycliffe Bible Translators, Inc.

Mixtec, Silacayoapan

mks

Mexico

**Copyright Information**

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Mixtec, Silacayoapan

**© 2009, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.  
Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 11 Nov 2022 from source files dated 29 Jan 2022

7f2d3ecf-6d15-55a5-9081-6e970474df2f